

**NATIONAL ASSEMBLY OF  
SEYCHELLES**

*Monday 22<sup>nd</sup> February ,2021*

*The Assembly met at 9:00 am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou Manm Onorab. Bonzour nou lodyans a lekout an deor. Mon remarke ki i annan plizyer Manm ki an retar. Mon ti a zis demann bann *Leaders* pou remind zot Manm ki nou komans 9er, amwen ki zot annan en leskiz.

Avan nou rebran deba lo Bidze, mon ti a kontan pran enn de pwen ki'n leve. Premyerman, enn nou Manm in ganny demande pou reste se li an izolasyon, apre ki en kontak pros in teste pozitiv pou *COVID*. Li menm li in fer son tes yer swar, e son *rapid test* i negativ. *So, so far so good*. Me i pe atann son rezilta *PCR*, ki i pou gannyan anndan 48 erdtan.

Antretan Minister Lasante ki mon'n konsilte, in dir nou, in dir mwan zot a aviz nou si an ka son tes i pozitiv, si nou annan

okenn mezir ki nou bezwen swiv. Pou lemoman annou zis ranforsi tou bann direktiv kont *COVID*. Gard zistans, met *mask* toultan, enkli dan Lasanble la letan zot fer zot *speech*. E an deor silvouple evite bann enteraksyon fas a fas. E nou espere ki tou keksoz pou byen. Mersi bokou.

Dezyenm pwen, se en demann pou en Dwa De Repons. Ansyen *CEO Air Seychelles Captain* David Savy in ekir mwan pou obzekte lo en remark fer par Onorab Sandy Arissol, dan Lasanble le 2 Fevriye.

Remark Onorab Arissol ti koumsa, e mon *quote*. "Zis parey letan nou ti annan en zofisye *Air Seychelles* ki ti asiz lo *Board* ki ti en sef. I ti pe lwe *Creole Spirit* anvil avek son fanmir, e tousala in form par ki ozordi nou pe asize nou pe fer en diskisyon". Se sa remark Onorab Arissol.

Mon rekonnet ki Onorab Arissol pa'n nonm *Captain* Savy, e in fer referans lo en zofisye ki ti asiz lo *Board* e ki ti en Sef. Donk pou mwan, i pa'n fer en lakizasyon presi. Me nou tou nou konnen dan en pti sosyete ki mannyer keksoz i pase. Avek bann referans ki ni fer, dimoun pou tir zot

konklizyon lo lekel ki i ti pe koz lo la.

E *Captain Savy* in konklir ki se li ki Onorab Arissol ti pe fer referans avek. Sa i rezonnab. *Captain Savy* in fer son obzeksyon koumsa, e mon a lir sa parti son let.

*“In a session of the National Assembly, on the morning of Tuesday 02<sup>nd</sup> February 2021, Honorable Sandy Arissol made a statement, that the Chief Executive of Air Seychelles rented premises in the Creole Spirit building from a family member of his.*

*I, Captain David Savy was the sole Chief Executive of Air Seychelles during the tenure of the Nation Airline at the Creole Spirit. And the statement made by Honorable Arissol is untrue, offensive, and malicious.*

*The Creole Spirit belongs to the Anand Jivan Shah family. And it is a well-known fact that this family is not in any way related to myself or my spouse Mrs Surekha Savy, family name Bhogilal Shah.*

*For the record Air Seychelles Head Office relocated from Victoria House and Teemooljee Building because of space constrains, to the Creole Spirit in 2003 until it*

*was in a position to build its own Head Office at Point Larue”.*

Sa i komanter *Captain Savy*. Sa ki spesifik dan remark ki *Captain Savy* in fer, se ki *Air Seychelles* ti lwe biro dan *Creole Spirit Building*. Me sa batiman pa pou dimoun ki annan lyen fanmir avek li.

Donk mon met sa koreksyon lo rikord. Si Onorab Arissol ti pe fer referans lo *Captain Savy*, e lo fanmir son madanm an relasyon avek *Creole Spirit*, in fer en fot.

Me pou lesplikasyon e an ka piblik i lev lot kestyon, mon a fer remark ki lafanmir Shah ki li avek *Captain Savy* i annan en lot batiman dan Victoria, ki apel *Ansuya House*.

*Air Seychelles* ti lwe biro dan sa batiman, me sa ti apre ki *Captain Savy* ti'n sorti koman CEO *Air Seychelles*. Kestyon lo sa laranzman ti monte dan Lasanble apre. Akoz ti paret ki *Air Seychelles* pa ti pe servi sa biro ki zot ti pe lwe.

*Captain Savy* in eksplike ki sa ti napa naryen pou fer avek okenn son desizyon. Mon dir sa pou reflekte mon lopinyon ki Onorab Arissol in lev en konsern an koneksyon avek *Air Seychelles*, ki ni fer en fot dan asosye *Creole Spirit Building* avek lafanmir *Captain Savy*. Me ki i pa'n montre

lentansyon fer en latak malapropo lo *Captain* David Savy.

Mon espere ki *Captain* Savy i ava aksepté sa koreksyon. E sa leklersisman. Mersi.

Prezan pou en size en pe pli leze. *Leader* Biznes Gouvernman in met a mon latansyon ki serten son Manm ti a kontan nou rekonnèt Lazournen lalang maternel. Akoz pou nou, i lalang prensipal ki nou servi e nou le met li an loner.

Alors mon a donn Onorab Georges oubyen enn son Manm sa loportinite pou fer en komantr. Onorab Georges.

### **HON BERNARD GEORGES**

Mersi Mr Speaker. Bonzour Mr Speaker. Bonzour tou bann Manm Onorab. Bonzour mon koleg *Leader* Lopozisyon. E tou bann dimoun ki pe swiv nou dan lakour.

Mr Speaker, efektifman mon osi in ganny port a mon latansyon ki yer ti Lazournen Lalang Maternel. E etandonnen ki nou, nou sa sel brans Gouvernman ki servi nou lalang maternel koman nou lalang prensipal. Mon krwar i ti byen pou nou bomaten rekonnèt ki nou lalang maternel i en lalang

apar. I en lalang ki nou respekte, nou kontan.

Me en lalang ki ganny servi dan en tyer nou Gouvernman. E nou bezwen donk rekonnèt ki se en lalang ki'n ariv, e ki'n pran son plas ki i merite.

Avek ou permisyon Mr Speaker, mon pa anvi monopoliz sa letan bomaten. Avek ou permisyon mon ava demann enn nou bann Manm Onorab Samynadin, ki en ansenyan pou dir detrwa mo lo *behalf* nou kote latab lo sa size. Mersi.

### **MR SPEAKER**

Mersi. Onorab Samynadin ou annan laparol.

### **HON KELLY SAMYNADIN**

Mr Speaker, tou mon bann koleg Onorab e tou dimoun a lekout, bonzour. Mr Speaker mon pti lentervansyon pou komans par en poem ekrir par Mrs Eugenie Albert, en zabitan mon distrik e ki ti en profeser lalang Kreol kot Liniversite Sesel.

“Nou desandans bann lesklav.

Nou ti zeritye sa later beni.

Nou ki retras nou listwar, ki nou zanset in ise pouse.

Bataye, martirize pou erite nou lalang maternel.

Marinade dan en lansanm kouler ki determin labote nou lalang Kreol, nou lafyerte dan tou son splander pou sa pep Kreol”.

Mr Speaker, anvi ki Lasanble Nasyonal i enn bann lenstitisyon Sesel ki servi Kreol koman nou lalang ofisyel. E ki mye koni koman nou lalang maternal, mon santi ki mwan koman enn son Manm i enportan pou mwan adres zot ozordi a lokazyon Lazournen Enternasyonal pou Lalang Maternel, ki ti yer Dimans le 21 Fevriye 2021.

Dapre sit web *Seychelles.fr*, Kreol Seselwa i en derive lalang Franse, e i ti ne pandan lepok kolonizasyon Sesel. kot i ti ganny servi par bann lesklav lorizin Afriken ki ti travay dan bann plantasyon apartir 18enm syek.

Sete atraver transformasyon ou modifikasyon serten konponan dan granmer e prononsyasyon Franse ki pti a pti en nouvo lalang ti ganny kree e pe ganny servi ziska ozordi. E sa se Kreol Seselwa nou lalang maternal.

Mr Speaker, dan konteks lengwistik en lalang maternal osi koni koman lalang natif oubyen lalang premyer. I sa premye lalang ki en zanfan i rantre an kontak avek depi son

nesans, oubyen avan i komans al lekol. I sa lalang ki ganny servi pou kominike par pep en Nasyon partikilye.

En lalang maternal i osi sa lalang ki en endividi i servi pou li pli byen konpran e eksplik son lekor, par rapor avek lezot lalang ki i konnen. I pa bezwen okenn lenterferans pedagogik anvi ki i ganny akerir dan en fason natirel atraver bann enteraksyon avek son lanvironnman imedyat.

Dan sistenm ledikasyon Sesel, Kreol i ganny ansennyen dan lakres, e apre P1 ziska P6. Malerezman Mr Speaker, tou i termin la. Mon ti ganny sa posibilite pou agrandi mon konesans lo sa lalang pandan mon letid liniversite an 2016 kot Liniversite Sesel, kot Mrs *Panda Choppy* ti donn mwan avek mon bann koleg laklas sa sans pou eksperyans en nouvo fasad lalang Kreol, lengwistikman.

In annan plizyer largiman ki sa lalang i devret ganny posibilite lansennyman lo nivo segonder, o menm pli o. Me se pa sa pwen deba. Sa ki enportan se ki nou bezwen konpran lavantaz lengwistik, entelektyel e ekonomik ou annan nou lalang maternal dan lekol akote nou de lalang ofisyel ki Angle ek Franse.

Malgre sa Kreol i touzour reste en lalang vivan e i touzour pe evolye atraver bann nouvo mo. Ouswa ganny adopte ou prete sorti dan en lot lalang. Mon santi ki i enportan pou prezerv Kreol Seselwa koman nou lalang maternel, akoz se sa ki defini nou Nasyon koman en pep inik.

Se zis Sesel ki sa kalite Kreol i ganny servi malgre son resanblans avek lezot kreol dan lemond an term leksik, granmer, ensidswit. Pou asir lavenir nou lalang maternel, mon personelman krwar ki i neser ki nou'n annan plis Seselwa kalifye dan sa lalang dan en konteks lengwistik. E osi pedagozik.

E la mon mazin mon zanmi manmzel Anisa Vel ki mon konsider li koman en defander lalang Kreol, atraver son bann travay ki i pe fer pou ede devlop e anrissi li. Mon osi sezi sa loportinite Pou rekonnèt e remersye tou bann ki pran ki koman zot responsabilite ki swa dan en kad profesyonnel oubyen lwazir. Pou asire ki nou lalang maternel i reste an egzistans, e gard son perenite.

Pou konklir Mr Speaker, mon ti a voudre lans en lapel pou tou nou sitwayen Sesel. Pran an kont lafors ki nou annan pou asire ki nou lalang

maternel i ganny rekonnèt. E servi o pli onivo dan pei, e ki i ganny ansennyan. Koman Seselwa nou bezwen fyer nou lalang maternel. Akoz se li ki defini nou lidantite. Fer konnen kote nou sorti, e kote ki nou pe ale.

Nou bezwen fer sir ki Kreol pe ganny servi dan otan domenn ki posib. E ki nou koman bann adilt nou pe transmet li anver sa ki pli zenn. Annou aret krwar ki ler nou ganny tande pe koz Kreol, i pa fer nou parey entelizan. Bann Angle ou bann Franse partou kot zot ale zot koz zot langaz. Be akoz nou pa kapab fyer sa ki pou nou?

Aret dir ki nou pa kapab oubyen pa konn koz Kreol. Aret dir ki nou kapab pli byen konpran, ekri, lir, oubyen reponn an Angle oubyen an Franse. Akoz letan nou fer sa nou pe anlev lenportans ki bann lengwis in ekri e defann koman nou larises lengwistik.

Mwan koman en Manm sa Lasanble, i en gran fyerte pou mwan osi byen ki mon bann koleg pou nou deliber dan nou lalang maternel. Akoz sa i permet tou kous nou Nasyon pou arive konpran kwa ki pe pase dan enn sa bann lenstitisyon pli prestizye dan Sesel.

Mon pou termin avek en pwen refleksyon ki'n ganny met devan mwan par Mrs Joelle Perreau, Vis-Sanselye Liniversite Sesel. E mon sit li "en lalang maternel parey Kreol i annan en listwar ekstrememan ris. E sa i fer ki nou, nou en Nasyon ris avek en kiltir ki ris". Mersi.

**(APPLAUSE)**

**MR SPEAKER**

Mersi Onorab. Lo kote Lopozisyon, wi Onorab Pillay ou ti a kontan azout en mo sipor pou sa mesaz?

**HON SEBASTIEN PILLAY**

Mersi Mr Speaker. Mon ti'n a kontan azout en mon sipor, me si mon ti pou annan de lezot pti size ki mon ti pou le *raise* avek ou si ou permet mwan.

Premyerman lo sa....

**MR SPEAKER**

Dan ki lord? Nou a fini avek sa enn avan.

**HON SEBASTIEN PILLAY**

Mon a pran sa enn avan. Mwan koman en endikater sa ki enportan pou mwan se ki byen lontan mon'n realize poudir laprantisaz, i komans dan nou lalang maternel. I ed zanfan

relasyon sa ki zot pe aprann pli direk avek zot lavi toulezour.

Me nou bezwen aksepte osi ki tou dernyerman in annan en kantite latak si oule, mon pou servi sa term, lo *whether* or not laprantisaz ki ganny fer dan nou lalang maternel e evidaman anmenn en benefis pou etidyan.

Me sa ki enportan se ki okenn *attempt* pou nou retir nou lalang maternel dan lakour laprantisaz, i pou fer ki nou redwir lenportans ki i annan pa zis pou nou kiltir, me pou zenerasyon fitir.

Mon krwar sa ki Onorab Samynadin in dir i totalman vre. Ki i pou enportan i koman en Nasyon nou realiz potansyel ki nou lalang maternel o ofer. E ki mannyer nou kapab servi li koman en baz pou ede anmenn lenstriksyon. Lenstriksyon ki a kapab ed bann etidyan e bann zanfan relasyonn sa ki zot pe aprann avek zot lavi toulezour.

Sa i sa ki mon ti annan pou mwan dir lo size lalang maternel.

**MR SPEAKER**

Mersi Onorab.

**HON SEBASTIEN PILLAY**

Petet ou a permet mwan pou vin lo dezyenn size.

**MR SPEAKER**

Zis les mwan termin avek en pti sipor lo mon kote. E mon rekonnèt mannyer mon apresye ki zot in fer sorti ki nou Lasanble i vitrin enportan litalizasyon Kreol dan nou sosyete. E mon krwar nou bezwen gard sa pozisyon ki nou pe donn en legzanp, e nou pe donner b direksyon dan ki mannyer lalang maternel Kreol i kapab ganny servi pou anrisir nou travay e nou sosyete.

Donk felisitasyon pou bann ki travay dan sa domenn e nou donn zot nou lapiy, nou sipor a lavenir. Mersi.

Onorab Pillay wi nou a ekout ou.

### **HON SEBASTIEN PILLAY**

Mersi Mr Speaker. Mon lot pwen i konsern sa Dwa Repons ki ou'n lir bomaten. E Lartik Konstitisyon ki gide, ki en dimoun i annan en *Right of Reply*. En dimoun i *aggrieve* anba lartik, si i *aggrieve* anba Lartik 102 (6) nou Konstitisyon. E sa *Right of Reply* i bezwen ganny lir *immediately following sittings of the Assembly*.

Pou mwan mon santi poudir *immediately proceeding sittings* i devret bann *sittings* ki vin direk apre ki ou ti'n resevwar sa Dwa Repons. Me ou'n lir sa Dwa Repons deza sa i en bon komansman.

Me kot mon bezwen eksprim serten konsern Mr Speaker senserman, i se ki sa Dwa Repons pa ti ofer nou sa detay ki ou'n donn nou baze lo resers ki ou'n fer vizavi parante Mr Savy e lezot dimoun. Kot in annan apre son *tenure* kot *Air Seychelles* kot in annan *building* ki'n ganny lwe.

E mon krwar petet dan sa laliny nou ti devret osi *add* en pti pe plis detay. Akoz Mr Savy in ofer nou lenformasyon adisyonnèl kot i koz lo ler i ti napa ase lespas Point Larue, zot ti osi *rent Grosvenor's House* ki *opposite cargo terminal*. Ki apar tyen a en Mrs Siana Bistoquet.

Savedir nou annan plizyer landrwa ki *Air Seychelles* in *rent* zot bann *building*. Dan lenterè donn *maximum* lenformasyon Lepep Seselwa, mon krwar sa ti enportan.

Mon pa pou al lo detay ou...

### **MR SPEAKER**

Silvouple wi.

### **HON SEBASTIEN PILLAY**

*Regarding* Onorab Arissol. Onorab Arissol i Manm Lasanble. I annan tou *immunity* pou li fer bann *statement* ki i anvi fer.

Mon lot pwen ki mon ti annan Mr Speaker, i konsern

lenformasyon ki ou'n donn nou bomaten *regarding* Onorab Woodcock. Parey nou tou nou ava okouran ki pandan *weekend*. Pandan sa *weekend* ki'n pase Vandredi, nou'n ganny sans vwar lalis *FA4JR* ki'n al dan piblik.

E nou'n ganny sans vwar ki bann kontribisyon in ganny kontinyen ziskan Novanm, Desanm e menm Zanvye 2021. In annan bokou konsern eksprimen par piblik an zeneral ki mon *share* sa bann konsern vizavi bann antite ki'n swa resevwar sipor *FA4JR*.

Bomaten mon ti pou al demann ou permisyon pou nou kapab zwenn avek Minis Finans, *FPAC* pou nou ganny en pe plis lenformasyon lo sa size. Me i paret ki sa pou en pe difisil la *given* bann sityasyon ki ou'n met devan nou.

So atraver ou mon ti a kontan demann Minis Finans pou donn nou okenn lenformasyon adisyonnèl. Akoz *FPAC* pe konsider Bidze Oditer Zeneral ki pou en size enportan akoz sa Bidze i parey, i pa pe donn li ase sipor. E i pou bezwen sa sipor si nou pou annan serten travay ki pou bezwen ganny fer avek *FA4JR*.

E mwan mon bezwen dir la ki si Gouvernman i al ver en b lapros kot dimoun ki'n ganny

sa larzan an plis i bezwen rann. I en keksoz ki mon pou siporte totalman, akoz mon krwar nou pa devret annan en sityasyon kot ozordi prezan dimoun ki pou relman bezwen benefisye ek sa program pa pou kapab fer li.

So avek sa mon ti ava met sa demann devan ou Mr Speaker, pou ki Minis i kapab *provide* sa lenformasyon.

E dernyen pen ki mon ti annan Mr Speaker atraver ou. Mon ti'n a kontan demann ou Lasanble pou nou kapab ganny klarifikasyon avek Departman Lanplwa *regarding* sa bann lenformasyon ki pe sirkile konmkwa i annan sa lakantite *GOP* ki'n ganny donnen kot lotel Ste Anne, konteks.

Akoz sa i al anliny avek nouvo stratezi Gouvernman ki nou, nou siporte pou fer ki bann travayer i kapab ganny travay dan bann lenstitisyon. E si sa kantite travayer pe vini lo *GOP*, si sa pa pou afekte zot abilite pou zot kapab osi delivre lo sa stratezi ki zot in propoze. Mon remersi ou Mr Speaker.

### **MR SPEAKER**

Mersi Onorab Pillay. Lo size dwa repons les mwan zis dir ou poudir mon ti an kominikasyon avek *Captain Savy*. E mon'n eksplik li akoz sa repons, akoz

in annan sa dele pou mwan adres sa dan Lasanble. Mersi mon krwar sa mon'n dil avek.

Lo size *FA4JR* avek dernyen pwen ki ou'n leve lo *GOP* pou Ste Anne e pozisyon avek Departman Lanplwa. Nou a pran kontak avek sa 2 Minis e nou a gete ki mannyer nou kapab met serten lenformasyon devan Lasanble. Si i posib dan nou *schedule*. Mersi bokou.

E avek sa nou a rebran nou repons lo Bidze. E nou a demande ki Minis ek son delegasyon i antre silvouple. E mon'n ganny averti ki Onorab Ghislain i annan difikilte transpor, e se pou sa ki i an retar. Alors zot in sanz plas avek Onorab Lemiel. E se li ki pou fer premye ladres bomaten.

Bonzour Minis Naadir Hassan, e bonzour *PS* Damien Thesee. Mersi pou zwenn nou ankor enn fwa. E mon a pas laparol Onorab Lemiel.

### **HON SYLVANNE LEMIEL**

Mersi Mr Speaker. Bonzour Mr Speaker. Bonzour Minis Hassan, *PS* Thesee, tou Manm Onorab prezan. Zabitan Anse Royale, e tou lezot dimoun a lekout.

Mr Speaker, Premye remark konsernan Bidze 2021 se ki i pann baze lo bann prezonpsyon labitid. Vi ki sa

lannen i en lannen abnormal an vi pandemi *COVID-19* i ankor pe enpakte lo lasante piblik ek lekonomi sa Bidze 2021 in ganny prepare lo prezonpsyon ki program vaksinasyon pou ganny enplimante avek tou sikse.

Savedir, 70mil dimoun pou ganny vaksinen ki ava donn pei iminite e ki aktivite ekonomik lokal pou rekomanse apartir Avril 2021. E ki larive touris dan pei pou rebran apartir Avril.

Sa bann prezonpsyon i annan en pake trou ladan. I tre en probab ki aktivite lokal ek larive touris pou rebran telman vit, vi ki Lerop ki reste pli gran marse touris pou Sesel, i ankor malad avek *COVID*. E sa i pou leka pour omwen ankor apepre 6 mwan. Bann eksper pa pe tonm dakor lo kan ki tourizm pou rebran. En bann pe dir 2023, en bann 2025.

Si sa i leka, sa reveni R5.7 bilyon ki enkli R2.1 bilyon (*VAT*), 1.28 bilyon *Excise Tax*, R1.1bilyon *Business Tax*, 254 milyon *Custom Duty*, e 929 milyon *Income Tax* ki'n prevwar dan Bidze pa pou materyalize e i riske bokou pli ba. Ki pou anmenn en defisit primer e zeneralman bokou pli o.

An plis, sa reveni R8.26 bilyon ki'n prozekte i enkli en

sonm R1.1bilyon koman donasyon ki lye avek balans peyman. Minis i ekspekte ki sa sonm pou antre dan *Consolidated Fund* koman sipor pour Bidze sorti kot bann pei zanmi, par egzans, Emirat Arab Ini, Lenn, e lezot ankor.

Sa i en lensertitid ki an rezilta i donn en Bidze ki baze lo petet. Si nou pa sanse e sa sonm pa materyalize, alors pou annan en trou bokou pli gran dan Bidze. R1bilyon e plis bann *shortfall* dan koleksyon reveni. Depans Gouvernman, sepandan, ki ariv plis ki R11.2 bilyon, i enkli R2.9bilyon. Savedir apepre 27poursan ki pou servi koman konpansasyon pour anlwaye.

Zeneralman, saler i bezwen ganny peye. Otreman, bann anlwaye servis piblik pou bezwen ganny terminen, ki pou anmenn en lenpak sosyal tre o dan nou pei.

Bidze 2021 i plizoumwen menm nivo ek sa ki pou 2020. E sepourtan, Gouvernman pe koz koup isi, koup laba, degrosi, parkont ki nou'n war, en nouvo ladministrasyon kot lakantite Minis in ogmante sorti 9 pour vin 13. Be sa pa i vedir ankor plis depans?

Ki mannyer Gouvernman pou finans plis ki R11.2 bilyon pou son depans, si i pa kolekte

sa menm kantite koman reveni? Prete?

Le problem la se ki an 2020 Gouvernman in deza pret R3.8bilyon. Si nou pret ankor R3.4 bilyon an 2021, ki ava en total R7.2bilyon larzan prete dan en peryod 2an. Nou sistenm banker napa sa kapasite pour pret sa kantite larzan kan lekonomi i lo son zenou.

E son rezilta i kapab fatal. Dimoun i perdi konfyans dan labank. Kliyan i riske tir larzan dan en panik, e sistenm finansyel nou pei, e nou lekonomi, i riske savire. Deza ozordi, serten labank pe komans kestyonn serten zot kliyan kan zot al tir oubyen met nenport ki sonm larzan lo zot kont.

Mon ti a kontan konnen Minis si ou annan en *plan B*, si sa sipor balans peyman pa materyalize, e prozeksyon reveni i pa ariv lo target.

Eski Gouvernman pou *downsize*? Eski saler pou koupe? Dimoun pou ganny met deor? Minis mon santi ki sa bann prezonpsyon bidzeter pa sifizaman kredib. I en Bidze ki baze lo lespwar ki nou a ganny sipor bann Pei Zanmi. Napa okenn garanti ki sa pou materialize.

Minis mon krwar ki i tre iresponsab pour prezant en previzyon reveni ki grandyoz, e tre probableman pa realizab. I premye fwa dan Sesel ki nou annan en Bidze ki baze lo bann prezonpsyon ki pa fyab e ranpli ek kestyon.

Mr Speaker, mon osi santi ki Bidze 2021 i osi enn ki tir larzan lo malere pou anrisir sa ki deza ris. Mazorite sa bann gro *businessmen* Sesel zot annan plis ki 2 a trwa gro biznes ki pe fer plis ki R25 milyon par mwan.

La taks Biznes in ganny redwir ziska 25poursan pou bann biznes ki fer profi plis ki R1milyon. Sa i bann benefis direk pour gro biznes. Mwens taks pou zot peye, e plis larzan dan zot kont. Pa bliye, en bon pe sa bann menm biznes zot in benefisyé anba *FA4JR*.

Gouvernman ti'n kapab mentenir taks lo menm to pou lemoman, e servi sa reveni pour soutenir peyman *welfare*. Kontrerman, Gouvernman i a redwir taks pou bann ki annan, e i retir sipor *welfare* pour bann vilnerab. I aboli *URS* sa ki pov i vin pli pov, sa ki ris i vin pli ris.

Se sa bann prensip neo-liberalizm ki Gouvernman *LDS* pe pratike. Annou osi pa bliye ki Prezidan Ramkalawan ti dir dan enn son bann kanpany

lepase ki si i vin Prezidan, li avek son lekip dan *SNP* pou vin parey sa *cowboy* Langleter ki ti apel *Robin Hood*. Ki ti pran avek sa ki ris pou donn sa ki pov.

Ozordi Mr Wavel Ramkalawan in vini Prezidan Sesel, me ki nou'n vwar, koman i pran pouvwar, i pe pran avek sa ki pov e i pe anrisir sa ki plis ris. Sel dimoun ki'n Prezidan Sesel ki'n pran avek sa ki ris e donn sa ki pov, se nou Per Fondater defen Mr France Albert Rene!

**(APPLAUSE)**

### **HON SYLVANNE LEMIEL**

Pep Seselwa mon espere ki zot pe note!

Lo size netwayaz bann semen, lans, larivyer ek lanmar, Polisi Gouvernman *US* sete pour donn kontra otan bann pti antreprenner ki posib. Plan Gouvernman *LDS* se pou santralize. Akoz dapre Minis, i annan tro bokou politik dan donn Kontra netwayaz bann pti kontrakter ki mon panse zot tou zot siport *US*.

La ozordi, Minis i dir nou ki son Gouvernman pou revwar sa bann kontra e donn tou kontra 4 ou 5 gro biznes. Sa pou fer ki apepre 1000 pti antreprenner ki ti pe travay pou zot menm avan, pou dan

lanmen sa 4 a 5 gro biznes. La ni menm en pti morso lakourt pou zot gannye pa garanti. Parey Prezidan Larepublik ti dir dan son *PPB*, zot a anmas sa bann fri ki tonm anba pye.

Kontra sekirite osi menm zafer, sa pe ganny tire dan lanmen bann pti antreprenner e ganny mete dan lanmen bann gro biznes sekirite tel parey sa ki pou Mr Fonseka.

Kot i konsern *loan* lagrikiltir, i sorti R1 milyon pou vin R5milyon a en to lentere 5 pousan. Sa i byen, me lekel ki pou vreman benefisy Msye Speaker? Se sa bann gro ferme. Mon pa war kote bann pti ferme pou benefisy avek en tel *loan*. Sa bann pti ferme, zot, zot kontinyen monte desann, ranpli papye isi, ranpli papye laba anmenn tel dokiman avan zot ganny en pti SR350 mil, e pa bliye, i annan pa gannye osi.

Lo size en dezyenm *parent stock*, ki pou ganny zere par sekter prive. La ankor, sa sityasyon ki nou ladan se bann gran prodikter lagrikiltir ki pou benefisy.

Mr Speaker, Roupie Sesel in depresye vizavi Dolar. R14.03 an 2019 pou ariv R21.50 an Zanvye 2021. Rezilta se pri marsandiz e pri lavi i monte. Sa i fer ki bann lo saler

minimonm ek bann vilnerab ki pe soufer. Bann ki annan, i kapab anpar sa logmantasyon pri aköz sa rediksyon taks ki zot pe benefisy. Zot pou ganny plis profi.

Ler nou regard en pe lo det *GDP* ki'n ogmante, sorti 50 pousan an 2019 pou vin 99.4 pousan an Oktob 2020. Prozeksyon pou 2021 i 108.4 pousan ki sorti dan bann pret an 2020 ek 2021.

Bidze 2021 pe propoz en depans kapital R1.9bilyon ki pou ganny finanse par bann *loan* entern e ekstern. Si nou ti'n azir avek pridans, nou ti'n devret konnen ki dan en moman kot nou det in ogmante e kot i annan lensertitid dan realizasyon koleksyon reveni ki Gouvernman in targete, a mon avi Gouvernman ti'n devret tenir tou depans kapital, espesyalman bann nouvo ki depan lo amelyorasyon makro dinamik pei. Pour depans R1.9 bilyon dan sa lannen enserten i irresponsab.

Minis in koz lo move zesyon ek koripsyon. Mon ti a voudre tous an bref sa de size. Gouvernman pour depans R50 milyon zis pou swadizan rod sa \$50milyon ki'n perdi. Eski sa i pa en depans initil par en Gouvernman, ki pa ni menm ankor kapab anmenn okenn

levidans konkret konsernan sa \$50 milyon ki'n swadizan ganny vole?

Ti a byen si *VP Afif* ki ti *PS Finans* a en moman, e ki dapre li i ti annan lenformasyon lo la, i vin devan e devwal sa ki i konnen an piblik. Akoz mwan osi mon ti a kontan konnen kote sa \$50 milyon in ale e lekel ki'n pran, e rann nou, nou larzan!

Kot i konsern move zesyon fon ki *Minis* in koz longman lo la, mon pou agree avek li ki dan serten sikonstans in annan labi. Me mon osi santi ki i annan en labi bann aki *Leta* par *Prezidan* aktyel ler i servi bann gard lakot pour anmenn li *Praslin*, *La Digue*, pou al lanterman. Pou al *Ste Anne* pou rankontre *Zesyon Club Met*. Servi avyon *IDC* pou anmenn li *Maurice* san pey en sou, kan *IDC* li in benefisyè avek *FA4JR*.

Depans ki pa zistifye, kan *Gouvernman* i servi avyon *IDC* ek en lekipaz, pou transport en swadizan *dealer*, *Kenya* ki ozordi pe marse lib dan son pei. Fer *Emirates* retourn dan *parking* pou tir en pasaze angiz ki i ti en sispe. Ki potansyelman ti'n kapab koz *Emirates* pou sarz nou pou bann letan perdi e lannmen, permet menm pasaze pour

mont lo en lot avyon *Emirates* pour al *Dubai*.

Mr Speaker, lefe ki *Gouvernman* in permet konsiderasyon ekonomik pas avan konsiderasyon lasante piblik, dan zesyon pandemik *COVID-19*, in fer ki lakantite ka in ogmante par plis ki 2400 ek 10 lanmor. Mon santi ki in annan tro bokou lenterferans politik dan zesyon sa pandemi.

Minis Lasante ek *Komisyoner Lasante* ti ganny met de kote, e ganny komande. *Gouvernman* pe tap lestoman konmkwa *Sesel* i 3enm pei ki'n efektye plis vaksen. 50 doz par popilasyon 100. Tre byen, mon osi mon apresye.

Sepandan, *Sesel* in etabli en lot rikord. Sa enn nou napa nanryen pour fyer, pei avek to lenfeksyon pli o dapre popilasyon. Savedir, 2.2 poursan lapopilasyon in ganny enfekte. Konpare ek *New Zealand*, ki en lot *Leta* zil, ki annan en popilasyon 4.7 milyon dimoun, avek 535 ka, ki vedir 0.01 poursan lapopilasyon.

*Maurice*, in annan 600 ekek ka, ek en popilasyon 1.2milyon dimoun, ki vedir 0.05 poursan lapopilasyon. Rezon pour sa rikord *Sesel*, se move zesyon ek en latitud bonnavini vizavi pandemi *COVID-19*. Pou sa peryod Zanvye ziska 14

Fevriye 2021, nonm total viziter Sesel ti 1406.

Zistifikasyon Gouvernman pour pa antre dan *lockdown* sete pour permet larantre touris pour relans lekonomi. Dan sa menm peryod ki nou'n resevwar 1406 viziter, nou'n rikord plis ki 2200 ka, ek 10 lanmor. Kestyon: Ki kontribisyon, an foreks, ki sa 1406 viziter in fer?

An preziman ki sak touris i depans apepre petet \$1600 pandan zot sezour Sesel, baze lo bann statistik pibliye par Labank Santral. Ler nou regarde nou fer en matematik i tonm apepre R48.3milyon. Konpar sa avek bann kou izolasyon ek karantenn pou bann ki'n ganny enfekte. Ek bann kou vizavi nou repitasyon.

Nou pa kapab kont kou, si Sesel pe ganny vwar koman pei pli enfekte. Lo en pwendvi ekonomik ek lasante piblik, i ti a'n annan plis benefis si nou ti'n al dan *lockdown* an Zanvye, pou ki touris a lavenir ti a santi zot pli alez pou vizit, pou vwayaze. E donk sa ti a anmenn en *inflow* reveni.

Si nou ti al dan en *lockdown* e anpes transmisyon kominoter, pei ti ava'n pli benefisye, olye ki gard pei ouver, e resevwar 1406 viziter, ek plis ki 2200 ka *COVID*, ki vin avek son bann kou lo nou

repitasyon. En lesou pou sa Gouvernman.

Mr Speaker, apard program vaksinasyon, napa okenn plan konkret ki mannyer Gouvernman pour relans Sekter Tourizm. Minis in koz lo relans lekonomi parey lapes, lagrikiltir, Sekter Finansyel, *digital economy*, me napa okenn plan kler oubyen stratezi lo ki mannyer pour realiz sa. Petet Minis i a elabor lo la dan son larepons.

An konklizyon Mr Speaker, mon santi ki diskour Bidze i vag vizavi stratezi konkret, apard bann proze parey *dry dock*, nouvo lasose ek lizin pour *process* pwason. Tousala i kapab pran en kantite lannen pour materyalize. Napa plan kler pour ogmant reveni Gouvernman. Oubyen pour ogmant lefikasite dan koleksyon reveni.

Mon santi ki labolisyon *FA4JR*, pou annan en lenpak sever lo serten bann biznes. bokou pa pou sirviv. La, menm si mon santi ki in annan bokou labi par serten gro biznes ki'n ganny asiste. Pou annan en lenpak lo lanplwa menm si bokou etranze zot *GOP* pa pe al ganny renouvle.

Nou pe al annan pli bokou fanmir vilnerab dan nou pei. E la osi ler mon gete Lazans

Proteksyon Sosyal in restrikte lasistans pou byennet sosyal. Eski Gouvernman in vreman evalye lenpak sa desizyon?

*Relief Scheme* pou sekter prive i annan en garanti ki disponib Labank Santral, me bann labank komersyal pa pe donn *loan*. Oubyen pe trouv rezon pour pa donner. Sa i priv sekter prive sa loksizenn ki i bezwen pour investir e prospere.

Kot i konsern governans Lantrepriz Piblik, mon santi ki kapasite *PEMC* fodre ganny ranforsi, pou li kapab desarz byen sa fonksyon, sirtou vizavi sa kontrent bidzeter Gouvernman.

Dezyenmman, ti ava enteresan konnen ki kantite larzan Gouvernman pou *save* atraver sa bann diferan restriktirasyon ki'n ganny anonse par Prezidan resaman. Minis akoz sa pann sorti kler dan ou prezantasyon.

An terminan, Mr Speaker, mon dir kouraz tou bann dimoun ki pe pas dan difikilte akoz problem ekonomik ki nou pei pe pas ladan. Mon senpatiz avek tou fanmir ki'n perdi enn zot pros akoz *COVID-19*. Mon osi met dan mon lapriyer tou bann ki'n pas atraver sa maladi e ki'n reisir sirviv.

Mr Speaker, nou tou nou anvii vwar en lavenir meyer pou nou pti pei. Sak kritik, sak nide, sak sizesyon i fer nou avans devan pli vit. Zabitan Anse Royale, pandan sa lannen difisil mon donn zot mon langazman pou mon debout akote zot.

Nou pou fer fas avek bann defi ansanm. Nou pou partaz bann moman lazwa ansanm. Pandan bann sesyon komite mon pou fer sir mon anmenn kestyon e sizesyon lo ki mannyer Gouvernman pe antisipe fer sir ki zot bann zabitan Anse Royale zot war zot dan sa Bidze.

Nou en distrik ranpli avek bann dimoun tre kapab, e avek en determinasyon pou amelyor lavi nou kominote e nou pei. Mon annan en latas enportan e difisil devan mwan e mon pou depann lo zot sipor pou vin sa lavwa for pou zot dan Lasanble.

Mon lavwa i zot lavwa, zot aspirasyon i mon aspirasyon, zot soufrans i mon soufrans e zot lazwa i mon lazwa. Ansanm nou pou sirmont sa moman difisil ki nou pei pe pas ladan. Ki Bondye i kontinyen soutenir nou pti pei Sesel. Mersi Mr Speaker.

**(APPLAUSE)**

**MR SPEAKER**

Mersi Onorab. Onorab Andy Labonte.

### **HON ANDY LABONTE**

Mersi Mr Speaker, Bonzour Mr Speaker. Bonzour tou Manm koleg Onorab. Bonzour pep Seselwa e tou zabitan Larivyer Anglez ki a lekout.

Mr Speaker, Bondye I gran, wi i gran. E i pli gran ki Sesel. Akoz i son kreasyon, e se li ki'n beni sa later Sesel avek nou Prezidan Wavel Ramkalawan, ki pe diriz Sesel avek lasazes ki sorti, kot Bondye li menm. E nou dir en gran mersi Senyer pour tou son benediksyon, son gidans ek son mervey. Nou osi dir en gran Mersi Bondye Papa pou osi beni nou avek Prezidan Ramkalawan pandan sa peryod pli difisil.

Mr Speaker, Mardi le 16 Fevriye 2021 Minis Naadir Hassan in propoz en Bidze ki en valer R11bilyon, 013 milyon, 648mil, 286. Ki enkli sa R2 bilyon, 611milyon, 787mil, 886.75 ki sa 7enm Lasanble ti aprouve boner sa lannen pou permet Gouvernman kapab fer depans pour sa premye kar sa lannen.

Minis dan son ladres, in reasir nou ki nou pa pou zis sirviv. Me osi pozisyonn nou dan en pli bon fason pou relanse e prospere koman en

Nasyon. E pou la premye fwa dan mon lavi, mon'n kapab fer en konparezon avek en diskour Leta Lanasyon konpare ek en diskour Bidze, ki pe konpliment enn a lot.

Akoz dan le pase zanmen ti annan en diferans ant sa de ladres, me plito en melanz kari dan lasoup. La Vandredi pase byen bomaten Onorab Pillay atraver ou Mr Speaker, in vin fer nou krwar ki li i en akter dan lavantir *Robin Hood*. Ki vreman enteresan akoz son koleg Onorab Uranie i vin demonstre son *skill* koman en komedyen ek Tit Latet Zonnyon.

E la bomaten ankor zot pe nou koman nou pou vin fer *film Cowboy* lo seval. Pep Seselwa la deor pe demande si sa Lasanble in vin en kolez lar pli o nivo dan Sesel? Me mwan mon ti ava plizoumwenn demann mon bann koleg lo lot kote latab pou al aprann plis lo profet Zeremi. E sa i ava donn zot plis lasazes.

Mr Speaker, si nou Konpar sa Bidze 2021 avek sa Bidze 2020 ki anviron 11.5 bilyon. E menm si sa sif Bidze 2021 i paret bokou, sa i akoz i reflekte R1.2bilyon ogmantasyon, akoz sa 30 poursan depresyon dan valer nou Roupie Sesel.

Senpleman akoz nou depan bokou lo lenportasyon enkli latizann ek manze. E en rezon akoz ki sa in ganny koze osi, se akoz rezilta *COVID-19* ki pli pir ki lemonn in deza konnen enkli lenpak resesyon global 2008. Kot oubyen lekonomi kontrakte par 10.8poursan an 2020 parey ti'n ganny prevwar. Nou'n war kontraksyon nou lekonomi in deteryore plis ankor, pou ariv 13.5poursan parey Minis in eksplike.

Me pli enportan mazorite zabitan Larivyer Anglez ki'n telefonn mwan, in dekrir sa Bidze koman en lespwar pour fitir nou zabitan e nou pei, oubyen en nouvo soley ki pe leve lo lorizon. E zot dir sa, akoz par sa bann restriksyon finansyel ki'n ganny adrese.

Minis Hassan in dir ki bann priyorite Gouvernman se, premyerman, anmenn Bidze Gouvernman lo en baz pli soutenab. Par redwir defisit fiskal e fer en tranzisyon gradyel ver en Bidze ki fer en sirplis ki a ede anmenn det Gouvernman a en nivo soutenab.

E pou fer sa in eksplike ki zot pou bezwen, premyerman redwir bann depans Gouvernman. Dezyenmman, retir labi ek koripsyon dan Gouvernman. E trwazyenmman

retir depandans lo lasistans sosyal pou bann endividi ki kapab travay. E mon repete retir depandans lo lasistans sosyal pou bann endividi ki kapab travay. Me non pa sa ki pa kapab travay. E sa i vreman enportan pou bann premye mezir.

Dezyenm priyorite se zot pou met an plas bann Polisi pou relans nou lekonomi dan sa bann sekter swivan. Sekter Tourizm, Sekter Lapes, Sekter Lagrikiltir, Sekter Finansyel, Sekter *Digital Economy*. La mon anvi felisit Minis pou pa mazin zis *tourism* koman sa sel lendistri ki kapab anmenn reveni deviz etranzer dan nou lekonomi.

Mon osi bezwen dir Minis ki pep Seselwa i ankor pe demande "ki zistans in arive pou nou reganny nou \$50 milyon ki sa Gouvernman avan in les disparet dan Labank Santral? E pep Seselwa i annan konfyans ki sa Gouvernman denozour i konnen ki zot pe fer, e tre byento nou pou kapab repar sa kales kase *US* in kit avek nou.

Me en keksoz ki fodre bann zournalis Lopozisyon i konpran byen, ler ou aksepte pou aster en keksoz kin kase savedir ou'n pare pou repar li. E se sa egzaktaman, ki

Gouvernman denozour in pare pou fer avek sa pei, se repar sa kales kase e remet li lo larout!

Me parkont en mesaz for e senser ki Minis in fer resorti ankor, ki ti en pwen for dan SONA, se nou tou nou bezwen les valer travay dir re bourzonnen dan Sesel. Akoz nou vant, i nou responsabilite. Parey sa proverb i dir “lapares i fer tonm dan sonmey, me sonmey i fer soufer lafen!”

Minis Finans in osi dir nou e mon site “Nou depandans lo Sekter Tourizm, ki nou bezwen admet nou annan en gran lavantaz ladan, anvi labondans nou labote natirel, i ozordi lo son zenou. Nou bezwen alors re dinamiz nou zefor pou relev e restriktir nou fason fer keksoz.

Nou bezwen met tou nou lentelizans e *think outside the box* parey Angle i dir *smart thinking!* Sa pep i ranpli ek bann zonm e fanm profesyonnel e nou pe demann zot pou zwenn nou dan sa latas pou sov nou pei. “Sesel alors, pou bezwen pas dan en seri reform transformasyon makroekonomik, striktirel e governans, ki pou permet re kre larises, asir devlopman ekonomik e promouvwar e enstil dan nou pep lenportans

pran responsabilite pour nou prop lekor”. Mon retir sitasyon.

Mr Speaker, mesaz Minis i kler e direk. Pep Seselwa la deor pe demande kisisa ki parti kales kase pa konpran ladan? Me ler nou koz responsabilite, mon swete ki nou regard li dan son totalite. La mon anvi relans en lapel avek bann dimoun ki pe tenir bann gro pozisyon dan bann Biro Gouvernman oubyen Parastatal pour plizyer lannen me ki pa pe delivre, zot osi zot devret pran zot responsabilite o serye, akoz sa bann gro saler ki zot pe zwir I osi sorti dan pos sa bann travayer ordiner.

Alors ler en zabitan i vin rod zot servis, fer li dan en lespri profesyonnel. Pa parey sa madanm dan Gouvernman Lokal ki pou plizyer lannen in lese fer. La prezan nek i pe met presyon lo serten travayer, kan se li ki’n trenn son lipye pandan tou sa bann lannen pase. Sa I osi aplik pour sa bann zofisyé Lapolis ki pa pe pran zot responsibility parey i merite.

Zis get kot larantre Terminal Bis Victoria, zis en ta dezord. Nek sa bann drayver *taxi* pirat i park partou kote e kre en lenkonvenyan pou tou dimoun. Sirtou bann drayver bis SPTC, ki parfwa zot mank ganny bate zis akoz zot in kros ek zot loto ki zot in park

ilegalman partou kote. Mon zis demande, si se bann drayver *Taxi* ki ti pe fer sa, ki problem sa madanm laba kot *Licensing* ti pou fer avek sa bann drayver *Taxi*.

Me par kont, mon vreman apresye ki apre mon lentervansyon lo *SONA*, *ASP Wirtz* ek son lekip e bann manm *ANB* per fer en travay ekstraordiner kot ansyen laboutik *Jotty* o bor *Krishnamart*. E pe eseye pou retir sa bann aksyon anti-sosyal dan sa rezyon santral. Kontinyen sa bon travay *ASP*.

Letan ki mon lo *SPTC*, Minis in dir ki byento *SPTC* pou resevwar 55 nouvo bis. Alors mon anvì demann *Management* pou re evalye sa bann ler e program bis dan Union Vale, Ma Joie, Quincy, Mont Buxton sirtou dan letan *weekend* ek konze piblik. Pou permet zabitan kapab asiste servis lanmes a ler, e kapab retourn lakour apre servis.

Mon osi demande ki sa servis bis ki ti pe deservi Vilaz Trezor, ki zabitan sa rezyon ti benefisye avek lontan pandan *peak hours*, ki en pe letan in aret i ganny rekonsidere.

Mr Speaker, mon pou siport sa ki Onorab Pillay ti fer resorti Vandredi pase. I vre ki i ankor annan viktimizasyon dan

landrwa travay, me i tou le kontrè konpare avek sa ki ti ganny dir. Lafason ki sa pe arive, se ki i annan bann siporter *US* ki ankor pe okip bann gro pozisyon dan Gouvernman, e dan bann lakonpanyen parastatal. Ki se zot ki pe viktimiz siporter *LDS*, e zot pe fer sa dan en fason byen organize e profesyonnel.

E mwan, mon apel sa se bann sabotaz. Zot pe menm fer ladwann fouy dan en fason malisye, ler *container* bann biznessmenn *LDS* i antre e fer krwar ki i annan drog ladan. Parey ti arive Vandredi pase avek enn mon zabitan. Zis aköz zot war ki Prezidan pe tap tou pou elimin drog dan sa pei. Mon anvì dir zot, vey zot byen aköz bal retour i danzere!

I annan osi ki dan sekter piblik ki ler nou bann *MNA* ki'n ganny elekte anba parasol *LDS* nou anvoy zot en *email* oubyen nou anvoy en dimoun kot zot pou asiste e rezoud problem sa Seselwa, zot ganny anvoye demen tanto. E en legzanp tipik se kot Biro *ASP*. E mwan mon anvì dir sa bann gro zofisye ki mwan zot menm, e mon pou kontinyen pouse pour benefis tou Seselwa.

La zot bann siporter *US* nepli anvì vwar paviyon Nasyonal Sesel. Zot war sa

koman en senbol politik, akoz se Prezidan Ramkalawan kin rod sa donasyon. Prezidan Ramkalawan in osi al rod vaksen pou protez pep Seselwa kont viris COVID-19. Serten dirizan US i war sa en problem. Me dir mwan kwa ki bon pou zot?

Mr Speaker, i annan en proverb ki dir 'nou pa kapab sant bann sanson lazwa avek en dimoun ki tris. I pou parey nou pe vers vineg lo son boubou'. Alors Gouvernman pa kapab koz lalang avek son pep parey Gouvernman *Robin Hood* ti fer e kontinyen depanse dan en fason artifisyel.

E mon dakor avek Minis ler i dir pep Seselwa ki nou pou bezwen pandan sa bann lannen ki vini revwar lafason ki nou zer nou depans, pou asire ki nou pe vin pli rezilyan a bann defi ki nou pe eksperyanse an se moman.

Minis in osi dir ki se sa nivo depans ki Gouvernman *Robin Hood* in fer dan lannen 2020, ki'n fer ki menm si lekonomi pa ti pe prodwir sitan aktivite ekonomik, zot in kontinyen donn bal dan kof. E se sa enn, bann rezon prensipal akoz nou to lesanz in depresye e kou lavi in ogmante.

Mr Speaker, mon pa pou al tro an detay lo term bann sif,

akoz sa bann diferan Minister e bann antite pou vin dan Lasanble, e a sa moman ki mon pour rod plis leklersisman e fer sir ki tou zabitan mon distrik e pep Seselwa, i vwar egzakteman kote zot pou benefisye direkteman ou endirekteman dan sa Bidze. Depi sa pti baba ki'n fek ne, ziska sa trwazyenm az ki pe apresye sa travay dinamik ki sa nouvo Gouvernman pe fer anba direktiv Mr Prezidan Ramkalawan.

Me mon pou plito konsantre lo vizyon sa Bidze ki pour tou zanan Sesel. E sa lapel ki Minis in fer avek pep Seselwa pou vin pli solider akoz nou pa krwar dan vyolans. Me nou vwar ki lopoziyon pe fer tou le kontrè, akoz zot pa kapab akseptè ki se Prezidan Wavel Ramkalawan ki pe *run border*.

Mr Speaker, menm nou servi zot prop *motto*, e nou dir zot annou koste pour en dyalog pou anmenn en kontribisyon dan lentere pei lo Komite *Platinum*. Zot dir ki zot lavwa pa pe ganny tande akoz zot prensip diktater in anzandre avek zot e zot krwar dan vyolans. Parey *LOTO* in fer referans avek lavantir *Robin Hood*. E sa i konfirman ki son Gouvernman i annan prensip *Robin Hood*!

Zot zis fer latak e vol byen lezot, parey Prezidan Rene ti servi fizi pou fer Koudeta e ki rezilta tro bokou Seselwa in morouswa disparet. La zot zalou Mrs Siana Bistoquet, zis akoz sa madanm i en madanm ki travay dir e fer son bann lenvestisman dan lentere Sesel.

**(APPLAUSE)**

**HON ANDY LABONTE**

Akoz ou osi ou pa al *invest* ou larzan dan en *building* e ou ava lwe avek ou bann konpatriyot. Ler nou dir zot annou travay ansanm, zot dir nou fer *lockdown*. Apre zot al imilye zot lekor lo televizyon zot dir ki zot pou aret koze. Mr Speaker, en *LOTO* ki'n fatige i vedir ki fodre i ganny ranplase par en lot. Prezan mon konpran akoz Dr Konntou, pe rod fason pou ranplas sa *LOTO* fatige, akoz i nepli anvi koze!

**(APPLAUSE)**

**HON ANDY LABONTE**

Mr Speaker, Onorab Waven William in eksplike byen kler sa bann sounboula. E Onorab Bistoquet in koz lo zourit. Me les mwan eksplike lekel sa bann zourit. Mon pa pou nonm zot non akoz pangar zot ava anpay mwan avek zot bann lapat ki'n

file partou kote dan Sesel. Me zot konnen lekel zot sa bann zourit. Akoz zot in anzandre partou kote, dan tou trou zot in antre. Tou biznes zot ladan. La nou bann zil, par ler ou a krwar i apel pour zot.

Me Seselwa pe note, nou lize i ouver. Vey zot zour zot bonnen i ganny devire!

**HON SEBASTIEN PILLAY**

*(Off-Mic)*

**MR SPEAKER**

Onorab Pillay silvouple.

**HON ANDY LABONTE**

Nou'n osi tann bann propagann bonmarse par Onorab Pillay, avek *scholarship* nou bann *ex-A Level student*. Kot pandan *weekend* enn zot bann kandida *MNA* ki ti ganny defet dan dernyen eleksyon, i vin dir nou tou laverite lo sa size *scholarship*.

Pep Seselwa pe demande, akoz sa *LOTO* i kontinyen rate lo semen? Fodre i retourn dan garaz e al sanz son bann pyes mal fonksyonnen.

Mr Speaker, permet mwan, avan ki mon terminen pou regard leta sa 4422 zabitan ki okip en siperfisi 1.7 kilomet kare ki zot apel li English River, Larivyer Anglez, oubyen *RA*. Me avan sa mon anvi dir avek Dr

Konntou, ki se mwan Andy Labonte ki'n ganny sa manda pou reprezant Zabitan Larivyer Anglez lo nivo Nasyonal.

***APPLAUSE)***

**HON ANDY LABONTE**

E se mwan menm ki osi reprezant li sa Dr Konntou. Kontan, pa kontan Dr Konntou, se mazorite zabitan Larivyer Anglez ki'n deside. E zot dir mwan dir Dr Konntou arete akte konmsi li ki pli gran koneser! E arete met dezord dan tou desizyon ki sa Gouvernman aktyel pe pran pou amelyor lavi nou zabitan e repar sa kales kase.

Zabitan Larivyer Anglez i anvii konnen lekel ki'n vot pou ou dan sa dernyen eleksyon, Akoz ou pa ti lo okenn *ballot paper*? Dr Konntou ou'n oubliye ki *logo* nou zoli lekol i dir nou, "pran nou responsabilite, persevere e nou avan raport sikse." E se egzakteman sa ki Minis Finans ek son Gouvernman pe dir.

Dr Konntou ou'n osi oubliye ki *logo* nou distrik I dir '*Aiming for the best*' ki kapab ganny enterprete koman 'Viz ver sa ki meyer'. Akoz Prezidan Ramkalawan ek son lekip ki pli meyer, e ou pa pou zanmen kapab tous son pti ledwa! Alors

four en lape dan ou nanm e donn nou bann zabitan en lape e les nou viz ver sa ki meyer pou nou, nou fanmir, nou distrik e nou pei.

Dr Konntou, la zabitan Larivyer Anglez i dir ou si ou ti vreman senser premyerman dir ou parti *US*, retourn sa 2 kare later V.8336 e V.8337 ki zot ti aste a mal a propo le 29 Fevriye 1996. Ki ankor de detrwa zour pou fer 24an depi ki zot in pran. E nou ava reganny nou Sant Sosyal pou nou kapab byen sosyalize apre ki nou'n ganny laviktwar lo *COVID*. E nou ava osi kapab konstri nou bazar pou nou peser.

E si ou vreman anvii travay pou nou distrik e nou pei, zabitan Larivyer Anglez i konsey ou Mr Dr Konntou, al rebran lanplwa avek Minister Lasante e donn en koudmen dan sa moman difisil. Akoz i paret mwan ou tro konn tou keksoz. Mr Konntou, avek tou ou lekspertiz, eski ou pa kapab envant en vaksen pou fer sa madanm ki pe fye dizef dan vant poul kapab fer sa poul ponn sa bann dizef, vreman kolore ki i pe reve?

Akoz pandan 43an zot pa'n kapab elimin drog dan Sesel. La prezan zot oule ki dan 100zour Prezidan Wavel pou fer mirak. Zabitan Larivyer Anglez

i demande ki'n arive avek sa madanm? Eski in ganase, akòz ler i ti *DA Larivyer Anglez* i pa ti koumsa. Eski son lakras in sorti anler e in bous son lizye ek son zorey?

Mr Speaker, sa distrik i en distrik kot environ 2612 zabitan i annan laz travay e ki merit pe fer en kontribisyon dan sa lekonomi. E ki anvi ki zot larzan taks i ganny byen zere me non pa gaspiye parey ladministrasyon avan ti fer.

Zabitan Larivyer Anglez i vremen apresye ki *SBC building* pe ganny rekonstri dan nou distrik, e nou swete ki i avan anmenn plis lanplwa. E bann lezot benefis ankor pou nou zabitan. Nou osi anvi ki sa Sant Lazenes i retourn pou lazenes Seselwa. Sa Stad Lanmizik nou anvi plis leksplikasyon lo la, akòz i en polisyon tapaz dan nou distrik.

Zabitan Larivyer Anglez i osi anvi konnen ki pe arive avek rekonstriksyon La Bastille, Ma Joie. Eski son lafas pou sanze, akòz i annan en valer vremen istorik pour nou distrik e nou pei? Zabitan i osi anvi ki sa non, Castor Road i ganny ranplase par Semen Larivyer Anglez. E sa non, Castor i a ganny anvoye petet pou en semen dan leo Union Vale, ou en proze konstriksyon lakaz lo en sit

apropriye. Akòz nou nepli en lesklav dan Sesel.

Pou bann dimoun ki pe esper en lakaz, mon anvi dir zot pour pasyante, akòz i annan en alokasyon R120milyon ki'n ganny mete dan Bidze 2021 e Larivyer Anglez osi i ladan. Mon osi apresye ki Lekol La Rosière in ganny en alokasyon 38 milyon pou son rekonstriksyon.

Mon anvi dir tou bann zabitan *English River Central*, Union Vale, Greenwich, La Rosiere, Ma Joie e Vilaz Quincy, ki malgre kontrent bidzeter mon pou fer mon mye posib ki bann pti proze parey semen, drenaz, *sewage*, netwayaz distrik e lezot ankor i ganny demare lo nivo distrik pandan sa lannen.

Mr Speaker, nou Prezidan in dir nou koz dan en fason fran e dir keksoz parey i ete, alors mon pou fer egzakteman sa. Minis, nou konpran ki in annan bokou labi dan le pase avek sa zafer larzan piblik, me mon pou dir ou sa ki mon zabitan pe santi. Annou retir labi dan *Welfare*, retir labi dan *part payment* pou lakaz, e retir labi dan *URS*. Me annou pa elimin sa bann lasistans konpletman silvouple.

Oubyen annou ranplas li par en lot fasilite appropriye. Akòz i annan dimoun ki vremen

dan bezwen dan mon distrik. Nou bann zabitan distrik i annan bokou laspirasyon ek vizyon pour nou distrik, malgre ki zot konpran ki dan sa moman difisil pa tou ki pou kapab ganny realize.

Me Mr Speaker, mon pou kontinyen ensiste ki ler ou ganny en responsabilite ou merit delivre, me mwan mon pa kapab aksepte ler serten bann PS oubyen serten zofisye dan Gouvernman, i fer mon zabitan fristre akoz sa zabitan oubyen sa biznessmenn pa'n zanmen siport zot. E zot menm al pli lwen e fer zot prop siporter tourn an ron. Apre pou met blanm lo ledon nouvo Gouvernman oubyen *MNA*.

Mon pe *warn* zot pou arete toudswit, enkli sa bann ki pe servi mon non pou fer bann akt malisye e pou ganny zot semen pase. Silvouple arete toudswit akoz, mwan mon determinen e mon pe vin travay pou tou zabitan san get kouler politik.

E mon osi anvi dir avek tou zabitan san leksepsyon, ki mon vremen mank zot. Parey zot konnen mon kontan koze e apresye ler mon rann zot en vizit. Malerezman avek *COVID* sa pa permet mwan parwaze dan kanton. Akoz nou lasante i nou responsabilite. Alors non bezwen donn legzanp e protez

nou kominote kont transmision *COVID-19*.

Mon osi mank mon parwas Katedral Imakile Konsepsyon avek tou parwasyen. Me tre byento mon pou pran mon dezyenm doz vaksen e zot pou war mwan devan zot laport. Me mon nimeron telefonn i reste touzour parey, si zot bezwen mon led, lasistans ou en konsey. Mon osi enform zot ki mon lofis i baze dan batiman Ladministrasyon Distrik Larivyèr Anglez.

Mon bann frer, ser e zanmi Larivyèr Anglez, Andy Labonte i la pou zot e fer tande zot lavwa. Pa les Dr Konntou ek son bann pa nonmen fer zot krwar ki se zot Bondye later.

### **Mr SPEAKER**

Onorab Labonte aret en moman. Aret en moman silvouple. Ou'n servi en term pou apel en dimoun ki mon ti a kontan ki Lasanble i tenir kont ki nou pa devret servi bann non pou adres lezot dimoun. Swa dan Lasanble oubyen an deor. Mon krwar ou'n fer li detrwa fwa, in ler pou arete.

### **HON ANDY LABONTE**

Mon ava arete Mr Speaker. Mersi.

### **MR SPEAKER**

Mersi.

**HON ANDY LABONTE**

Mr Speaker, pou terminen mon anv dir avek tou pep Seselwa annou les nou ganny gide par la spirityalite. Akoz i labaz en imen e vreman enportan. Fodre nou annan lanmour dan nou leker, determinasyon, sakrifis, travay dir e avek benediksyon Bondye papa tou pwisan, tou keksoz i posibil. Akoz zonn i fer bokou proze, me zis lavolonte Senyer ki ganny realize. Annou fer flote nou paviyon Sesel, akoz Sesel i pou tou son Zanfan! Mersi Mr Speaker.

**MR SPEAKER**

Wi Onorab Pillay?

**HON SEBASTIEN PILLAY**

Mersi Mr Speaker. Mr Speaker, mwan mon'n toleran e mon pa'n le enteronp Onorab. Me ou'n fer sa pwen ki ou'n fer. Mon ti a kontan ki, i pa fer premye fwa sa pe arive dan Lasanble. Si mon'n ekout byen bann diskour lo mon kote latab, napa personn parmi mon bann Manm ki fer referans spesifik a okenn lezot dimoun e dekrir zot dan okenn fason.

Ziska la, ziska la. Reste ou trankil Onorab! Reste ou trankil! Ou a ganny sans koze ou, reste trankil ou!

**MR SPEAKER**

En moman silvouple. Onorab Arissol mon'n war ou.

**HON SEBASTIEN PILLAY**

E napa personn ki'n fer referans, ler mon dir referans direk. Referans direk osi avek en lot Manm. Onorab in koze nou'n les li koze nou.

Semenn pase Onorab William i pa'n war lake, in war lake ek mwan. Napa problem sa. Me selman en keksoz ki enteresan Mr Speaker, ki mon ti a kontan atraver ou remind Onorab Labonte koman *MNA English River*, ti ava bon ou gete si napa kekfw maler dan ou distrik, avan ou tyonbo dimoun ou denigre.

**MR SPEAKER**

Lale Onorab Pillay ou'n fer ou pwen, silvouple.

**HON SEBASTIEN PILLAY**

Mersi Mr Speaker en.

**MR SPEAKER**

Ok permet mwan retourn lo sa size avan ou adrese. I en keksoz ki mon bezwen realize, se ki si en Manm i komans fer en remark, lezot i byen fasil pou zot pran ladan e repete. Oubyen al menm an plis ki sa Manm orizinal in fer.

Donk bann Manm i devret veye zot langaz e dan ka Onorab Labonte mon'n tann ou enn de fwa. Me selman mon en pe konsernen ki ou'n al plizyer fwa. E mon repet sa demann pou nou evite fer referans avek bann non derogatwar lo okenn dimoun.

An sa ki konsern adres en keksoz ki en manm in dir dan Lasanble, mon krwar sa i toutafe rezonnab. Si en Manm in dir en keksoz ki ou anvi opoze, ki ou anvi obzekte, i byen. me ou fer referans lo sa ki in dir, e ou les karakter personnel de kote.

Onorab Arissol ou anvi azout keksoz lo la silvouple? Me tenir kont ki mon'n donn en lopinyon lo la, e nou pa oule prolonz sa deba pli lontan. Wi.

### **HON SANDY ARISSOL**

Mersi Mr Speaker. Bonzour tou Manm. Bonzour tou dimoun a lekout. Mr Speaker, mon ti a kontan dir en keksoz anvi ki sa komanter in ganny fer lo enn mon Manm lo nou kote latab. E par Manm lot kote latab.

I enportan pou note pou dir semenn pase Onorab Rocky sorti La Digue ti fer referans avek 'araze', en mo ki Onorab Pillay ti raise en *point of order* letan Onorab William ti dir. *Ok?* E son Manm in repete. La

ozordi mon'n ganny dir poudir Onorab Andy Labonte pe fer referans direk avek en non, ki pa akseptab pou en lot dimoun an deor.

E pa bliye Mr Speaker, Onorab Lemiel avek Onorab Sebastien Pillay ki toultan raised en *point of order* in adres nou Prezidan koman *Robin Hood!*

*(Interruption)*

### **HON SANDY ARISSOL**

E la ozordi sa bann menm dimoun zot ganny lodas zot vin fer bann kalite komanter! Mersi bokou.

### **MR SPEAKER**

Mersi. Non, non, non, non, Onorab Pillay, Onorab Lemiel ase. Nou pou termin sa diskisyon.

### **HON SEBASTIEN PILLAY**

Mr Speaker, i drol ki en Onorab dan Lasanble i vin sit profet Zeremi. Ki profet Zeremi in koz lo liminite, lafanmir Dr Herminie in perdi enn son pros. Sa ki mon pe fer li konpran.

### **MR SPEAKER**

Onorab Pillay ou ava aret sa diskisyon silvouple. E mon pou repran sa size lo swa bann term ki'n ganny leve. E les mon dir

zot ki apre sa lensidan kot Onorab William ti servi en term ki Onorab Pillay ti obzekte lo la. nou ti rebran sa size dan ABC, e mwan mon ti dakor poudir nou bezwen gard en langaz ki pli o ki sa ki vreman pase an deor dan lari.

E bann *Leaders* dan Lasanble ti angaz zot sipor pou demann zot bann Manm pou evite servi sa bann term ki kapab vin kontrovers. E sa i osi aplik pou ou Onorab Waven William e osi pou Onorab Uranie. Onorab William nou pou aret sa size la aköz mon konnen ou anvi kontinyen avek sa deba. Mon krwar i pa neser. Mon'n donn en lopinyon lo la e nou ava aret la. nou ava apel Onorab John Hoareau.

### **HON JOHN HOAREAU**

Mersi Mr Speaker. Bonzour Minis ek ou *counterpart*. Bonzour tou dimoun dan lakour ki pe ekoute. En bonzour spesyal bann dimoun Beau Vallon. Bonzour tou bann Manm dan Lasanble.

Mr Speaker, i fer mwan en gran plezir pou reponn diskour Bidze 2021, aköz sa diskour i enn ki spesyal dan plizyer sans.

Premyerman i premye bidze ki Gouvernman formen

par LDS i prezante, parti ki mon apartenir.

Dezyenmman, i en Bidze ki'n ganny konsewar dan en moman pli difisil dan listwar nou pei, en moman kot reveni Gouvernman in desan preski en tyer par rapor avek lannen presedan swivan en lekonomi ralanti koze par pandemik COVID-19. Alor i en Bidze ki pe anmenn soulazman e redonn lespwar.

Trwazyenmman, i en Bidze ki pa parey bann Bidze oparavan dan le sans, ki i ki anmenn bokou solisyon pou bokou bann problem ki pei pe fer fas avek. I reprezant en nouvo vizyon sorti dan sa Manifesto ki kontra prensipal ki LDS ti fer ek sa pep ki'n elekte nou.

Katriyenmman, i en Bidze ki pe fer provizyon pou restriktirasyon nou sistenm sosyal kot led ek benefis pou ganny targete pou selman sa ki pli vilnerab e sa ki napa mwayen pou viv.

Senkyenmman, i en Bidze ki pe larg lanmen Sekter Prive ki moter nou lekonomi, an traver en pli bon *business taks deal* ki pou donn sa vre lespas e loportinite pou kre plis dyob e agrandi zot biznes de moman ki lavi i normalize. Parey LGB in dir en *starting block* pou nou

rekonmanse e fer pli byen ki avan.

An plis ki sa, anba nouvo Polisi lo *GOP* e lanplwa ki pe ganny met an mars i egzize ki Departman Lanplwa i fer bann prosedir '*skill matching.*' Pou ede met dimoun ki annan *skill* nesese dan lanplwa avan konsider etranze. En konsepsyon *Seychellois first.*

Sizyenmman i anmenn serten mezir osteriter pou koup diplikasyon e labi dan plizyer departman e servis piblik. Sa Bidze pa enn ki donn loportinite Gouvernman pou profit lo lafebles sa pep, pou donn ek lanmen dwat, e pran ek lanmen gos pou anbelir pos serten gros sef parey in le ka pandan sa 43an Gouvernman *SPPF/ Lepep/ US.*

Mr Speaker, mon ti a kapab fer mon diskour antyerman zis lo filozofi sa diskour Bidze, sitan i annan en gran oubyen en vre depar avek sa Polisi *welfare state* ki'n kree depandans lo lasistans Gouvernman depi ler ou ne ziska ler ou mor. Zis pou mentenir kontrol lo ou lavi.

I en vre depar ki pe redonn Seselwa son dignite, redinamiz lekonomi nou pei e fer nou pep re vin en pep travayan kot sak endividi i ganny loportinite egal pou kree son larises.

Mr Speaker, zis travay dir e travay ansanm ki pou permet sa vizyon ki Prezidan Ramkalawan i annan pou materialize. Mon garanti ki sa reform ki Prezidan Ramkalawan pe anmennen, pou war son rezilta byen vit e anmenn plis lazan dan pos tou Seselwa de moman nou ganny *herd immunity* e nou *border* i ouver konplet.

Se pou sela ki i enportan ki tou dimoun pran zot vaksin e enkilke bann nouvo fason fer dan nou lavi toulezour. Ler nou ganny R1 t anmas 25sou pou pli tar. Pa zanmen les parti *US* met zot retar. Mon le fer zot konnen ki tou sa bann Manm *US* ki ti *boycott* vaksen ti pas deryer e pran zot vaksin trankilman. Sa i enkli Hon Pillay ki *Leader* Lopoziyon.

In demontre ki i pa serye e ranpli avek negativite, ler i pa'n anvi donn en koudmen pou fer marse sa pei ler in taye pou kit Komite *Platinum.* Kot i ti'n ganny loportinite pou reprezant son pwennvi, pwennvi son parti e son bann siporter. En privez ki Prezidan Ramkalawan zanmen in gannyen avek son predesese ler i ti dan lopoziyon.

Mr Speaker, sa kalite lakours 100met, zis en *Robin Hood* kapon ki pou fer sa. Zis en

boug ki'n pri dan en politik kritike e opoze zis pou vi i opoze e pa zanmen war naryen ki bon pou li.

Mr Speaker, pou met en Bidze koumsa ansanm, i en travay tre difisil ler ou get lafason ki Gouvernman in gaspiy resours pei.

Alor mon le felisit Minis finans pou sa ki in anmenn devan nou. Menm si Lopozisyon pa oule zanmen aksepte, in annan en manev dezespere e mal kalkile par Prezidan Faure oparavan e Parti US, pou servi resours leta atraver bann desizyon popilis ki'n ganny fer zis avan eleksyon, pou esey atrap pouvwar ki ti pe degrengole dan zot lanmen, e sa in kout pei vreman ser.

Les mon a eksplike aköz mon pe dir sa. Pep Seselwa i bezwen konpran sa tre byen, pou zot konpran aköz kof i vid. E pou zot pa anval sa labwet ki Onorab Pillay in anonse ki'n dir Gouvernman pe koup tou benefis *welfare*.

A en pwen, Mr Faure ti pe blanm tou keksoz ki ti pe mars mal lo COVID, san rod okenn solisyon reel. Alor dan en leta panik, in pran desizyon pou met plizyer *Scheme* an plas zis pou donn larzan e depans plis larzan ki posib dan en fason irresponsab.

Parey FA4JR ler ti konmanse ti donn lapey tre o pou tou bann travayer etranze konman Seselwa. Pou nenport ki biznes tel ki biznes *take-away*, *hair dressing saloon*, lakonpanyen konstriksyon e lezot ankor, menm si zot ti pe kontinyen ouver zot laport pou biznes pandan sa letan.

Tandis ki a menm moman bann gran lekonomi dan lemond parey Lanmerik, Emirat Arab Ini ti pe donn Selman lanmwatye saler koman sibvansyon pou zis travayer dan zot Gouvernman.

Desizyon pou redwir 25 poursan lo *loan HFC* pou tou dimoun, ti osi en soulazman ki pa ganny targete pou zis bann ki ti dan bezwen.

En sel kou angran URS, in ogmant lakantite dimoun dan lanplwa, menm si Gouvernman pa ti bezwen plis mendev. Mon konn dimoun ki lo URS ki ti vin asize kot Ladministrasyon Distrik e ti pe ganny en saler. Lazans Proteksyon Sosyal ti pe osi ogmant lakantite dimoun lo *part rental* olye selman bann ki ti dan bezwen. Ou a krwar tiyo ti pe zis over san en kontrol e ti annan lafet dan *tax payers money*.

Mr Speaker, ler ou depans plis ki ou ranmase definitivman ou bezwen al prete. Tousala in

plonz pei dann plis e plis det. Kot *debt to GDP ratio* pandan sa dernyen lannen ki Mr Faure ti dan lofis in sorti 55poursan pou al 99.9 poursan.

Kontan, pa kontan, sote, pile, se sa ki'n fer Prezidan Ramkalawan dir ki in erit en kales kase e en kof vid. Si lopoziyon pa konpran sa, ki sitan senp mon pa konnen ki annan dan zot latet. Swa zot in ganny andoye.

Mr Speaker, mon byen akeyir lanons ki Gouvernman in angaz li an partenarya avek sektor prive pou konstri en Lekol Ekselans. Mr Speaker dan sa Lasanble, mon'n toultan poz serten kekyon fondamantal lo nou sistenm ledikasyon.

Eski Gouvernman pe fer zistis sa gro depans Bidze anyel ki ozordi in ariv R1.043 bilyon? Eski bann zanfan pe ganny valer pou sa ki Gouvernman pe depanse? Eski pei pe ganny valer pou lenvestisman dan ledikasyon?

Si nou fer en pti analiz lo lakantite larzan ki Gouvernman i depanse pou nou sistenm ledikasyon e lakantite zanfan ki dan lekol Leta, an gro nou a war ki Gouvernman pe depans environ R45mil par lannen pou sak zanfan.

Ler ou konpar sa sif avek lakantite ki en paran i peye pou

ledikasyon dan lekol prive, an mwayen i tonm preski parey. Menm si mon pa pe get lezot depans ki ganny asosye avek sistenm zesyon en sistenm ledikasyon antye, mon kapab tonm lo konklizyon ki nivo reisit, pa montre valer pou larzan.

Zis pou donn en legzanp dan lekol Endepandan, tou etidyan i asiz omwen 7 *IGCSE's* dan S5, tandis ki lekol Leta pa tou zanfan ki fini S5 ki fer *IGCSE*. E bann ki pran sa legzanmen i fer zis 3 legzanmen an mwayenn.

Ler ou get rezilta akademik pli move. Sa lannen etidyan dan lekol Leta in perform a 69 poursan grad C and *above* dan *A levels*. Tands ki lekol prive in ariv ziska 94 poursan. Dan *IGCSE*, lekol Leta in perform a 38.9 poursan grad C e pli o, tandis ki lekol Endepandan ti lo 86.3 poursan. An konklizyon sa i montre en gran disparite ki par fer zistis sa lenvestisman.

Mr Speaker, konsep en Lekol Ekselans i en ki kapab ganny gete koman a *special needs school*. I reponn a bezwen spesyal pou en kategori zanfan ki *gifted and talented*. Dan la menm fason ki i annan provision spesyal pou bann zanfan avek dezabilite, ki zot

bann bezwen pa ganny zwen dan lekol *mainstream*.

Sa bann lekol i egziste dan bokou pei otour lemonn pou kree konpetisyon e ogmant nivo performans dan ledikasyon. En Lekol Ekselans I anliny avek demokratizasyon ledikasyon. Vizyon Prezidan Ramkalawan se ki larzan pa devret zanmen vin en faktor pou anpes en zanfan ariv pli o posib dan devlopman son ledikasyon.

Alor zanfan Seselwa ki napa le mwayen pou al dan lekol prive, i bezwen ganny loportinite pou ganny ankadreman pli o nivo posib, si i fer bokou zefor e si i annan lentelizans.

Mr Speaker, i fer ou lapenn parfwa ler ou war zanfan ki annan bokou potansyel dan lekol Leta ki perdi aköz senpleman problemn disiplin e sa latmosfer ki zot pe etidye ladan pa ede dan zot laprantisaz.

En Lekol Ekselans pou alor reponn a sa bezwen. An dizan sa, fodre pa ki leres lekol dan distrik i ganny neglize. Fodre ki konpetisyon e lanvi fer byen i vin sa nouvo normal.

Mr Speaker, Minis in osi fer resorti, e in fer en lapel pou bann lantrepriz prive pou ede donn *scholarships* bann etidyan ki fini zot letid *A Levels*.

Ankor nou bezwen realize ki devlopman mendev i en responsabilite partaze sirtou ki Gouvernman pa kapab abzorb tou bann *returning graduates*. En bon pe i bezwen pran lanplwa dan sekter prive. Alor i toutafe normal ki Sekter Prive i pran menm linisyativ ki *SEYPEC*, *Central Bank* e lezot i fer pou ede develop mendev atraver *scholarships* e *skills transfer* anba bann *Apprenticeship Schemes*. oubyen adopte serten pos segonder avek flyer vokasyonnel e ed zot.

Letid in montre ki ler en lantrepriz i investi dan son mendev, i annan tandans pou sa travayer develop plis lwayote anver li.

Mr Speaker, Minis in fer resorti ki nou Lendistri Tourizm i reste en pilye enportan dan nou lekonomi. In osi fer resorti ki nou prodwi touristik i devret amelyore, pou pran kont nou kiltir, nou leritaz, nou sport notik, nou lakwizin, bann lavantir, e lwazir ki permet touris depans plis larzan.

Sa konsep i fantastik. O sant tousala, se nou lanvironnman e nou dimoun. Lanvironnman, tourizm e nou pep, i trwa mayon enseparab dan sa biznes. Fodre ki Seselwa i reste touzour en pep akeyan e

nou lanvironnman reste touzour prop.

Mr Speaker, lo kote lanvironnman, mon ti a voudre ki Gouvernman i met plis resours e lanfaz lo amenazman nou lafore. Ler mon get nou lafore ki pe vitman perdi son biodiversite avek bann lespes anvaisan ki nou apel gro lalyann, i fer mwan bokou lapenn.

Fodre pa oublie ki touris i apresye e depans bokou dan en ekskirsyon avantirye kot zot dekouver nou biodiversite. Mr Speaker, nou lafore i osi nou sours delo potab, alor i annan bokou rezon pou Gouvernman vin ek serten proze pou kontrol sa bann lalyann.

Mon konnen ki bann NGOs pe ede dan sa domenn avek fon ki sorti kot *GEF*. Me zefor pa ase. Onorab Georges in deza koz lo sa size avek bokou pasyon. In arive ler ki i annan en Lezislasyon ki angaz tou propriyeter an traver serten linisyativ Gouvernman, pou amenaz zot propriyete e retir lalyann anvaisan.

Pou sa demars vin soutenab, nou osi bezwen en *community-based approach*. Nou bezwen kapab fer sa travay avek en program kot nou angaz bann zenn etidyan, nou bann zenn ki pa dan lanplwa.

Oubyen nou bann zenn ki lo labi sibstans e rod serten siport avek kominote biznes sirtou bann letablisman touristik. Pou donn serten soutyen pou adres sa problem.

Parey tou dimoun i konnen, mon distrik Beau Vallon i enn ki son zabitan i viv atraver aktivite touristik. E la mon santi mwan konsernen avek proze Bazar Labrin ki ti pe ganny antreprann par *SSI*. Atraver diskisyon avek *ex-President* Faure mon'n reisi fer sa propriyete retonm dan lanmen Leta. Atraver diskisyon ek *SSI*, mon'n met a lavan azanda Beau Vallon.

Devlopman sa propriyete ti pou konmanse sa lannen. Nou'n ti'n tonm dakor lo konteni sa devlopman. Ki ti pou enkli twalet piblik, plizyer *kiosk* pou vann manze e lartizana, landrwa pou en lapos, en pos Lapolis, en nouvo *indoor sport center*, plis *parking*, laboutik e en zarden piblik.

Ti menm annan en lenvestiser ki ti'n fer serten letid e ti pare pou met anmars en *cable car station* pou transpor dimoun Victoria. Avek restriktirasyon, mon panse ki sa bann proze pou aprezan tonm anba diferan Minister.

Toudswit mon pe lans en lapel avek Gouvernman atraver

Minis Finans, pou inisye en konmite pou antreprann diskisyon lo kontinyasyon sa proze. Parey mon'n dir dan mon repons Leta Lanasyon, ki nou bezwen pran swen avek sa poul ki ponn dizef lor. Beau Vallon i anmenn en kontribisyon enportan dan lekonomi Sesel.

Beau Vallon i bezwen sa devlopman aköz i pou kontribye pou met lasyet manze lo latab bokou dimoun. I pou osi ede donn touris en leksperyans nou kiltir e nou lakwizin.

Mr Speaker, Minis in anonse ki priyorite nou Gouvernman, se pou lalit kont koripsyon e labi. E sa pou ganny fer atraver bon governans. Koripsyon i sa mons pli menasan pou nou lekonomi. I anmenn lamizer lo en pep me gran larises pou en de dimoun. I en mons ki nou bezwen koup son likou a tou pri.

Lendeks koripsyon i en mezir lo bonn governans e la transparans. I donn en persepsyon lo leta e repitasyon en Nasyon. Abilite nou pei pou atir lenvestiser e led sorti kot bann Baryer de Fon e kominote enternasyonal, i souvandfwa depan lo la. Nou bezwen amelyor nou lendeks koripsyon pou donn garanti ki rule of law i ganny pratike e okenn led ki

ganny donner pou ganny byen zere anliny avek Lalwa pei.

Mr Speaker, malerezman koripsyon i en gro problem dan nou pei. Par egzanp laranzman distribisyon later *land bank* i ganny fer, zis serten ki pik bi. Tandis ki lezot ti ganny en komitman pou ganny en kare. Sa i montre en pwa de mezir e i anvoy en loder koripsyon.

Nou Gouvernman in ganny akize ki i pe fer lenvers ki *Robin Hood* ti fer, konmsi se *US* ki sa ki *Robin Hood*. La mon le demand Onorab Pillay an traver ou Mr Speaker, kote *Robin Hood* ti ete letan sa lenzistis ti pe ganny fer?

Ler sa fame \$50 milyon ti disparet kote *Robin Hood* ti ete? Ler bann Irlande ti depans plis ki R350 milyon larzan *taxpayers* dan *FIU* ti napa bon *accountability* e latransparans, Kote *Robin Hood* ti ete? Ler Sef *SBFA* ti fer disparet plis ki R80 milyon, kote *Robin Hood* ti ete? Ler plizyer milyon in perdi an traver move zesyon *SMB Prawn Farm*, Biznes Parti *US* ki pa'n pey plis ki R34milyon taks e bokou plis ankor. Kote *Robin Hood* ti ete?

Tousala se koripsyon ki'n pase anba Gouvernman *US* kot zot in vol poor *taxpayer's money* pou met dan *the riches pocket*. Ozordi zour Onorab Pillay i vin

dir nou ki Gouvernman formen par *LDS* ki annan zis 3 mwan pe vol le mizerab. Mon krwar ki sa Onorab i bezwen fer en bon evalyasyon mantal.

Mr Speaker, mon le profite pou demande ki Minister Later, i fer en lenvestigasyon lo alokasyon later ki'n ganny fer sa lannen, pou rod lazistis pou bann ki pe esper en morso later *vitam aeternam*.

Mr Speaker, Gouvernman reprezante par Minis Finans in anonse ki R120milyon anba *capital projects* pou ganny investi dan devlopman lakaz. Mon pe renouvle mon pledwari ki Beau Vallon i form parti sa bann distrik ki pou benefisye. La mon le pous devan dezyenm faz proze redevlopman bann vye flat *Société du Logement* Paskal Vilaz.

Mr Speaker, lalit sa Gouvernman kont drog i enn ki'n pran en gran lelan depi ki Ladministrasyon Prezidan Ramkalawan in konmanse. Mon pou donn mon sipor total pou ki *POCCA* i ganny servi pli souvan a sak fwa ki i annan en konviksyon narkotik, pou sezi bann byen Malaki sa bann trafiker. Sirtou ki la Gouvernman pe war li difisil pou finans tretman apropiye pou bann viktim drog. Se sa sel fason pou rann sa biznes

irelevan e ki al fin nou zenn i a ganny libere.

Mr Speaker, serten manm lafors Lapolis i bezwen osi pran zot travay pli serye. Dan mon distrik i annan en biznes Guesthouse ki apel Palmont, ki tou le *weekend* pe ganny servi pou bann gro parti kot serten sa bann eskobar i frekante. Zot lanmizik e tapaz i deranz la kominote menm si restriksyon lo lasante sever lo rasanbleman i an plas.

Mr Speaker, malgre plizyer fwa Lapolis in ganny met okouran, zot zis fer desann *volume* e en pti moman pli tar lafet i kontinyen. Mr Speaker, bann zabitan in fatige telefonn Lapolis. Zot in menm ekri petisyon.

Mr Speaker, mon espere ki lotorite konsernen, i a fer le neserer pou donn sans sa bann dimoun ki'n travay dir pandan lazournen dan nou kominote, pou ganny en repo byen merite aswar.

Mr Speaker, problemn koneksyon bann lakour avek *sewage treatment plant* i reste en gro defi dan mon distrik. Dan rezyon lo lanmar i en landrwa kot nivo delo i o. Tou bann zabitan pe ganny problemn *septic tank*. Fodre fer remarke ki sa problemn koneksyon avek *central sewage*

*system* pe met bokou retar lo devlopman ki plizyer rezidan ti a kontan fer. E sirtou bann pti proze ki annan pou fer avek touris e rezidansyel.

Alor mon pe demande ki *PUC* i met resours nesaser pou rezourd sa problem en fwa pou tou.

Mr Speaker, an konklizyon mon le fer remarke ki sa Bidze i en ki'n byen ganny planifye malgre bann defi ki pei pe fer fas avek. I enn ki montre rezilyans e met an plas striktir pou redinamiz nou lekonomi e etabli semen progre.

Deza nou'n konmans war laprev rezilyans kot Andy, lo La Digue ki pe ekri liv kartoun pou sey ganny en lot soutyen. En zenn fiy ankor ki pe fer konfitir aköz lavant in tonbe dan son laboutik artisanal. Praslin, en msye pe konsantre dan fer salezon aköz son louvraz in ganny afekte. Mon le dir zot tou felisitasyon e pou pran sa bann linisyativ e kontinyen, bon kouraz.

Mon konnen ki pri lavi i reste en defi enportan pou nou pep fer fas avek. Konman Manm elekte mon pou kontinyelman siport bann reform ki Minis pe anmennen ki pe ganny konsevwar kot *STC* pou redwi pri komodite. E osi

bann reform pou *STC* ranmas plis reveni.

Sirtou zefor ki pe ganny fer pou ankouraz sekte enformel pou vin formel e kontribye an ver taks e devlopman pei. Mon osi konvenki ki ler nou pei pou reouver son laport pou biznes lavi pou amelyore pou nou tou.

Ansanm avek zot sipor, sa nouvo ladministrasyon pou delivre lo son promes. Annou kontinyen reste solid e pa les tonbe. Ki Bondye i kontinyen devid son lagras lo nou pep. Mersi.

### **MR SPEAKER**

Mersi Onorab Hoareau. Onorab William silvouple kominik avek mwan dan *break* lo kisisa ou anvi adres Lasanble, e mon a konsidere. Nou a pran en poz la e nou a rebran 11.15. Mersi.

***(BREAK)***

### **MR SPEAKER**

Mersi Onorab William pou sed laparol. Onorab William ti anvi eksplike ki Onorab Pillay, in mal servi en term ki li i ti servi. E mon'n demann li an konsiderasyon letan pou nou les tonbe sa size. Mon a zis repete pou dir a lavenir annou envit bann non barok oubyen

derogatwar e nou evit bann parol ki zot konn i kapab kontrovers. Mersi. Nou a kontinyen avek Onorab Gabriel.

**HON CONRAD GABRIEL**

Mersi Mr Speaker.

**HON CONRAD GABRIEL**

Mersi Mr Speaker. Bonzour bann Onorab, bonzour tou dimoun ki a lekout, spesyalman zabitan Pointe Larue.

Mr Speaker, dabor mon oule senserman senpatiz ek bann fanmir Seselwa ki'n perdi en manm zot fanmir atraver sa maladi ki pe kontinyen ravaz nou pti pei Sesel. Sa se pa lot ki COVID-19, e mon distrik Pointe Larue pa'n ganny eparyen.

Mr Speaker dimoun napa larzan. Fanmir napa larzan. Lanterman i kout ser. Mon demann Gouvernman pou ed sa bann fanmir atraver sa *COVID Relief Fund* sirtou bann ki pli vilnerab dan nou sosyete. En Bidze plis ki R11bilyon ki anmenn avek li plis lensertitid e kree bokou konfizyon parmi nou popilasyon, e pe fer nou viv lo petet, Seselwa pa'n abitye viv lo petet. I mank bokou sibstans dan sa Bidze ki Minis pa'n tous ditou e mon pou fer li mon devwar pou ed sa Gouvernman

e met lalimyer lo serten pwen pertinan.

Mr Speaker, Minis in dir nou fodre annan *a change of mindset*, e Leta pa responsab pou okip ou, ou devret ed ou lekor. Nou konnen resours in redwir e nou pe anmas mwens reveni. An menm tan nou pe vwar ki sa Bidze pe tir larzan dan pos bann Seselwa, an dot mo malere e met dan pos gro gro biznesmenn. I kler ki Sesel pe al ganny *run* parey en biznes. Legzanp i la e tre byento zot pou trouve ki mon pe sey dir. *The rich will indeed get richer, and the poor will get poorer.*

Minis pa kapab dir nou ki Minister Finans pa pou kapab soutenir tou sa fardo. In dir klerman ki zot priyorite se redwir defi fiskal, redwir labi e tir lasistans sosyal. Be Mr. Speaker, mon dakor, be lekel ki pou pran sa fardo ler tou sa sanzman in arive? Malere? Zabitan Pointe Larue?

An tou leka mwan mon pou ede, akoz mon annan en leker pou tou mon zabitan e tou Seselwa. Mon'n pas en peryod tou mon lavi dan distrik Anse Aux Pins koni koman Kan Poul, e ozordi mon vwar mon pe viv Pointe Larue Nageons Estate byen koni konman Kan Pizon.

Sa in fer mon tre for e mon pou reste solide ek mon bann

zabitan akoz mon konnen kisisa mizer. Akoz mon'n ne dan mizer, kontrerman avek bann ki pe zis koz lo lamizer, konmsi en teori ekonomik dan en liv liniversite.

Mr Speaker, Minis in mansyonn serten bann proze kapital dan bann distrik ki pe al konmanse oubyen pe kontinyen. I malere ki Minis pa'n dir naryen lo sa proze drenaz kot *Airport*. Pou lemoman nou'n ganny selman en rigol tanporer ki'n konplete e i reste ankor bokou travay pou fer. Silvouple, zabitan mon distrik pe demann bokou kestyon.

Nou'n tann bokou lo sa proze Anse La Mouche kot pou annan devlopman lotel e osi en nouvo semen ki pe al ganny konstri. Mon ti sirprann e etonnen pou vwar Prezidan larepublik pe lager lebra kase pou defann sa proze. Minis zabitan mon distrik pe demann Gouvernman pou akseler sa proze drenaz Pointe Larue. Minis Derjacques in deza fini pronons son lekor lo sa proze depi lannen pase.

Sa in en vye problem ki lontan nou pe esper en vre solisyon. Diferan letid in ganny fer e ziska prezan napa naryen konkret ki'n finalize. Mon'n ne mon zwenn sa problem e mon

pou fer sir ki pandan sa manda 5 an, mon pou fer mon mye pou rezourd li.

I enportan fer remarke ki sa i pa zis problem Pointe Larue, me tou dimoun ki servi sa semen. Aksidan in arive e in menn annan dimoun ki'n pres pou perdi lavi. Silvouple annou tret sa proze koman en priyorite.

Mr Speaker, dan sa Bidze en gran loportinite in manke. Napa en mo ki'n koz lo ki mannyer nou prepar lazenes pour le fitir. Pandan sa letan *COVID* e apre *COVID*. Minis par egzant ledikasyon, si ou regard sa zenerasyon zenn ki dan lekol, zot pou soufer e zot deza pe soufer.

Depi lannen pase ziska la, zot preski pa pe fer naryen an term akimilasyon konesans akademik. Ki sa pou vedir, savedir si nou pa fer atansyon i pou annan en letan dan devlopman nou pei, kot ou pou annan en gran gap.

En bon group ou bann zenn ki'n swiv kour aletranze e ki'n *graduate* pou ranpli bann pozisyon pa pou arive. E sa pou fer ki i annan en *brain drain* dan bokou sekter nou pei ki pou enpakte bokou lo nou lekonomi.

An plis ki sa, ki sa Bidze pa pe fer? Se i pa pe fer

provizyon pou met bokou lanfaz lo sa ki nou apel ledikasyon vertyel, ki bann etidyan ki dan lakour i kapab kontinyen avek zot letid. Me o kontrer Minister in anvoy *syllabus* bann etidyan e bann ki pli feb pa pe kapab swiv.

Mon sizere ki Minister i revwar kalandriye pou vakans, pou asire ki bann etidyan i kapab kouver zot bann letan perdi.

Minis, Gouvernman i devret antre dan kominikasyon ek negosyasyon vitman e direk avek bann *service providers* notaman *Airtel* ek *Cable & Wireless*. Kree bann *package* spesyal, e fer rediksyon *internet* pou bann etidyan. Sa i a tir en bon pe presyon lo bann paran, ki de zour an zour pe vwar li vremen difisil pou fer de bout zwenn.

Minis parey nou tande resaman ki lekol Beau Vallon in devlop en *Mobile application* pou kapab donn leson zot bann etidyan. Nou tou nou apresye sa linisyativ. E mon ti a kontan felisit zot.

Sa i en keksoz ki Minister Ledikasyon ti devret ankouraze e fer o pli vit posib pou akseler nivo laprantisaz dan lezot lekol.

Dezyenmman, ki Gouvernman pe fer an term bann lezot initiative e proze pou

garanti ki lazenes Seselwa i ganny en pon pou li kapab traverse?

Regarde, bokou bann zenn ki'n *graduate* e ki'n konplet zot letid en bon pe zot in retournen, Gouvernman ki pe dir ek zot *ok* dezormen ou pa pou kapab al fer sa ki ou'n ganny *train* pou fer, ou pou bezwen *retrain e al teach*

Sa ki zot pa pe pran kont, se ki par retir sa bann zenn dan sa bann profesyon ki zot in *train*, demen ou riske annan en sitasyon dan pei kot ou pour vwar plis etranze pe ranpli bann pozisyon kle dan nou bann sekter.

Mr Speaker, kestyon ki nou pe demande se ki pou arive avek nou bann profesyonnel ki pa pe ganny sans ofer en lot swa apart ki al fer lekol?

Nou'n trouve dan le pase kot in annan bokou ansenyan avek bokou fristrasyon e la nou pou vwar ankor bann ansenyan fristre, mekontan e dezapwente.

Sa lof pour al fer lekol en bon linisyativ pou bann etidyan ki anvi al dan sa domenn, me nou devret asire ki nou bann profesyonnel i annan pli gran opsyon an term louvraz e sa i avar fer ki zot a kapab akonpli zot rev.

Mr Speaker, se ki Gouvernman i merit fer se

ankouraz en programm byen striktire pou ankadre nou bann zenn profesyonnel dan bann sektè kle nou lekonomi e sa i a fer ki malgre ki nou ava annan serten defayans dan pei lo nivo sekirite lanplwa pou nou Seselwa ava pli garanti.

Minister Lanplwa i merit organiz en programm pou asire ki sa i arive.

Mr Speaker, i kler ki lentansyon sa nouvo ladministrasyon se pou retir bann programm ki ladministrasyon oparavan in met an plas.

E sa i fer ki pandan sa letan lensertitid dan plas konstrir lo bann proze ki deza pe marse, nou pe vwar ki resours ki Minis li menm in dir i limite pe ganny malzere e partaze e sa pe fer ki sa bann proze e aktivite pa pe ganny byen enplimante.

Mr Speaker, lo nivo sosyal letan mon pe regard dan mon distrik, i esansyelman bann *single mothers*, oubyen bann *household* ki ganny *head* par en dimoun ki pou pli ganny afekte avek sa Bidze.

Lamazorite *household* i ganny *head* par bann madanm. Sa bann dimoun pe benefisyè ek saler atraver program ki Gouvernman ti'n met an plas.

Alors ki mon pe sey fer resorti se ki mon santi ki mon distrik pou vreman ganny afekte avek sa bann sanzman ki pe arive. Poursantaz zabitan Pointe Larue ki zot reveni i depan lo sa bann program sosyal ki Gouvernman ti'n met an plas, i bokou Mr Speaker.

Mazinen ki ler sa pou arive, pou definitivman annan son konsekans sosyal. Nou pou vwar en logmantasyon dan bann fleo sosyal tel ki drog, vol, lalkol e prostitisyon.

Mwan mon santi mwan konsernen, akoz lazenes sa landrwa, si nou pa fer atansyon ki mannyer nou fer sa bann sanzman drastik, i pou otomatikman annan lefe direk lo paran, e pli gro difikilte e defi, pou ganny santi par sa bann zenn e bann zanfan. Nou pou annan en zenerasyon ki pou pe viv dan en sityasyon kot zot in ganny deprive sosyalman.

Minis annou annan en leker imen ek konpasyon, pou sa ki pli fay dan nou sosyete. Tou sosyete i annan, e pou toultan annan bann ki pli fay, kot lasosyete pou bezwen ede *no matter what*.

Konbyen Seselwa ki'n viv lo dol Langleter? Konbyen ki depan lo *Soup Kitchen L'Amerique* Mon pa swete

annan *food banks* dan Sesel en zour. *Only time will tell.*

Minis zanmen in lentansyon zabitan mon distrik pou reste depandan lo *welfare* tou zot lavi. Mazorite zabitan Pointe Larue pe travay avek lafyerte pou sonny zot fanmir manner zot kapab.

Mon'n analize ki dan detrwa lannen ki pe vini, si nou pa fer atansyon, nou pou annan en sityasyon sosyal serye dan nou pei e pou reflekte atraver mazorite nou bann distrik lo Mahé, Praslin e La Digue.

Sa Gouvernman i devret al pli lwen rod bann *expert* dan *social studies*. Akoz ler ou pe pran serten desizyon, i annan keksoz ki ou devret pran an konsiderasyon. Pou le moman zot pe fer li pirman an regardan selman son laspe ekonomik, san realize ki sa i pou enpakte lo en zenerasyon lazenes pou bann lannen lavenir.

Paran pou nepli kapab anmenn sa kantite larzan kot lakour. Bokou pou napa lanplwa, e deza nou annan en sityasyon kot bokou papa pa oule pran responsabilite an term responsabilite kot lakour. E sa problem pa zis dan mon distrik. Sa i konsern pei antye e tou sa *MNA* ki la i konn sa tre byen.

Nou deza annan en sityasyon kot bokou zanfan i lo *Dedicated Funds*. Gouvernman i bezwen prepar li pou redres sa anomali an term bann program ki pe ganny retire, e lasistans ki pe ganny koupe. Akoz son lenpak pa pou dire zis pou detrwa mwan, i pou mark en zenerasyon bann zenn osi byen ki lasosyete pou soufer dan le fitir.

Minis, ou Gouvernman pa pe fer analiz Bidze lo pwennvi makro ekonomik pou vwar son lefe. Zot pe zis pran en desizyon vitman san fer bann analiz profon. In prouve parfwa nou imen nou fer serten desizyon ki pa rasyonnel, mal plase e byensir mal kalkile.

I kler ki sa Gouvernman *LDS* in vin alerzik avek sa mo *welfare*, avek sa konsep lasistans sosyal, e sa in ganny defini atraver lapros e direksyon sa Bidze. Mon swete ki lapros sa Gouvernman *LDS* i vin enn ki vin pli progressive e non pa regresif. Akoz nou'n fer bokou akonplisman bokou, bokou pandan sa dernyen 43an kontrerman avek sa ki zot pe sey fer nou krwar.

Minis, nou pe koz koup travayer etranze wi, be selman letan nou pe koz *investment* dan *dry dock*, servis bato ton, be la ou bezwen en bon poursantaz *technical*

*staff*, akòz *dry dock* i non selman netway deor, i enkli son *servicing*, bann lekipman abor sa bato, son sofistikasyon, son radar, son sistenm *SONA* e lezot ankor. Pa oubliy son *waste material*, son *harzardous material* e tou bann lezot polisyon ki pou bezwen *special handling and disposal*.

Mr Speaker i vre nou dan en moman difisil, kot wi nou bezwen serten mezir pou nou ede redres lekonomi fas a sa pandemik. Me nou bezwen port atansyon letan nou pe fer sa. Nou bezwen kalkile ki mannyer sa Bidze i tous tou kous nou popilasyon.

Par egzanp en madanm i travay *carer* e i tous li R3500, e i annan 3 zanfan. Tou le 3 i lekòl, i annan li en *loan* lakaz pou kontinyen peye e bokou lezot depans. Zot pa pe realiz tousala pou lemoman. Annou pran kont ki i pou anmenn en nivo lapovrete Sesel ki riske desot 50poursan. Annou pa zanmen oubliye ki sak imen i annan son *self-esteem* e nou bezwen tret zot avek dignite ek respe.

Minis *FA4JR*, ler kriter ti ganny etabli pou gete lekel biznes ki merit kalifye, *LDS* ki ti Lopozisyon sa letan, ti kriye e ti dir donn tou. Ladministrasyon avan in fer sa ki ti annan pou

fer, ed bann travayer ganny en saler e ed bann biznes.

Minis biznes pou bezwen ankor sipor apre Mars 2021, si ou pa oule vwar travayer ganny met deor ler biznes i konmans fermen, zis asire ki sa ki vremen dan bezwen ki ganny asiste. Fer en bon *assessment* avan ler partaz sa pti bout gato.

*Sports*, en landrwa kot nou devret pe konsantre *maximum* lenerzi pou ede dan sa lalit kont bann fleo sosyal ki egziste, dan nou pei. Si ou pe koz lo lazenes nou pa pou kapab separ sa de bout prensipal ledikasyon ek *sports*.

Dan mon distrik i annan 2 tim foutbol St John Bosco, Bazar *Brothers*. I annan 2 tim *handball APC Sisters, PTL Boys*, i annan 2 tim *basketball*, enn pou garson ek enn fiy e sa i konpri manrmay segonder.

Vi ki lekòl segonder pou rezyon les, i trouve dan mon distrik, mon a profit lokazyon pou demann korporasyon bann Onorab rezyon les pou aport zot soutyen, spesyalman Onorab Samynadin ki'n deza en *teacher* pou lalang *Français* kot lekòl segonder.

Nou pe al ouver laport pou lezot disiplin sportif, ki bann zenn ti a kontan tel parey *volleyball*. Tou sa demars se pou ed sa Gouvernman akonpli

rev sa bann zenn e anmenn en nivo kanmaradri, respe, tolerans e disiplin.

Sa lide kennsel CSR *Corporate Social Responsibility* taks pou fer ki bokou lekip sportif i riske soufer. Mon senserman krwar ki sa size ti devret ganny byen diskite avan kennsel li net. Nou bezwen fer en transformasyon konpreansiv kot spor i konsernen.

Mon dakor ek Minis ler i dir nou bezwen batir en Nasyon kot pep i pran *full responsibility*, revwar fason ki nou zer nou depans, e *think outside the box*. Be Minis ki mannyer nou pou *achieve* sa, si zis politisyen ki pe pran desizyon san menm fer konsiltasyon? I annan en *saying* ki dir *“nothing for us without us.”*

Bidze pou spor bezwen ganny diskite avek dimoun ki responsab bann lekip, e bann ankadre ki pare pou ed nou pei bouz pli devan e devlop nou bann zenn talan.

Mon swete ki avek sa reform ki pe arive kot Konsey Nasyonal pou spor, keksoz ava bouze aköz si non, nou pou vwar konsekans sa desizyon dan nou prosen Zwe De Zil.

Minis, avan mon terminen, i annan en msye dan leo Nageons Estate ki ti pe travay La Misère pandan ki sa

sityasyon delo pa nonmen ti arive.

Onorab William i konn sa zistwar tre byen. Vi ki ti lager for dan sa Lasanble pou bann dimoun ganny zot pti mwenza. Sa msye ti sipoze lo lalis pou ganny son konpansasyon apre tou sa lannen espere, be apre ki ou’n anonse ki sa pa pe materyalize sa lannen, i ti a voudre vwar ou personnelman pou diskite son *case*, e i santi ki in ganny viktimize. Mon panse ki koman en Onorab i mon devwar pou fer tande lavwa mon bann zabitan.

Lo sa not mon ti a kontan envit Onorab Bistoquet pou zwenn mon e ansanm nou a ed nou zabitan, ki bezwen nou sipor plis ki zanmen. Dan ou lentrodiksyon ou ti anonse ki nou pe reve aköz nou krwar sa Bidze pe vin ranpli nou pos. Be zabitan Pointe Larue i fer ou en gro salanm.

Zot ti krwar ou pe vin donn koudmen anbelir nou zoli distrik, e met en pe larzan dan zot pos. Me i tre kler ki malerezman, ou ki pe vin ranpli zis ou pos. Mr Speaker malgre tou defi e difikilte, ki nou pei ...

### **MR SPEAKER**

Onorab Gabriel aret en pti kou, mon pa dakor avek sa komanter ki ou’n fer lo Onorab Bistoquet.

**HON CONRAD GABRIEL**

*Ok Mr Speaker, mon a retract. Mersi bokou. Mr Speaker malgre tou defi e difikilte, ki nou pei pe fer fas avek, mon annan en gran lespwar, mon lespwar i pa dan sa Bidze, ni dan sa Gouvernman, me i dan zabitan Pointe Larue, e dan pep Seselwa. Mon lespwar i dan lazenes Seselwa. Mon konnen ki zot pou kapab leve, sirmont tou defi e difikilte e finalman sorti venker.*

Mon priye ki Bondye i beni zot tou e i beni nou pti pei Sesel. Sa zoli Sesel ki apel nou pei, nou patri. Sa sel Sesel ki'n bers nou depi nesans, e ki'n donn sakenn de nou en sans progresse dan lavi malgre i pa'n toultan fasil. Mersi, Mr. Speaker

***(APPLAUSE)***

**MR SPEAKER**

Mersi Onorab. Onorab Doyace Porice.

**HON DOYACE PORICE**

Mr Speaker. Bonzour Minis, e avek PS Thesee. Bonzour tou bann Manm Onorab, e tou dimoun a lekout. Ozordi mon vreman fyer ki mon'n ganny sa sans pou fer en prezantasyon lo Bidze mon pei Sesel. Mon

konnen ki mon kapab mwan osi anmenn en kontribisyon pou siport Minis Finans e mon Gouvernman, kot mon distrik Baie Ste Anne e Zil Pros osi pou form par ladan. Sa i mon prezantasyon ki mon'n ekri e fer mon prop resers Mr Speaker.

Parey nou konnen, Gouvernman pe fer fas avek en tas vreman difisil sa lannen, me nou Prezidan Wavel Ramkalawan ek son bann Minis pe fer zot mye pou pa les Seselwa tonbe, malgre ki i pou annan serten lanmertim anver serten desizyon ki pe ganny pran; me mon konvenki ki Seselwa pou konpran rezon det par deryer bann tel desizyon e aksyon.

Wi Mr Speaker, Seselwa lizye in ouver e nou tou nou konnen lekel ki responsab pou met nou pei dan sa leta ki i ete ozordi, pa zis ek COVID-19, me avek en kof vid osi.

Mr Speaker, Minis Finans Mr Hassan in dekrir lekonomi nou pei konman dan en kriz. Mon santi nou sityasyon ozordi i rezilta nou gran depandans lo lendistri touris, e la ozordi sa lendistri i lo son zenou aköz COVID-19, kot nou lo zero reveni.

Parkont, in osi annan bokou labi e gaspiyaz ler nou lavi ti an roz par sa

Gouvernman ki ti o pouvwar, nou tou nou konnen lekel. Nou annan zis pou fer en pti gete lo rapor Oditer Zeneral, e nou pou vwar ki mannyer zot in donn bal ek *tax payers money*, kantmenm i annan ki pe lager lebra kase ozordi zour pou kasyet sa laverite e pe esey kontinyelman fer dimoun krwar lizour pou aswar.

Nou osi vwar ki sa Gouvernman oparavan in kit pei avek 99poursan det an rezilta zot bann desizyon fou, zis pou fer politik avek. Akoz zot ti krwar zot ti pou raport sa eleksyon ki ti deroule ant le 22, le 23 e le 24 Oktob. Permet mwan sit enn de legzanp Mr Speaker.

Gouvernman presedan in byen donn bal dan kof e fer bokou gaspiyaz initil. Zot in servi sa *Scheme FA4JR* konman zot zouti politik, partaz larzan *welfare* malapropo kot *ASP*, kot bokou ki pa ti ni merite ti finalman pe benefisyé.

En lot legzanp se lo kote *housing* Mr Speaker. Gouvernman *SPPF/ Parti Lepep, US* ti pronons 25poursan rediksyon lo bann *loan* lakaz donner par *HFC*. Serten travayer *HFC* ti pe donn *loan* zot dalon dan kasyet pou aranz zot lakaz e azout lasanm se zot.

Baie Ste Anne in menm annan ki ti zour mwan an krwayan zot pou ganny led pou aranz zot lakaz ki mwan mon pa pou pa ti dan pou aranz zot lakaz e ki mwan mon pa pou vi ki mon pa ti dan Gouvernman. Me ziska ozordi in annan parey e se la ki zot pe realize ki sa ti zis bann fo promes parey labitid.

Wi Mr Speaker, dikton i dir “En promes set en det.” E Gouvernman *SPPF/ Parti Lepep/ US* zot ti viv zis lo fo promes, bat latet Seselwa. Sa ti en siny zot dezesperasyon. E la nou Gouvernman *du jour* ti bezwen pey lepokase. Sa i vremen mal.

Ek sa mon koleg *MNA* Lopozisyon pou La Digue, i dir ki la *FA4JR* pe koupe, sa 2 operater bato La Digue pe konplent ki zot pa pou annan larzan pou pey travayer.

Me pandan *COVID* zot ti pe travay Lendi, Merkrede, e Vandredi, ki zot ti pe anmennen ? Pou mwan i drol. Mr Speaker mon krwar pa si zot ti pe met dyezel dan bato zis pou monte, desann.

Minis Hassan in anvoy en mesaz vremen kler pou tou travayer dan Sesel, ki ou ki travay dan Gouvernman, ki ou dan parastatal, pou ki tou dimoun i adopte en nouvo

latitud travay, prop e dwat, akoz i annan ki ankor pe viv dan lepase, zot ankor krwar ki zot kapab fer sa ki zot oule, e kontinyen ek en lespri koripsyon dan sa pei.

Mr Speaker, mon demann Minis Finans pou revwar bann pti proze distrik, zot finansman, e redonn zot priyorite. Legzanp kot en *bus shelter* ki kout R300 a 400 mil Roupri, semen segonder ki zis konmanse pa fini me kontrakter i ganny peye.

Tousala i apel labi e ede fer kof vid. Sirtou an se ki konsern Minister Gouvernman Lokal, i ti'n plis ki ler pou annan en rev i lo lafason keksoz ti pe ganny fer. Aret donn Kontra avek bann dalon ki ganny bann gro, gro sonm me kontinyen pa delivre. Sa pa'n ede fer kof vid?

Mon akord mon sipor a Minister Finans pou revwar lafason *Procurement* pe ganny fer, akoz lontan ti'n ler pou annan plis latransparans e retir sa ta birokrasi ki egziste dan sa domenn.

Minis in fer resorti ki in annan tro bokou *overlap and duplication*. Savedir dan Gouvernman ti annan tro bokou travayer, ki ti pe fer preski menm louvraz e menm in annan pa ni ti konnen ki louvraz i fer. Nou santi ki

Gouvernman i bezwen adres sa sityasyon o pli vit posib, pou aret mars lo lipye kanmarad, e la mon profite pou fer enn de pti sizesyon.

Annan en rev i zeneral dan tou Minister. Revwar tou bann *allowances* ki pli o ki en saler. Annan en plan kler ki mannyer pou koup lo gaspiyaz e annan en bon *monitoring framework*, asire an menm tan ki i annan *accountability*. Koup net sa bann labi lo bann transpor Gouvernman, gaspiyaz *fuel* eksetera.

Mr Speaker, Minis Finans i merit osi met lanfaz lo lezot Minister pou annan zot prop *building*, pou redwir zot lakantite depans lo *rent*. Mon sizere ki a lavenir Gouvernman i konsider annan zot prop lakaz, osi pou akomod bann travayer *expatriate*, *Constitutional Appointees*, bann Minis, e osi Seselwa ki pe travay Praslin ek zil pros e *vice versa*. Bann tel mezir a ede koup depans e *phase out* sa pratik lwe batiman oubyen lofis avek sekter prive.

Kan mon lo sa size gaspiyaz, Mr Speaker, i fer mwan mazin detrwa senaryo ki'n pase dan Baie Ste Anne e ki plizyer lezot distrik in eksperyans pandan dernyen Eleksyon an Oktob 2020. Serten zofisye ki travay dan Ladministrasyon Distrik ti

ganny otorize par Gouvernman ki ti o pouvwar, pou servi bann laboutik pou pran marsandiz lo kredi, donn manze, bwar bann dimoun ki pa ti devret pe gannyen, akoz zot pa tonm dan kategori vilnerab. Sa ti pe deroule pandan letan ki nou ti dan *cooling-off period*.

Zot pa ni ti onte sa letan pe servi nou *tax payers money* pou aste vot, konmsi sa larzan ti pou zot, fer kado mask kouler paviyon ek en sonm larzan ladan ; - lwe transpor pou fer kanpany ladan, apre zot a vin lo medya pou blanm tou lo *COVID-19*. Ti annan menm O Zofisyé *SPTC* lo Praslin ki ti pe ede fer sa bann zes parey.

Mr Speaker, trwa kar travayer Gouvernman ti lo teren pe kanpany pou *US*, pe donn en koudmen ek sa bann *briefcase*. Swadizan ti pe ed malere ki napa. Ozordi sa bann pti malere ki zot ti pe servi, sa ki zot pe dir mwen fortinen la, pa'n benefisyé dan nanryen. Se sa bann gro sef dan *US* menm ki pe benefisyé.

Mr Speaker, enn ler ou oule pa riye, me selman ler ou tann bann Manm lo lot kote latab ki ozordi pe koz pou sanmenm sa parti, pe vin koz nou en manman ki annan de zanfan ki mannyer i pou fer. Me zot ler zot ti la ki zot ti fer? Akoz

zot pa ti servi sa bann larzan ki zot ti pe fer en ta gaspiyaz avek e partaz ek bann dimoun ki vremen dan bezwen, parey sa manman ek son de zanfan?

Alors, si ozordi kof in vid, lekel lafot? Eski zot in fer en legzanmen de konsyans lo kote ki zot in kontribye pou ede pou an det sa pei, kan zot ti pe bat latet malere zis pou zot benefisyé?

Fodre ki Gouvernman i get en pti pe bann marsan, ki pe abize, menm si prodwir ti deza lontan dan zot stok zot pe vann li de fwa pli ser. Zot pe profit lo nou febles akoz zot konnen poudir Dolar in monte. Kantmenm kant-a-zot, zot pe transfer tou zot profi dan zot pei. Nou Sesel nou pa benefisyé e sa ki pli napa i kontinyen soufer.

An menm tan, mon demann Gouvernman pou revwar kou lavi, akoz menm si Gouverner Labank Santral Mrs Caroline Abel in dir nou konn nou priyorite, pa aste keksoz ki nou pa merit aste, me nou komodite esansyel i ankor vremen ser, kot i annan nou zabitan ki napa ki pa kapab met en bout avek en lot bout, sirtou la ki sityasyon pei in vin pli kritik. I annan dimoun ki annan *loan* lakaz, pe lwe lakaz, bil delo, elektrik pou peye, e

tousala Mr Speaker i koute pou en dimoun ki lo *minimum wage*.

Alors mon salye desizyon Gouvernman, pou bann desizyon lozik e rasyonnal ki pe ganny pran, ki sa Gouvernman presedan pa ti vwar li en nesosite, afen pou met plis larzan dan pos Seselwa, parey STC, bann *middlemen*, SSI eksetera.

Mon osi relans lapel avek tou Seselwa pou fer nou bout nou osi. La i lemoman pou nou revwar nou fason viv, fer nou pti plantasyon dan lakour, sal nou pti pwason, fer bann pti lesanz ek nou vwazen donn li en lanmen bannann, e li osi an retour i a donn ou sa ki li in prodwi, e pa ezite pou ed nou frer ki pli dan bezwen.

Mr Speaker, mon kontan ki Minis in koz lo later lagrikiltir, kot Baie Ste Anne Praslin pa'n ganny eparnyen, akoz i annan serten ki'n ganny kare later ki pe fer biznes *guest house* ek loto lwe lo la. Napa nanryen ki pe ganny plante.

In annan ki'n ganny kado bann gro, gro *excavator*, *pickup* ek lezot materyo, an giz pou travay avek dan domenn lagrikiltir. Me ki nou vwar? Sa bann menm materyo pe ganny servi pou fer lot pti biznes avek. Par egzanp, ler ti annan dezaz li ki ganny kontra pou tir later ek

lezot debri. Apre i anvoy son bil kot Gouvernman li. Pa i mal sa Mr Speaker?

Sa i devlop konfli lentere, labi ek koripsyon. Pourtan, nou annan zenn la ater ki pe rode sa bann loportinite pou fer biznes onnet.

Mr Speaker, mon santi ki nou bezwen revwar nou sistenm prodiksyon e distribisyon bann prodwir lokal. Nou bezwen donn plis lankourazman nou fermye ek peser, pou zot prodwir plis e osi annan landrwa santralize pou zot vann zot prodwi, ki pou benefisye tou Seselwa, sirtou lo Zil Pros. En sizesyon ki mon krwar pou ed Minis, atraver ou Mr Speaker:

Minis, annou servi bann labank pou ed bann zabitan ki annan zot propriyete pou devlope, ki swa pou fer kek biznes agrikol, ki swa pou ed bann zenn dan konstriksyon zot prop lakaz lo en bout later ki zot in erite, ouswa pou zot konstri en bout kot zot a kapab fer zot pti biznes. Sa ti a ede pou retir en pe fardo lo Gouvernman kot i konsern lakaz ek pti biznes. An plis ki sa, mon ti a kontan ki bann labank i revwar zot sistenm lentere lo *loan*. Soulaz en pe nou Seselwa.

Mr Speaker, dan sa mon'n modern ki nou pe viv ladan, Sesel osi nou bezwen bouze. Mon pe sizere ki nou fer bann sistenm masin POS ki Gouvernman i a vann bann biznesmenn, e annan en Lalwa tre serye pou ede kontrol bann peyman taks. Minis, nou bezwen azir pli serye ek bann boutikye e *shop owners* pou ki zot arete servi *calculators* kan pe deservi konsonmater kan ozordi zour tou i nobou servi en *scanning system*, egzize ki tou masin i prodwi en resi pou sak tranzaksyon ki zot fer. E fodre annan pri lo tou komodite ki lo *display*. Sa i a fer annan plis lord e osi ede avek travay koleksyon taks.

Mon ti ava osi kontan ki SRC i entrodwir en sistenm publikasyon bann pri konpetitiv pou ed Seselwa konnen ki kote ki komodite i pli bonmarse, vi ki nou'n toultan dir mars an de. Sa pou sirman ed nou bann dimoun ki pli bezwen.

Gouvernman pou bezwen revwar *License* bann boutikye etranze vi ki plis vi ki annan plis ki en boutikye etranze ki annan plis ki en laboutik. Ki fer ki napa en *level playing field* pou konpetisyon avek Seselwa, ki zot osi pe seye. Ki mon pe dir ? Se en marsan i ganny *license* pou vann manze ek bwar, nou

pa kapab kontinyen tolere ki evantuelman dan sa menm laboutik i pe vann lenz ek lezot marsandiz. Sa pa zis sa, Mr Speaker.

Mon osi apresye kot Minis in prevwar finans pou bann proze kontinyel dan Baie Ste Anne Praslin e Zil Pros, kot i konsern semen, proze lo Zil Eve, labatwar, nouvo lasose, nouvo Kordgard, e lezot pti proze ki pou ede tir nou distrik dan fernwar e vin dan laklerte, vin sa zoli bizou parey mon ti dir dan mon repons SONA.

Sa bann devlopman pou ede anmenn plis lanplwa, pti biznes pou nou bann zabitan ki pa pe travay, sirtou nou bann zenn ki pe espere ek pasyans, ensi ki bann biznesmenn ki'n pare pou anmenn zot kontribisyon.

Wi Minis, mon dakor ek ou ki Seselwa i annan talan. Alors, nou bezwen donn Seselwa sa sans devlop sa talan, ki a ouver plis lespri bann anplwayer ki pe anploy plis etranze, kot zot a mazine ki nou Seselwa i kapab fer, pou ede anmenn plis prodiksyon, e anmenn plis lanplwa dan nou distrik, e osi dan nou pti pei Sesel.

E la mon osi anmenn sa size volontarya ki nou Prezidan Ramkalawan in deza met a nou latansyon. Bann tel pratik a

benefisye nou kominote anver bann pti proze, ki pa vo en gran larzan, pou redwir tou bann Minister konsernen e pei an zeneral. Mwan konman en Manm Proporsyonnel, mon pare pou ed zabitan mon distrik par kre en group volonter, ki pou ede dan nenport ki proze e dezas dan nou distrik.

E mon pe demann Gouvernman pou servi medya pou sansibiliz nou pep lo sa size volontarya e sa lespri konpasyon ki fodre nou manifeste dan nou kominote.

Mon lans en lapel ek tou zabitan distrik Baie Ste Anne pou anmenn zot kontribisyon, pou ede fer nou distrik vin pli akeyan. Annou antre dan sa *monde* volontarya. Annou vin pli pros avek kanmarad. Annou devlop sa bon lanmitye, e ansanm nou a fer Baie Ste Anne bouz pli devan.

Sesel i pou tou Seselwa, se nou ki bezwen anbelir li dan nou fason. Gouvernman *du jour* pe donn nou loportinite dan sa Bidze 2021. Mon enplor tou zabitan Baie Ste Anne pou sezi bann loportinite ki pou vin a zot dispozisyon atraver sa Bidze. Ki nou pou espere ankor, Mr Speaker?

Finalman mon remet lanfaz lo mon demann avek Legzekitiv, pou asire ki i annan

en bon odit dan tou Minister, departman, lazans, enkli tou parastatal; e pibliye. Pran bann aksyon lo bann fe ki zot in dekouver an sa ki konsern finans. E mon demann langazman nou bann Manm Lasanble pou siport bann Lalwa ki Egzekitiv i anmenn, ki konsern met lord dan nou larzan pou nou pti pei Sesel.

Mon lans en lapel ek tou mon bann frer e ser Seselwa, pou nou tou travay dir e drwat pou nou prop benefis ek nou fanmir e osi benefis nou pei.

Mon remersi Minis Finans avek son lekip e Gouvernman zeneral pou sa zefor formidab pou nobou prezant nou Lasanble avek en tel Bidze, ki in fer sir i pa'n kit okenn Seselwa deryer, menm si in antre dan sa pozisyon avek en kof vid. Travay i la, travay i bokou, me mon konvenki ki nou pou reisi dan sa lalit.

Ki Bondye i a ed nou pou nou sorti dan sa kriz ekonomik e eklat son lalimyer lo nou. Mersi.

**(APPLAUSE)**

**MR SPEAKER**

Mersi Onorab. Onorab Porice ti'n demann detrwa minit pou li prezant en pti rezimen lo lapar

Onorab Woodcock. Onorab Porice mon a donn ou 6 minit.

**HON DOYACE PORICE (on behalf of) HON WAVEL WOODCOCK**

Mersi Mr Speaker. Set avek bokou lentere ki mon'n ekout ladres Minis Hassan lo Bidze 2021. Sa ki kler Mr Speaker se nouvo Gouvernman anba direksyon Prezidan Wavel Ramkalawan i annan en plan. I en Gouvernman ki responsab, e atraver sa Bidze i donn nou lespwar ki nou pou sirmont tou defi.

Onorab Wavel in dir ki wi nou pei pe fer fas avek en kriz lasante ekonomik ki *COVID-19* in anmennen. Me se dan moman adverser adversite ki nou pou montre nou rezilyans ek nou lafors konman en Nasyon. Minis Finans i adres plizyer aksyon ki Gouvernman pou pran pou koup gaspiyaz ek bann labi ki'n arive anba ansyen Gouvernman *United Seychelles*.

Onorab Wavel in dir ki *Leader* Lopozisyon Lendi bomaten ti pe koz bon labous pe demann lalis *FA4JR*. Ki li konman *Chairperson FPAC* pou get ladan. San konnen ki lalis ti'n fini ganny pibliye bomaten menm lo *website* Minis Finans pou tou Seselwa vwar.

Seselwa in vwar lalis, e Seselwa i ankoler akoz ozordi nou konn le vre rezon akoz Msye Faure ti dizourd sa Lasanble e akoz ki ansyen Minis Finans ti pe refize donn sa lalis.

In osi dir ki *Leader* Lopozisyon pa ti dan sizyenm Lasanble e i pa viv Sesel. I dekonekte avek larealite. Dan sizyenm Lasanble nou'n vwar koripsyon dan *NDEA*, bann *Irlandais* in donn bal nou vwar koripsyon ek labi dan *SBFA* kot in annan menm ki ankor lo son kote lata, ki ti'n pran *loan* e pa ankor peye. Menm i annan ki'n *write-off*.

In osi dir ki zot, zot in tir dile atraver *taks* avek bann ki ti pe trimouse pou fer de bout zwenn. Sirtou bann pti biznes e zot in donn zot bann dalon milyonner bann gran lotel enternasyonal bann *airlines* parey *Emirates* e *Kenya Airways* bann gran lakonpanyen ki'n annan bokou kapital dan bann kont aletranze. In fer en lapel avek *Leader* Lopozisyon konman *Chairman FPAC* pou get en kou dan sa bann rapor.

I ti anvi vwar rapor kot i ti vi vwar. In dir menm ekoute ou espere. In dir ki i kontan ozordi ki i kontan ozordi *US* pe koz lo vey kont piblik. Me sa ki

enteresan zot vreman ekonomik avek mo. E sa ki ankor pli enteresan Mr Speaker se ki i annan en rapor vreman enportan ki Oditer Zeneral in fer sorti, kot i montre ki manner *US* in abize e fer koripsyon dan later Leta.

Mr Speaker Onorab Wavel i dir ki bezwen admet ki'n annan bokou labi kot Proteksyon Lazans Sosyal. Kot bann ki merit ganny lasistans pa'n gannnen. E kot plizyer dimoun in ganny soutire pou pa travay e depan e viv lo *welfare* pu plizyer lannen. In annan dimoun ki'n lo *welfare* pou plis ki 10an.

Ansyen Gouvernman ekstern sosyalis kominis ki ti kontan ler Seselwa i depandan lo zot. Ki Seselwa ti bezwen azenou devan zot pou tou keksoz. E dan lepase Seselwa in bezwen sipliy sa Gouvernman pou ganny later ek lakaz. Kan zot ti merit pe *empower* Lepep Seselwa pou depan lo zot lekor. Pou devlope e pou kontribye dan devlopman larises nou pei.

Mr Speaker in osi vwar labi kot *ASP*. I tro bokou. Si ou pou fer en analiz, ou pou vwar ki ti annan en gran logmantasyon dan lakantite dimoun ki'n ganny lasistans sosyal pandan mwan Out,

Septanm, Oktob. Bokou plis larzan ti ganny depanse pandan sa peryod pou aste vot. Tousala in ede fouy en pli gran trou dan kont piblik.

**MR SPEAKER**

Ou'n arive 6 minit Onorab.

**HON DOYACE PORICE**

Fini.

**MR SPEAKER**

Terminen silvouple.

**HON DOYACE PORICE**

*Ok*, mon a termin avek son bout ki in mete pou terminen.

**MR SPEAKER**

Mersi.

**HON DOYACE PORICE**

Gouvernman pe reouver pei milye Mars. Me dapre *analysis* se petet an Zilyet ou Out ki *booking* pou *pick up*. Alor petet Gouvernman i merit get dan posibilite pou asiste bann biznes dan sa sekter touris avek bann pti *loan*, taks konsesyon ouswa en serten lasistans finansyel ziska ankor enn ou de mwan an plis. Zis pou zot *ride the storm*. Ziska lendistri i konmans refer.

I annan konfyans ki Gouvernman pou fer tou pou ki

nou pei i retourn lo son lipye. E mon annan konfyans dan nou Minister Finans Mr Hassan ek nou Prezidan Ramkalawan ki Praslin pa pou ganny oubliye.

I osi profit sa lokazyon pou remersi tou *MNA* e zabitan Grand Anse Praslin, pou zot sipor dan sa moman difisil ki mon fanmir pe pas atraver, ki Bondye i a beni zot. Mersi.

**(APPLAUSE)**

**MR SPEAKER**

Mersi Onorab, e mersi lo lapar Onorab Wavel Woodcock. Nou a swiv avek Onorab Sathya Naidu.

**HON SATHYA NAIDU**

Mersi Mr Speaker. Bonzour Minis ek PS Thesee. Bonzour tou koleg Onorab dan Lasanble Nasyonal. En bonzour spesyal pou zabitan St Louis e piblik an zeneral ki pe swiv sesyon avek bokou lentere. I donn mwan en gran plezir pou prezant mon repons lo ladres Bidze par Minis Hassan en nouvo Bidze anba en nouvo ladministrasyon ki anvizaze non selman adres bann defi me in osi met devan en stratezi pou sirmont sa bann defi, sa an retour pou donn nou pep lespwar. Lespwar pou en meyer demen.

E sa i posib ler nou met nou pep o sant nou devlopman sa i en keksoz nou'n atann pou en kantite lannen, malerezman 43an pli tar, nou pe fer fas avek en kriz ekonomik. Enn ki bokou pli pir ki sa enn ki ti'n frap nou an 2008.

Viris *COVID-19* avek en Gouvernman sortan, ki'n desarz son bann fonksyon dan en fason iresponsab ki'n anmenn nou pei lo son zenou. I tre kler ki nou'n erit en kales kase Mr Speaker.

Sa kales i dan en leta terib vi ki nou'n annan en Gouvernman ki'n abiz e ki'n mal zer larzan piblik, en Gouvernman ranpli avek diplikasyon ;- en Gouvernman ki pa'n zanmen konn son priorite an dot mo en Gouvernman ki pa'n zanmen annan lentere pep Seselwa a ker.

E se pou sa rezon e bokou plis ankor ki pep Seselwa in donn nou en manda pou en dirasyon 5an depi le 25 Oktob 2020 pou konmans reparasyon lo sa kales, pou nou fer fas avek adversite pou nou bouz an avan avek progresyon e prosperite pou tou zanfann Seselwa.

E pou nou fer sa fodre ki nou azir dan en fason fran. Kot nou bezwen pozisyonn nou anliny avek realite sa sityasyon

ki nou pe fer fas avek. E nou bezwen fer fas avek li ansanm par lao tou, par lao tou fodre ki nou aprann lo tou sa ki'n arive dan lefase e pa repet menm fot ankor. Ozordi nou annan en Gouvernman ki annan en vizyon e serten pou argimante poudir ki Bidze pa'n sanze, e i ankor parey.

Me soutenabilitee sa Bidze in ganny adrese e plan i an plas pou bouz an ver en meyer direksyon. I en latas ki vreman entans e dir, me enn ki pa enposib. Annou pa bliye ki devalyasyon Roupri in zwe en rol mazer pou enpakte Bidze. En to lenflasyon 30poursan i konsiderab e nou bezwen gard sa antet.

An menm tan nou annan en Gouvernman ki responsab kot bann mezir neserer e imedyat pe ganny pran sak fwa en loportinite i prezant son lekor pou koup depans elimin diplikasyon, e promouvwar efikasite.

Mr Speaker sa Gouvernman i konn son priyorite. E sa se pou met Seselwa premye. Mon pou donn mon sipor pou en Polisi GOP ki nasyonalistik ki pou asire ki Seselwa i ganny sa loportinite pou antre lanplwa ki zot merite. Savedir in ogmant posibilite pou gard en pe larzan

an sirkilasyon dan nou lekonomi. Me tou resaman sa zafer *Club Med* kot 100 *Mauricien* ti'n ganny sa sans pou konmans travay, i en keksoz ki mon pa vwar li akseptab ditou.

I mon swe ki nou pa vwar bann anomali lefase, mon ava donn en legzanp kot ler ou vwar en biznes pe met en *advert* lo en zournal pou en pozisyon travay, kot apre kalifikasyon pa koresponn avek tit sa travay.

E i annan plizyer lot ankor, e mon asire ki ou konnen Minis. E mon swe se ki *GOP* pou ganny *issue* zis ler napa okenn Seselwa pou fer sa travay spesifik. E ler mon regard plan pou Sekter Touris kot nou pe met kiltir konman en pwen fokal dan nou plan, pou konsolid sa lendistri, fodre ki nou asire ki Seselwa ki pe pran laplipar bann plas lanplwa, pou zot vann Sesel dan sa bann letablisman touristik pou asire ki Sesel i retourn lo map lemond, ki non selman ganny rekonnèt pou sa labonte me osi pou son kiltir.

In plis ki ler travayer pran sa bann loportinite ki pe vin tap lo zot laport in ler e ler zot ganny sa louvraz fodre ki sa tandans *sick leave* i arete. La i nepli letan pou en latitud

parese. Fodre ki ou travay e travay dir.

La i letan pou zot pran zot responsabilite o serye. Pou ou sa zenn ki pe swiv si ou annan si ou ankor dan lekòl pa mazin fer piti la, i pa letan met lanfaz lo ou letid edik ou lekor, tap tou pou tou, repet sa zefor dan lemond travay e la ou a prospere kot ou pou annan en fondasyon solid pou ou debout lo la olye depan lo *welfare*.

Mr Speaker mon'n remarke ki en porsyon signifikan nou Bidze pe ganny abzorbe par ASP e rapor entern lo ASP i soka. In donn nou tou rezon akòz nou bezwen annan en bon reform lo sa *Scheme*, pou asire ki lasistans i pou ganny *allocate* lo en baz merit. Nou la pou asiste bann ki vilnerab, bann ki vremen dan bezwen, e non pa lekòtr.

Mr Speaker koripsyon i parey en maladi, e si ou pa tret li son konsekans pou grav. 43an bann pratik koronpi in ganny tolere e sa gras a sa ki nou'n re grese e nou vremen an retar, nou ti'n vremen kapab premye dan *L'Afrique*, me manyer mon vwar keksoz i pa neserman leka.

E legzanp tre resan se sa rapor *FA4JR*. E mon pa konnen ki bor pou konmanse lo sa lalis. I fer mon disan bwi, mon araze

mon demande pou sa bann ki konnen ki'n arive vin devan ...

### **MR SPEAKER**

... Onorab, Onorab, Onorab arete mon ti'n dir nou evite sa bann parol kontrovers ki fer reaksyon. Ou a tir sa silvouple, kontinyen.

### **HON SATHYA NAIDU**

*Ok sorry* Mr Speaker. *Retract* - pep Seselwa zot konnen zot. Komisyon pou Anti-Koripsyon zot annan en travay ant entans devan zot. Pep Seselwa pe depan lo zot.

Zot le vwar lazistis e fodre sa ki koupab i konmans ganny *deal* avek, parey nou pe *deal* avek bann eskobar ozordi zour.

Lo size pri lavi Mr Speaker, Gouvernman pe adres plizyer eleman. Enn sa eleman se pri marsandiz ki pe ganny enporte par *STC*, deza nou'n remarke ki zot pou nepli pey *rent* atraver restriktirasyon ki'n arive avek *SSI*. Alors sa i ava vin konman en mwayen pou elimin en kou, me selman pa pli enportan se eliminasyon bann *middlemen* pou fer sir pri komodite i desann enormeman.

E mon swe se ki zot pou kapab angaz avek bann marsan pou fer sir ki i annan en pe stabilite a sa ki konsern pri marsandiz, la i nepli letan pou

bann marsan vann komodite esansyel lo en pri egzorbitan ler nou pe pas dan dir.

An sa ki konsern peyman taks, mon lans en lapel ankor enn fwa avek bann marsan e tou biznes pou pey zot taks akoz nou pei i vremen dan en leta kritik, fer zot bout silvouple, azir dan en fason responsab.

Mr Speaker, en size ki en pwen konsern e enn ki relevan ozordi se pri e kolektivite *internet*. Nou pe relye en kantite lo li konman en *mode* komunikasyon dan sa nouvo normal kot in annan en kantite zot ki pe *work from home*. Alors mon swe se ki le neser i konmanse pou adres sa sityasyon o pli vit posibil.

Mr Speaker mon vremen apresye ki lanfaz pe ganny mete lo Sekter Lapes ek Lagrikiltir ler mon regard plan ki zot annan zot pe vremen *think outside the box*. E sa i pou anmenn benefis pou redwir depandans lo lenportasyon. E sa i garanti baze lo lenvestisman ki pe ganny fer.

Tou resaman nou'n vwar ki bann prizonnyen pou al Coëtivy anba en program rehabilitasyon e i pou anmenn en kantite benefis kot *US in fail* nou, nou ava montre zot manner pou fer li marse.

Nou bezwen konmans gete ki resours ki nou annan. Eski i annan posibilite pou ogmant konsonmasyon lokal e an menm tan eksporte? Dimyel par egzamp, wi dimyel letan mon get nou pei vwazen zot in ganny afekte par bann maladi ki atak popilasyon mous dimyel. E sa i fer ki zot bezwen servi kemikal pou konbat kont sa maladi.

Annefe resers ki mon'n fer i montre ki Sesel i sel pei dan *L'Ocean Indien* ki pa'n ganny afekte avek sa maladi. Sa i fer ki nou dimyel i annan valer. Annou donn sipor bann *NGO* tel ki *Seychelles Bee Keepers*, pou eksplor posibilite pou agrandi zot prodiksyon.

Mr Speaker nou kontan koz lo Lekonomi Ble. Nou lanmer i vas. I en gran resours. An 2019 *L'Indonesie* ti eksport 200 milyon tonn gomon. E sa in kontribye 3poursan zot *GDP*.

Eski i pa ler pou Sesel get dan posibilite *seaweed farming* pou leksportasyon? E sa i de sizesyon ki mon met pou bann *expert* analize.

Mr Speaker, lo kote Proze Kapital mon'n note ki *SBC* pe resevwar fon pou finans konstriksyon sa batiman, *SBC House*. E sa i e i atraver don ki *La Chine* pe donn nou e i pe met a nou dispozisyon. I pou donn

nou i pou donn bann travayer SBC sa lankourazman ki neser pou fer zot louvraz byen a lavenir.

E lo lot kote mon bezwen kestyonn *management* ek SBC senpleman akoz en kantite dimoun la deor i pa satisfè sa lannen zot pe demann 133 milyon. E alor Mr Speaker ler sa *head* pou SBC i tonm ladan i vin devan dan Staz Komite, i enportan ki zot prezant nou Lasanble en bon plan konpreansiv ki anliny avek realite ki nou pe viv ladan ozordi.

Mon bezwen pran sa moman pou salye Clive Camille kot Télésésel mon tir mon sapo mon frer pou sa travay formidab ki ou pe fer kontinyen fer sa bon travay SBC *are demand more from you.*

Mr Speaker mon vreman apresye ki Gouvernman Arab Ini in donn nou en don pou konstriksyon en sant reabilitasyon.

Sa pwen ki mon ti'n tous for lo la dan mon repons lo Leta Lanasyon e i enportan ki APDAR i vin devan avek en plan konpreansiv lo ki mannyer zot pou retir bann zenn lo *methadone* e reabilit zot dan sosyete. Annou pa esper en sant, me fer li zot devwar ozordi

atraver bann lenfrastruktir ki deza la.

Mr Speaker mon bezwen dir sa fodre ki nou enstil konfidans dan piblik pou donn zot sa garanti ki nou bann zenn pa pou kontinyen depan zis lo *methadone* pou tou dilon zot lavi.

E mon osi santi ki sa sant reabilitasyon ler i pou'n konplet i pa pou zis atir bann kliyan ki annan problemm adiksyon avek eroin me osi lezot form adiksyon tel ki lalkol ek sigaret.

E annou pa bliye lasante mantal dan son totalite. I annan en kantite dimoun la deor ki pe soufer avek depresyon. E mon konnen mon konnen ki kantite lafors en dimoun i bezwen pou leve tou le bomaten pou viv, ouswa pou kree en zimaz konmkwa ki tou keksoz i *ok* ler mantalman i pa leka.

La i fer mon masin sa sanson par mon frer Gato "personn pa konnen." Personn pa konnen Mr Speaker, alor Mr Speaker mon pe soumet en pledwari avek nou Gouvernman pou fer le neser pou siport en transformasyon pozitiv *the mindset* ki nou anvizaze anmenn dan nou pei. US in fer nou dimoun soufer Mr Speaker. In plis ki ler pou met en lafen avek soufrans nou pep.

Lo lot kote dan proze dan distrik Mr Speaker mon le pran sa loportinite pou remersye Onorab Arissol ek Onorab Henrie pou sa zefor kolektif ek konstan ki zot in met devan pou asire ki sa size Lekol La Rosière i ganny adrese.

E ozordi 38milyon in ganny met a kote pou sa proze konstriksiyon. E mon swe se ki i ava ariv an ver son konpilsyon.

E mon osi apresye ki lekol Belonie pe resevwar sa fon neser pou konplet faz final ki reste avek sa proze i kler ki ledikasyon i en priyorite anba Gouvernman LDS.

Ler mon pe regard bann lezot proze dan mon distrik, mon konnen in annan bokou ki ti'n sipoze ganny fer dan lepase, me i pa'n vin en realite, senpleman aköz in annan serten endividi dan ansyen Gouvernman ki'n trenn zot lipye.

Mon swe se ki zot servi sa sans byen kot zot pou deservi tou zanfan Sesel avek enparsyalite se sa ki pou anmenn nou devan a lavenir silvouple aret ek sa latitid "ek nou pa ek nou" si i pou kontinyen zot, zot pou bezwen ale i annan dimoun ki le travay pou sa pei.

Mr Speaker ler sityasyon ekonomi i amelyore mon pou

pouse, mon pou pouse pou fer sir ki i annan serten proze ki vin en realite aköz nou bann zabitan i atann pou tro bokou letan, mon kapab zis sit en legzanp Semen Kato fer preski 30an nanryen in arive. Me mon pou fer sir ki pou annan keksoz ki pou ganny fer *at least* lannen prosen.

E mon oule pran sa moman pou dir zabitan St Louis e pep Seselwa pou kontinyen annan lespwar annou met nou lanmen ansanm pou sirmont sa defi ki devan nou.

Mon le pran sa loportinite pou remersye Kominote Biznes dan St Louis ki'n kontribye pou ed nou bann frer ek ser ki vremen dan bezwen dan sa letan difisil.

E la i fer mon mazin sa group lo rezo sosyal *giveaway*, kot i annan en kantite dimoun ki eksprim konpasyon e sa i osi promouvwar en lespri saritab. An menm tan i annan en kantite dimoun ki'n pran sa lespri inovativ pou konverti zot biznes pou kapab soutenir zot lantite, felisitasyon.

Plis dimoun i bezwen azir dan en fason *proactive*. Mr Speaker viris CORONA i persiste pou reste en gran konsern. Mon bezwen eksprim mon dezapwentman total an ver nou Lapolis. Silvouple vin pli

vizib dan nou kominote ed Dr Gedeon ek son lekip ki pe devoue pou nou tou zot pe fer en gran sakrifis. Zot a pe travay 24/7 pou protez nou, annou ini dan lafason atraver nou konportman dan sa moman difisil.

Programm vaksinasyon i en zouti ki tre enportan pou soulaz nou lekonomi konman en optimis mon santi ki nou pou kapab a tenir sa lobzektif *herd immunity*

Minis Hassan mon bezwen remersye ou pou sa latas enorm ki ou'n pran ansanm avek ou lekip pou met ansanm en bon Bidze ki pou donn nou pep lespwar parey nou fer David Louise ti dir en zournalis *SBC* si ladministrasyon Msye Ramkalawan ki'n prepar sa Bidze i bezwen en bon Bidze.

Pou konklir mon demande ki Bondye i kontinyen beni nou pep ek nou later e permet li pou donn nou tou sa kouraz pou pa zanmen les tonbe dan sa prosesis pou rekonstrir Sesel e fer li vin pou tou son zanfan. Mersi.

**(APPLAUSE)**

**MR SPEAKER**

Mersi tou dimoun. Onorab Naidu ou'n aret zis a ler 12.30. Nou a pran en poz la e nou a

zwenn apre midi 2er. Mersi bokou.

**(BREAK)**

**MR SPEAKER**

Bonn apre midi tou dimoun. Nou ekout Onorab Chantal Ghislain.

**HON CHANTAL GHISLAIN**

Mersi Mr Speaker e bonzour. Bonn apre midi tou dimoun. Mr Speaker avan mon komanse mon oule met lo rikord Lasanble Nasyonal Sesel ki mwan mon *speech* in ganny ekrir par 28 mil dimoun.

Mr Speaker bokou nou, nou kontan fer sitasyon dan bann *speech*. Me si ozordi i annan en sitasyon ki vreman reflekte nou Lasanble, se sa enn ki dir *l'homme* dan lopilans i bliy son nesans.

Promosyon lalang Kreol Seselwa, i enn bann lakonplisman Sesel dan sa 43an. E ki fer nou osi nou kapab selebre lazournen lalang maternel.

Nou ti selebre sa yer, e mwan mon osi mon pou selebre li. An profite par zet ankor 2 sitasyon ater pou nou prop refleksyon. Annou pa bliye ki zalouzi i touzour prodwir laenn

e ki boner levantay pa boner saple.

Parkont lavolonte Senyer e par sit diferan verse dan labib, al Katedral, lir lepit e pran *la communion*, pa dir ou maltret e denigre ou prosen, sirtou dan son letan maler. Mr Speaker ler mon get Sesel ozordi an zeneral, en kantite in vreman bliye kot zot sorti.

Sa ki'n ne avek kwiyer lor dan son labous, pe koz mirak Seselwa. Sa menm Seselwa ki'n trimouse, eskente pou ede devlop sa pei. En ler mon oule krwar ki zot, zot piti i a kontinyen viv zot rev pou vin sa ki zot oule vini, aköz son paran i annan larzan ek en gro biznes. Me lezot i a vin sa ki ou gro msye ou oule i vini. Li i pa pou avans pli devan, me i a plito al fer galet ek moulouk. Son rev pou vin en profesyonnel i a reste zis koman en rev dan kwaf son zorye.

E de lot kote, i annan sa ki'n sorti anba e in mont anler, ozordi pe dir li osi i pe kraz Seselwa. I dir ou pa swazir travay, pran sa ki ou gannyen, al defris koko, al bat kannel, me selman ou'n koup son larzan ki li i ti pou gannyen, ki ti kapab permet li aste sa materyo brit pou li fer galet ek moulouk!

I byen ou dir li pa swazir travay, me ki mannyer sa

*waitress*, sa *barman*, sa kwizinyen i al met blok dan laliny si ou'n aras li sa loportinite pou li *reskill* son lekor?

*Lucky Dube* i dir ou, "*Be good to the people on your way up the ladder, cause you need them on your way down.*" E Kreol pou dir ou pa kas pon, ler ou'n fini traverse, aköz ou pou bezwen sa menm pon pou ou retournen.

E pli for ankor, pa zanmen bliye sa ki'n met zot la. Mr Speaker apre ki mon'n fini ekout Minis koze Mardi pase, i fer mon mazin ler ou al kot dantis. Ou Minis ki dantis e ou pe vin tir ledan Seselwa? Me sa menm Seselwa in ganny klase dan 2 klas. Sa i laklas travayer e laklas bann bourzwazi.

Ou dantis ou dir enn antre asize mon a tir ou ledan, i pa pou fermal li, me apre zis ou aras sa ledan kri koumsanmenm. Me lot kote pou sa bourzwa ou'n donn li tou sa pilil pou kalme li, ou'n menm al pli lwen pou anmyel li. Ki vre ler i sorti tou i *ok* pou li. Me li sa pti Seselwa avek tou son douler, ki in gannyen, ki'n ganny kouyonnen avek, konmsi ki ou a dir.

Parey malere lontan, ti plenny zot sor dan moutya, malgre douler in donn mwan

lanvi sant sa pti verse.  
 “Bourzwa mon bourzwa dir  
 mwan, ki kalite karbonn ki’n  
 bous ou zorey.”

*(laughter)*

### **HON CHANTAL GHISLAIN**

I forse ou sant douler lezot isi dan sa Lasanble. Senpleman akoz Mr Speaker, sa Bidze i en Bidze pou la klas bourzwazi olye en Bidze pou la klas travayer. Akoz? Minis in anons en rezim taks ki ler ou analiz li byen i zis pou benefisyè bann ki vreman annan larzan Sesel.

Ouswa les mon a dir, en Bidze pou bann gro biznessmenn ki’n *sponsor* zot e ki’n koze dan zot *PBB LDS*. La sa pye mang, kantmenm pou sakouye, pa pou tonm nanryen, nanryen e nanryen menm! Akoz i annan detruwa gro zans ki’n fini pran tou plas lo brans. Li i annan en milyon bizness, li menm in vin anpar lanmen avek Gouvernman anba *FA4JR*.

Li menm i pa oule tann pa ale, sa zafer 13enm mwan saler pou bann travayer Seselwa. Pourtan li menm i annan *forex*. E la ou’n dir li i kapab pran son *forex* pou kontinyen fer vin loto.

E pa bliye, se li menm ki pe kriy lasasen, Gouvernman pa oule les li pous son travayer. Li menm i ankor lo lalis *FA4JR*

pou Zanvye, Fevriye. Kekfwa sanmenm sa zourit 10 lapat ki Onorab Bistoquet ki ti’n vwar dan sa Bidze.

Konbyen ki 2020 in asiste zot travayer ki’n travay depi le 1 Zanvye ziska 31 Desanm, zis pou ed zot akimil larises? Prezan ou pou fer zot konfyans ki zot pou vreman donner, ouswa zot a swazir kan e lekel ki zot pou anvi donner.

Konbyen zot ki ni menm en pti *bonus* zot pa’n kapab donn zot travayer lannen pase, selman zot in kapab vwar larzan pou met dan Fon *COVID*, *just to be in the good books of the President*.

Me parkont sa pti restoran e *take away* laba La Digue ki ti pe depan antyerman lo touris, ou pe dir li ozordi ou pe koupe, koupe, napa pou li. Sey dir mwan Minis, atraver ou Mr Speaker, ki mannyer sa fanmir pou viv li, akoz i pa form parti dan sa Bidze li. Ou dir li al bat kannel, al ranmas koko?

Mon a dir ou Mr Speaker. Zot, zot in fer sa, zot in fer tousala zot. Zot in konnen ki savedir ranmas koko, zot in konnen ki savedir bat kannel. Zot in konnen ki savedir kourbe dan plantasyon linyon. Zot in kontribye dan sa Sesel, zot in pey taks ki’n ede fer lekonomi marse tou sa lannen.

Me avan pandemi *COVID-19* zot in bouze, zot in arive ganny en biznes pou zot menm, eski ozordi ou pe dir li re al bat ankor kannel, al anmas koko ankor?

Mr Speaker i osi senp ki sa. Ozordi Sesel pou tou son zanfan in pas par lafnet! Kot bokou sa ki'n pile e tik anler in ganny zet anba. Li ler i koz son koze, ou pa tande? Sesel in ozordi vin pou tou son milyonner malerezman.

E se sa ki sa Bidze i fer kler. Pran avek sa ki pov e donn sa ki deza annan milyon. Zis get sa zafer rediksyon 5 poursan lo taks biznes. Sa Mr Speaker i pou benefisyè direktman zot bann dalon ki'n *sponsor* zot dan dernyen eleksyon.

Minis donn en rediksyon 5 poursan taks lo en biznes ki pe fer R1milyon profi, i zis pa egal avek en rediksyon 5poursan *tax* lo enn zot bann dalon ki li i pe fer ant R30 a R50milyon profi.

E ladan menm i oule li menm fer *redundant* son travayer. Me parkont i difisil pou Gouvernman donn R5mil en travayer Seselwa, ki ti pe travay lotel e lotel pa pe ouver pou li ganny en travay.

Seryezman, sa i en probleman pou Minis, pou ou Gouvernman Minis? Tan ki i pa

zot prop zanfan ki pe dir zot "manman mon lafen!" E repons sa manman i senpleman, "Mon piti mon napa."

Pou zot i pou *ok*, me pou sa paran i pa *ok*. Akoz li osi son vant pe gronnyen avek lafen. Minis mon espere ou'n ekoute e tann byen Onorab Uranie plenny sor zabitan La Digue.

Koman en Digwa mwan menm, mon osi mon santi mon konsernen. Minis en bal siman in ariv R180 La Digue, kan Mahe i kout selman R135. La mon'n aprann ki en blok 4 pous, ki li i ti pe vann R24 La Digue, i sipoze monte pou li ariv R35.

San kont tou bann lezot marsandiz, manze, sirtou ki pri in fini desot plafon. Mini si ou Gouvernman in kapab donn en rediksyon 5 poursan taks pou bann gro biznesmenn, akoz pa osi konsider konsesyon *fuel* pou nou bann bato kargo ki fer voyaz La Digue, ki ti a ede soulaz sor nou zabitan.

La deza zot oule frenm sa konponan *hardware* *STC*. Kestyon, lekel ki zot oule donn sa biznes lo La Digue? E lo Mahe gete lekel ki pou benefisyè avek fermtir *hardware store* *STC*?

Mr Speaker si i annan en keksoz ki nou pa kontan koz lo la, ouswa senpleman zis refiz-e

tande, se larealite. Ozordi i malere pou dir ki nou vreman annan en Gouvernman ki senpleman pa oule aksepte e fer fas avek larealite ki la ater avek nou.

Larealite se ki la ater dan lizye nou bann ser e frer Seselwa ki'n travay, ki'n eskente, ki'n vreman trimouse.

Ozordi sa bann menm frer e ser travayer Seselwa, profesyonnel Seselwa, pti biznessmenn e pti biznes ek bann fanm, ki ti pe sezi loportinite avek reform 2008 pou mans tou zot pti *cash* pou met en biznes lo lipye.

Bann *graduates* ki'n *burn the midnight oil* pou ganny en degre. Bann manman tousel ki malgre zonm in ale, in kit zot tousel avek zanfana, zot in kontinyen travay pou ki zot zanfana pa zanmen al dormi vant vid. E ki ozordi avek sityasyon *COVID*, zot menm ki'n ganny plis tape.

Annou mazin nou bann frer e ser Seselwa ki ti lo *URS*, bann ki ti lo *SETS*, bann ki'n perdi zot lanplwa e ki pou kontinyen perdi lanplwa. Bann ki'n fek fini lekol e pe esper en louvraz permanan. E tou bann biznes ki ou war li dan sonm. E se zot menm ki dan bezwen ozordi.

Me Gouvernman i swazir vir ledò avek zot, e swazir plito pou get selman dan zentere serten gro biznes. E se sa ki bann politisyen dan Gouvernman i anvi fer serten zot tandè.

Zot menm ki pli annan e ki pli eze dan sa Sesel ozordi, e ki pou zot lavi e lavi zot zanfana pou kontinyen san traka e san grat latet ki pou met lo lasyet toulezour. Me parkont pou la mazorite Seselwa lavi pou difisil, lespri pa pou anpe. Sey mazin en pe ki kantite traka ki sa papa, ki sa manman pou anmennen silvouple.

Sa ki ou'n koze e sa ki tou bann Manm *LDS* ki'n koze avan mwan i pa la realite la ater. Dan tou sa bann distrik ki nou lo sa kote latab nou reprezante. E sirman pa larealite lo teren la ater dan bann distrik ki *LDS* osi i reprezante non pli.

Gouvernman *LDS* atraver sa Bidze, pe klerman vir figir avek sa 100tenn dimoun ki pou nepli annan en reveni ler sa *Scheme FA4JR* e *URS* i arete. Ni pitye zot napa pou sa 100tenn fanmir ki pou forse trouv zot san en twa lo zot latet ler zot *part rental* i ganny koupe.

Zanfana Sesel ti pe viv dan dignite, konfor ek lafyerte, aköz nou ti pe pran ka avek nou prop frer e ser Seselwa. Byennet tou

zanfan Sesel, ti'n ganny garanti, me la in senpleman vin en zafer bef dan disab, sakenn vey son lizye. Kot Prezidan li menm pe dir ou pa koste, akoz i pa pare pou ed ou, me plito al mandye pris disel e latet zonnyon kot ou vwazen.

Mr Speaker mon santi ki zot Gouvernman pe tro kasyet deryer sa zafer larg lanmen bann biznesmenn pou kouver zot pese.

La ziskan proze prive *chief* ek mon *Roi* zot ladan. Petet Mini si devret dir nou si *SLA* in donn *license* ankor 2 konsiltan dan kad parey Mr Charlette? Mon osi aprann ki i annan delegasyon prezidansyel e vis prezidansyel ki ti al vizit lotel *Club Med Ste Anne* apepre 2 wikenn pase. Eski sa ti en vizit ofisyel sa. Akoz mon pa'n tande dan nouvel, petet si in fer mon pa'n tande.

Ouswa ti en vizit ant '*amis* e konesans. ' La yer swar dan nouvel nou'n antann 100 Morisyen in ganny *GOP* pou travay kot sa nouvo lotel, akoz dapre zot, zot pa'n ganny ase Seselwa ki'n *apply*.

E mon aprann, zis 40 zot ki'n antre Sesel. E ladan i annan *barman*, *waitress*, kwizinyen. Pourtan i annan en pe letan en kantite Seselwa ti pe konplent ki zot anvoy *CV* kot

lotel, zanmen zot in ganny repons.

E i annan menm ki ler repons in vini, zot ganny dir sa bann pos in fini ganny ranpli. E la lo mon telefonn, i annan en zenn garson sorti Grand Anse Praslin ki'n anvoy mwan en mesaz Zedi pase.

Konmkwa ki li i en zenn ki li lo *URS*, akoz dapre li apre ki i ti'n ganny fer *redundant*, i en kwizinyen ki'n travay *Constance Resort*. Kot in menm ganny *Passionate Award 2018* kot son travay.

E ki in anvoy son *CV* kot 2 lotel. Sa i *Club Med* e *Mango House*. Tou lede landrwa pa'n zanmen rann li larepons, selman in tande tou sa bann pozisyon se bann etranze ki'n gannyen.

Sey dir mwan, ki ou oule sa zenn garson i fer? Ki mannyer i viv lo R3500 ki? Ki pa ni menm saler debaz ki Lalwa i egzize. Selman kot i pe travay laba, in deza pe ranpli 9erdtan travay toulezour.

Mr Speaker mon oule ozordi adres en kou sa zafer R1 bilyon *welfare* ki *LDS* i kontinyelman fer propagann avek, e ki'n kol pou vre dan latet menm bann ki konsider zot koman bann gran malen. Zot in toultan fer dimoun krwar ki i vre ki Gouvernman in partaz R1

bilyon avek dimoun ki pa travay.

Me i pirman en lalang byen fabrike. I vre ki preski tou le lannen Gouvernman i bidzet preski sanmenm sa sonm anba *Benefits and Approved Programs of ASP*. An Kreol, Benefis e Program ki'n ganny Aprove pou Lazans Proteksyon Sosyal.

Bann program e benefis i osi tonm anba seksyon 154 (8) nou Konstitisyon. An 2019, sa sonm ti R1.3bilyon. 2020 ti R1.5 bilyon. E la 2021 i R1.4 bilyon.

Dan sa R1.4 bilyon pli gran konponan 787milyon i pou benefis bann retirete. Swivi par 279milyon pou bann *homecarers*. E mon'n menm war zot in redwir sa lannen, konmsi dan zot lespri pou napa nouvo dimoun ki pou bezwen *carer* sa lannen.

Anfen, tou fason sa i en zafer ki Minis Ferrari konmela ti kont. Akoz dapre li nou pe depans tro bokou larzan lo bann dimoun ki pe deza al kit sa later, i lo *verbatim* Lasanble sa Mr Speaker.

Anfen, kekfwa sanmenm serten pa paret afekte par lanmor nou vye dimoun ki'n ganny *COVID*. Touzour dan sa R1.4bilyon Mr Speaker, 110 milyon pou benefis envalidite.

129milyon pou benefis dezabilite. Me parkont 77 milyon ki al pou sa fame *welfare*. E sa ki enteresan, se ki 2020 ti parey ki 177 milyon ki i ete ozordi. E 2019 ti pli ba ankor, 54milyon.

E anba sa 141, anba sa R1.4bilyon, i annan lezot led, tel ki benefis siplemanter, *Scheme Lasistans pou bann Lakaz Emergency, sickness benefit, emergency benefit*, benefis maternite, benefis lanterman, benefis bann sirvivan, benefis pou bann semi orfelen. Sa i bann zanfan ki'n perdi en paran, benefis orfelen, sa i bann zanfan ki'n perdi tou lede paran.

Benefis an ka ou ganny *injury* dan travay, Konsesyon pou bann pansyoner ler zot vwayaz lo bis *SPTC*. Konsesyon pou bann pansyoner ki voyaz lo avyon, *Cat Cocos* e *Cat Rose*.

*Scheme* pou bann pasyan Praslin ek La Digue ki bezwen deplase pou rezon medikal. *Scheme* pou lasistans *daycare* ek *foster care*. Zot, sey dir mwan kot nou'n depans R1 bilyon lo *welfare* dimoun ki pa oule travay la?

Prezan Minis, lefe ki nou'n koz fortman lo sa zafer *welfare* e kot politisyen dan ou Gouvernman in touzour koz kont sa kantite depans lo bann

lasistans Lazans Proteksyon Sosyal, si bann politisyen LDS i vreman krwar ki sa R1.4 bilyon i dilo ki'n ganny large dan kont *Welfare*, pran zot en desizyon ozordi menm e koupe e zot a sov pei R1.4 bilyon.

Mr Speaker sa diskour Bidze in prezant nou avek en bann sif ki lo petet. I montre klerman en Bidze ki pe fye dizef dan vant poul. Minis in dir nou ki dan sa Bidze R11milyon ladan, i annan R8.2bilyon ki osi enkli bann donasyon.

I telman konvenki ki i pou ganny 7bilyon dan reveni taks. E parey mon bann kolek ki'n koz avan mwan, in byen detaye avek lekonomi pei ki ankor lo zenou avek sa sityasyon *COVID*, deza R7 bilyon i lo petet. Tandis ki sa lot 1.1bilyon, si mon servi mo ki Minis li menm in servi dan son diskour, zot ekspekte gannnen atraver donasyon.

In servi sa mo 'ekspekte', ouswa *Grants*. Ki li menm i pa'n ni dir nou ki pei sa bann *Grants* pou sorti, ni menm krwar ki nou Gouvernman in promet an retour pou gannnen. Eski *case Assumption* pou retourn lo latav ankor?

Eski nou *Airport* ek nou Por pou al ganny vann ler donater i ponn sa dizef lor? Bann kestyon ki nou bezwen konnen. Akoz nou dir *there is*

*no free meal*. Eski vizit wikenn Prezidan Abu Dhabi ti pe al mandyan sa bann finansman?

Si wi, fotespere in profite pou demann en pti larzan pou sa malpropte La Misère, lefe ki napa dan Bidze. Mr Speaker en lot zafer drol avek sa size *Grants*, aparet direk dan son Bidze total, menm ler nou pa ankor gannnen, mon war sa drol ki la ler zot in ariv o pouvwar sa i *ok*.

Senpleman akoz i fer mwan mazin Vis-Prezidan Afif ler i ti dan sa Lasanble, kot i ti pe argimante lo sa zafer. Sa ti lo size en *Grant* ki Departman La defans ti sipoze gannnen avek Lenn e ki ler Bidze ti prezante, sa *Grant* pa ti ankor rantre.

Mon rapel byen ler i ti pe demande ki nou koup Bidze La Defans par retir sa konponan *Grant* ladan, akoz son lafreyer ki Ladefans ti pou'n fini depans sa larzan ki i pa ti ankor gannnen, e si i pa gannnen nou ti pou'n depans an plis.

Minis, sey eklersi nou en kou lo sa zafer donasyon ouswa *Grant* R1.1bilyon ki ou ekspekte gannnen. Ki pou arive avek sa Bidze si nou pa ganny sa larzan?

Akoz ziska la ou pa'n donn nou okenn lasirans, si ou'n gannnen, ou'n plito dir ki nou

ekspekte gannyen. Minis mon ti a kontan ou donn nou en larepons.

Aprè i annan sa lot R3.4 bilyon, Gouvernman pou bezwen al prete. Kestyon i eski nou bann Labank Komersyal i annan ankor kapasite pou pret sa kantite larzan, san ki nou sistenm banker i *crash*? Kestyon ki Minis i bezwen reponn, eklersi nou lo la. Mr Speaker i annan 2 fraz ki zot ti kontan servi dan sa Lasanble sak fwa Bidze ti vini. Enn sete tay ou palto grander ou latwal e lot sete kannson gran fon.

Minis si lasirans ti selman lo sa premye R8.2bilyon, akòz alòrs ki Gouvernman pa ti koup lo sa bann proze kapital, koup lo lezot depans ki pa vreman esansyel pou sa lannen, ouswa keksoz ki pei ti kapab esper ankor en pe letan ler lekonomi in vin pli stab, pou nou kapab fer e konsantre lo soutenir tou son pep, e fer sir ki tou dimoun i ganny en reveni ki rantre kot lakour a lafen dimwan. An dot mo, akòz Gouvernman pa ti tay son palto grander son latwal?

Akòz mwan mon'n fini war ki dan sa Bidze 'petet', sa ki met palto pou touzour met palto, tandis ki lezot pou trouv zot avek zis en kannson gran fon e bokou lezot ni menm en senbou

pou napa pou kouver zot deryer.

Mr Speaker ou konnen kwa ki mon'n vreman apresye avek nouvo Minis Finans, menm si i pa'n dir sa dan son diskour, me in omwen avoue avek lapres aswar, se ki tourizm pou reste pilye No.1 Sesel, senpleman akòz sa pei in pran plizyer lannen, pou met sa sekte, nou lekonomi kot i ete, kot i ti ete avan *COVID*.

An dot mo, in pran menm Gouvernman ki zot in fatige maltrete, e byensir bann dimoun dan sa sekte 43an pou devlop Sekte Tourizm Sesel. Me par kont ou'n dir Minis ki pou osi pran nou en kantite lannen osi pou ki Sekte Lapes i ariv lo menm nivo ki Sekte Tourizm ti ete. Me sa ki kler se ki i annan en komansman e bokou lenfrastruktir in deza komans fer pou devlop Sekte Lapes.

Mr Speaker Minis in osi koz lo sa size *outsourcing*, sirtou lo kestyon netwayaz ek sekirite. E dapre Minis, sa kantite pti kontra, par isi par la, i fer ki Gouvernman i depans bokou. En lot latak direk lo bouse manze plizyer zonn e fanm Seselwa ki avek reform 2008, ler servis piblik ti fer zot *redundant*, ti deside form zot prop pti biznes.

Minis ozordi sa bann pti biznes netwayaz i preski dir le sel biznes Sesel ki pirman Seselwa. Ki fer sa i en latak direk lo travayer Seselwa.

Kas kontra par pti morso, in donn en bouse manze plis dimoun olye ki zis 2 pou 3 ki a manze, e ki a vin propriyeter zot prop biznes, ouswa kontinyen vin gra lo ledò malere.

Tandis ki lezot a kontinyen skente pou travay pou msye entel. Kestyon, i lekel sa enn, lekel sa msye entel, ouswa sa 2, ki zot in fini war pou donn sa bann kontra netwayaz? Ki fer sa bann pti kontrakter a bezwen forse al travay pou zot. Si par retour lepok gran blan, gran msye le marsan, 'msye mon bourzwa', dir mon kwa sa?

Mr Speaker mon pa pou kapab termin mon lentervansyon lo sa diskour Bidze si mon pa koz lo sa kriz lasante piblik ki'n tap nou pei e ozordi i pe tap mon zil natal, zil mon lanfans tre for.

Malerezman sa pti transmisyon 16an festivite ki Prezidan Larepiblik Sesel ti koz lo la, in ozordi devlop dan en bel manman lagrenn, ki menm dokter pe trouv li difisil pou opere.

Zis aköz zot lenterferans dan desizyon ki konsern

lasante piblik. COVID in vin en boubou ovif pou plizyer fanmir Seselwa. 10 dimoun in deza mor dan mwens ki 2 mwan e la mon'n tande yer ki ti annan ankor enn, e la mon tande bomaten i annan ankor enn ankor.

Sa 8 dernyen lanmor, personn pa'n fatig zot, pou mansyonn ni menm zot non parey ti fer avek sa 2 premye. Sa 8 in senpleman zis bann *statistics*. Lekel ki pe *rule border* bannla? Nou servis Lasante pros pou ariv lo son zenou. Nou bann ners ek dokter zot in osi, ki ti sipoze pe sonny dimoun, zot, zot pe ganny enfekte zot osi e pe menm enfekte pasyan ki'n sipoze pe vin rod gerizon kot zot pou en lot maladi.

Zis aköz politisyen dan Gouvernman LDS, i depi premye ka transmisyon kominoter le 28 Desanm lannen pase, zot in kontinyelman enterfer dan bann desizyon lasante piblik.

Desizyon okenn dokter in touzour si en dimoun i maladi bezwen repo, i donn li son 2 zour konze. I pa gete si landrwa travay sa dimoun pou mank travayer ou pa li.

Si sa 2 zour konze pou afekte son travay, senpleman aköz i pa son konsern sa, i pa

konsern dokter sa. Sel konsern sa dokter se ki sa dimoun i malad e i bezwen son repo, i reganny son lasante e retourn normal pou li rebran son travay.

Me ozordi lenterferans politisyen pe fors dokter pran desizyon lasante baze lo priyorite ekonomik. Lavi e lasante i devret touzour reste priyorite par lao larzan.

Senpleman akoz larzan perdi nou kapab retrouv li, me lavi ler ou'n perdi ou pa kapab reganny li ankor. Si ou'n anploy en travayer pou fer larzan pou ou, me ler i malad i anmenn son douler li tousel. Donk aret zwe avek lasante dimoun zis akoz larzan.

Mr Speaker i pli fasil pou konplent e kritike ki trouv en solisyon. I gou donn lord ler ou asiz anba lavarang, kas lo senk sou e donn lord sa enn ki pe vremen travay.

Me ou lopinyon i vitman sanze ler ki ou ki bezwen travay. 7 ka COVID enporte dan nou pei lannen pase, Msye Prezidan ou ti pe kriy lasasen pou servi ou prop parol ki ou'n servi isi menm dan sa Lasanble. "Ranforsi nou gard avek en lot nivo proteksyon, kot i a permet nou ganny en serten lord e laklerte dan nou pei. E sa sete adopte pratik ki lemonn antye

pe fer aktyelman. E sa se pa lot ki *close down* sa pei. Kot tou dimoun i a reste se zot pou minimonm 15 zour." Sa ti ou prop parol msye Prezidan. Me repons Komisyoner Lasante sa letan, sete sa moman pou arive ler nou detekte premye ka transmision kominoter.

Erezman gard e sirveyans bann travayer Lasante ki enkli Komisyoner Lasante, zot ti'n nobou tenir sa parkour. Me parey nou tou nou konnen, maler pa averti. Le 28 Desanm Sesel i rikord son premye ka transmision kominoter.

Me malerezman msye Prezidan, ziskan ozordi, malgre deza 12 nou frer e ser Seselwa in perdi zot lavi. Ziska ozordi msye Prezidan ou pa ankor kapab ganny kouraz pou ou *close down that country!*

Eski ou konnen ki kantite soufrans sa in anmennen pou sa bann fanmir? Akoz lanmor avek COVID i pa parey nenport ki lanmor, sa bann dimoun zot mor zot tousel dan soufrans, san enn zot pros o bor zot.

E ni menm lekor zot pros zot pa trouve. Mon konn dimoun ki ozordi i ankor pe kont tou kwen dan lakaz, akoz i pa ankor kapab war lekor son manman ...

**MR SPEAKER**

Onorab ou'n ariv 30 minit.

**HON CHANTAL GHISLAIN**

... pou li kapab dir en dernyen orevwar. I pli fermal ler i mazin tou son mizer lanfans, tou mizer ki zot in sibir ansanm koman en fanmir. E ozordi zot separ pou leternite, ni menm ganny sans pler lo lekore son manman i pa kapab.

Msyé Prezidan sa i fermal sa. Mon nonm ou non, akoz ou'n telman dir ki "*the buck stops at the President!*" Si olye bous zorey e sant sanson tou dil i nef, ou ti'n pran desizyon a tan depi le 28 Desanm sepa le 29 Desanm e *close down* sa pei pou vre, dimoun pa ti an regroupe le 31 Desanm pou sant la, la lannen i ale. E sirman ozordi ou pa ti pou pe koz lo sa zafer pti transmisyon festivite.

2 mwan pli tar, dimoun pa ti pou ankor pe mor, e pli move nonm kantite ka enfekte pa ti pou ankor pe tik anler menm. Me selman i donn mwan kouraz pou pa sante safwasi, me pou senpleman dir ou se ki "in tar la, in tar la."

Bann travayer Lasante in fini epwize avek lafatig zot osi. Pandan ki Gouvernman i kontinyen trenn lipye e pe zis mans lo vaksen lezot pou vremen priye ki i ariv en mirak.

Prezan mon sizere ki zot pran en pe sa larzan dan Fon COVID e asiste sa bann fanmir omwen pou anter zot pros. R25 mil mon aprann pou retir en lekore ki'n mor avek COVID La Digue ek Praslin pou anmenn Mahe pou brile.

E pou mon bann frer Digwa ek Digwa, ki swa pou reste Mahe ouswa La Digue, ki'n pran zot en patant maltret nou prop frer e ser Digwa lo rezo sosyal zis akoz politik, e sa i aplik pou tou, pe enport si ou US, LDS, One Seychelles, Lalyans, nenport kwa. Mon annan sa pou dir zot. Mazinen ki nou viv lo en zil nou tousel. Nou tou nou bezwen travers menm zistans lo kannal pou ariv grand ter Mahe. Depi byen, byen lontan nou'n konekte dan en fason ou en lot avek kanmarad.

Ki swa nou fanmir, vwazen, zanmi lekol, an dot mo, nou bann paran, zanmi e konesans. Pa akoz ozordi ou get lalin par lao kot ou reste Takamaka, Baie Lazare, Port Glaud, Glacis ou war en lalin e mon osi mon reste La Digue mon war lalin, ki i vedit sak distrik i annan en lalin, donk nou pa bezwen pou kanmarad.

**MR SPEAKER**

Onorab koupe. Onorab.

**HON CHANTAL GHISLAIN**

Nou pas dan menm semen toulezour. Mon pe fini Mr Speaker.

**MR SPEAKER**

Ou a terminen silvouple. Ou pe al tro lwen.

**HON CHANTAL GHISLAIN**

Mon pe fini Mr Speaker.

**MR SPEAKER**

Mersi.

**HON CHANTAL GHISLAIN**

Mon pe fini la mwan Mr Speaker.

**MR SPEAKER**

Mersi.

**HON CHANTAL GHISLAIN**

Nou pa parey Mahe, me kominote vreman diferan avek lezot. I tre fasil parey ozordi, kot dan lespas 1 erdtan nou konn tou ki malad ek *COVID* e tou sa ki dan maler. An dot mo, maler in frape ozordi, malerezman nou war nou, nou tousel lo nou zil, nou pe soulaz soufrans kanmarad.

Ki Bondye i kontinyen donn sakenn de nou plis lasazes, kouraz e en grander lespri pou rekonnet sa, ensi ki

vwar pli kler ki ozordi. Mersi Mr Speaker.

**MR SPEAKER**

Mersi. Onorab Mondon

**HON TERENCE MONDON**

Mersi Mr Speaker Bonn apre midi Minis avek ou delegasyon, tou bann koleg *MNAs*, zabitan Takamaka byensir e tou dimoun ki pe ekout nou.

Mr Speaker, permet mwan dabor pou remersye Minis pou prezant avek nou Lasanble Nasyonal en Bidze ki enspir lespwar parmi diferan kous nou popilasyon.

Ser, Frer, Seselwa mon pran laparol pou donn mon reaksyon lo Bidze 2021 anliny avek bann diferan stratezi e linisyativ ki'n ganny propoze.

Mr Speaker, Minis in prezant nou en Bidze avek en defisit total 15.3 poursan *GDP* pou sa lannen 221, ki reprezant en sonm R3bilyon, 417milyon ki Gouvernman i bezwen prete pou kouper depans pei.

Sa i pou fer ki nou det pou *GDP* pou sorti 99.4poursan pou lannen 2020 pou vin 108.4 poursan pou lannen 2021 ki ekivalan a en sonm R18 bilyon 85milyon. Mr Speaker, sa 2 endikater ekonomik i devret fer nou konpran gravite sityasyon

ekonomik e finansyel ki nou pei pe fer fas avek.

Ler det *GDP* I depas 100 poursan, i vedir ki nou bezwen pran bann desizyon ki *tough* pou redress nou lekonomi. Sa i en realite ki nou bezwen viv avek pou sa lannen, e mon apresye vwar ki Gouvernman pe atak sa sityasyon dan en fason brav e direk.

Priyorite bidzeter pou 2021, se pou premyerman relans nou lekonomi dan bann sekter pli prodiktiv. Sekter Lapes, Lagrikiltir, Sekter Finansyel e Lekonomi Digital.

Dezyenmman pou redwir depans Gouvernman lo diferan nivo. I enportan pou nou pep konpran ki en pei pa kapab soutenir son lekonomi si son depans i bokou plis ki sa reveni ki i kolekte.

Atraver Bidze 2021, Gouvernman in met an plas bann mezir apropiye pou redwir defisit fiskal pou sorti 15.3poursan pou vin 8 poursan an 2022 e 2 poursan an 2023.

Mon napa okenn dout, ki Gouvernman *LDS* pou realiz sa bann target ki zot in fikse pou met nou pei lo en nivo soutenab.

Minis in pronons son langazman, dan en fason for, lo en seri mezir ki son Minister pou adopte, pou redwir depans

Gouvernman. Premyerman met en fren avek gaspiyaz, retir labi e bann pratik koronpi ki egziste en pe partou dan Gouvernman.

Dezyenmman adres problemn koripsyon a tou nivo. E trwazyenmman met an plas program ki pou retir depandans lo sistenm *welfare*. Mr Speaker, labi e gaspiyaz e bann pratik koronpi dan Gouvernman in egziste pou plizyer deseni e napa en Prezidan ni menm en Minis dan lepase ki'n admet ki annan koripsyon dan Gouvernman

Zot in plito fer seselwa krwar ki koripsyon i zis en persepsyon. Me ler nou mazin tou sa bann kare later ki'n ganny partaze ant dalon, e ler en sel dimoun in ganny ziska 4 morso later lo konblaz, nou pa pe koz persepsyon. Nou pe koz koripsyon dan son realite.

Mr Speaker, pandan sa letan en kantite antreprenner seselwa ti monte desann pou rod en morso later pou fer biznes Bokou parmi zot, pa'n zanmen ganny asiste.

Distribisyon later leta i ranpli avek tranzaksyon koronpi e sa in kontinyen ziska menm lavey eleksyon 2020. Bon zesyon bann byen Leta i esansyel pou byennet nou sosyete.

Minis Finans, in eksprim konsern lo proteksyon byen piblik e donn son langazman pou pran aksyon sever kont okenn dimoun ki swazir sa semen dezounet.

Minis, mon salye ou pou sa langazman e mon pou demann ou ki ler en ka parey i ariv devan lo ou latab, pa ezite pou fer sa ki byen. Les ou ganny gide par bann prensip nob ki'n fer ou ganny swazir pou pran sa pozisyon enportan dan nou Gouvernman. Mazinen, ki ou toultan kapab kont lo mon sipor lo sa size.

Mr Speaker, Bidze in fer provizyon pou en sonm R3 bilyon 85milyon pou *procurement* e sa i reprezant 28 pousan nou Bidze Nasyonal.

En sonm sibstansyel. E Minis in dir nou ki bann servis ki Gouvernman pe peye anba sa alokasyon i deza tro ser. Mr Speaker,

I kler ki sa bann servis in vin bokou pli ser ki i ti devret. Menm si kou lavi i reste en fakter enportan dan pri ki en servis i ganny ofer i annan lezot fakter ki pe kontribye pou fer pri monte.

Move planifikasyon i fer ki bokou proze distrik i trennen, parfwa 2 ou 3 kontrakter pou konplet en sel proze. Faver ek

gous ki deza en norm dan sistenm i vin osi avek en pri.

I annan osi sa latitud lesefer e endiferans ki serten travayer dan servis piblik i pran anver zot travay. Napa sa lentere pou rod en meyer *deal* avek larzan piblik.

Mank sipervizyon lo bann proze e servis. Si ozordi, kontrakter pe ganny demande pou tir portre zot travay e anvoy kot lazans olye fer bann vizit regilye, nou kapab konpran akoz ki Seselwa pa pe neserman ganny valer pou larzan dan serten servis.

Mr Speaker, Gouvernman i bezwen R301milyon pou pey bann servis netwayaz dan nou bann distrik.

Ler mon pran en legzanp servis netwayaz semen dan mon distrik, pou netway semen depi Gran Polis ziska Loter Bougainville ki enkli netwayaz Quatre Bornes Santral ti pe kout Gouvernman R95mil par mwan e sa travay ti ganny fer par en sel kontrakter.

Me tou dernyerman, LWMA in separ sa gran morso semen en 5 morso e sa pe kout Gouvernman en sonm ki depas R400mil mwan. En logmantasyon, plis ki 400 pousan pou menm travay. Kestyon ki mon demande, eski sa lazans i vremen konsyan

limitasyon nou resours? Sirtou avek sa sityasyon ekonomik e finansyel ki nou pei pe fer fas avek. An plis ki sa, sa bann nouvo kontra in ganny donner an Novanm 2020, dan en moman kot nou pei ti'n ariv lo son zenou.

Mr Speaker, ler mon konpar pri servis netwayaz lo en lans dan mon distrik. Pou netway 500m lans pe kout Gouvernman R71mil par mwan e ler mon konpar netwayaz semen avek netwayaz lans, an term depans e letan ki pran, i kler ki Gouvernman pe pey bann pri fou pou serten servis netwayaz.

Minis in rekonnet ki lalwa *procurement* i bezwen ganny revwar pou pran kont serten kontrent e difikilte ki bann Minister Departman e Lazans i rankontre.

I enportan pou note, ki dan tou rapor oditer zeneral, mon'n vwar ki Lalwa *Procurement* pa'n ganny respekte dan plizyer sikonstans. Me sa ki pa akseptab, se ler nou vwar ki *procurement* i ganny fer san en lagreman oubyen en kontra valid.

*Direct bidding* i kontinyen ganny fer san en laprouvasyon neserer. E i annan ki'n menm fer *procurement* san okenn

kotasyon. I enportan pou senplifye lalwa otan ki neserer, me an menm tan mon ekspekte ki bann prosedir sistenm kontrol i ganny mentenir.

Mr Speaker, Bidze i fer provizyon pou en sonm R79 milyon pou Departman Prizon, e la mon oule dir, atir latansyon Minis ki i annan gaspiyaz e bann lezot tranzaksyon malonnet ki pase dan sa landrwa.

Mr Speaker, Bidze i baze lo serten ekspektasyon lo performans bann diferan sekter nou lekonomi e byensir, si napa touris ki vin sesel nou problem pou agrave.

Me menm si sa i arive, napa nanryen ki pou fer nou lekip *LDS* perdi lespwar o kontrer, *LDS* pou debout for akote nou Prezidan pou sirmont bann defi ki nou rankontre. Se sa determinasyon sa parti ki'n pran gouvrenans nou pei. Inital zot esey montre ledwa lo *LDS*. Seselwa i konnen ki sete Gouvernman *US* ki'n pran sa bann desizyon lo *FA4JR*, kot zot in favoriz serten dimoun ki zot konekte avek, donn *minimum* sa pli gran group ki pli vilnerab e pini serten ki pa dan zot faver.

Mr Speaker, mon konnen en letablisman touristik dan mon distrik ki pa'n ganny asiste pourtan sa lotel ti pe anploy zis

Seselwa. Seselwa i konn tre byen ki rapor *FA4JR* pann zanmen ariv kot nou Lasanble menm apre ki nou Lasanble ti'n dizourd. Ozordi, Seselwa pe demann zistifikasyon akoz ki serten biznes byen solid finansyerman, in ganny asiste avek bann gro sonm larzan anba *FA4JR*?

Sa en lot dezapwentman pou nou pep, en dezapwentman pou bann *self-employed* ki ti ganny anvoye kot *Welfare* e tou bann ki'n zis monte desann san okenn rekour.

Zot ti dizourd nou Lasanble anba fo preteks pou zot pli donn pli byen bal dan larzan piblik. Nou dan *LDS*, nou konpran tou bann manev Gouvernman *US*, me malgre ki zot nepli o-pouvwar, zot pou bezwen rann kont avek sa pep.

I kler, ki si Gouvernman *US* ti'n azir responsab avek larzan *FA4JR*, ozordi nou ti ava dan en pli bon pozisyon pou asiste bann biznes ki pe ganny bokou afekte.

Me a mwen, nou Gouvernman pou la akote bann biznes dan sa parkour difisil. Mr Speaker, pandemik *COVID-19*, i fer nou realize ki nou kapab adapte avek sironstans, e ki nou kapab fer bokou plis ler nou met zepol ansanm e partaz

nou konesans e nou abilite ek leksperyans.

Wi, nou'n ariv a en pwen retour kot nou bezwen nouvo lapros e meyer fason fer keksoz.

Ozordi, i sa moman pou nou anbras sa monn teknolozi lenformasyon dan tou son dimansyon e mon apresye vwar ki Bidze 2021, pe met bokou lanfaz lo *electronic government* akoz se sa lakle sa transformasyon ekonomik ki nou pei i bezwen.

Mr Speaker, i enteresan pou vwar ki kantite keksoz ki kapab ganny akonplir, ler lavi en pep i ganny menase. Se pa zis vaksen kont *COVID-19* ki'n ganny devlope dan en lespas letan sitan kourt.

Bokou biznes atraver lemonn, in vwar zot pe adapte e enplimant konseps travay kot lakour dan en kourt letan. Sa i montre ki nou zonm, zonm i annan kapasite pou fer bokou plis anba bann kondisyon difisil.

Nou bezwen senpleman, en sanzman dan persepsyon, dan nou *mindset* e konportman, pou retir benefis sa sityasyon difisil ki nou pei pe traverse.

Ler nou koz lo travay kot lakour, nou pe ekspekte ki bann profesyonnel dan *IT* ek biznes i sezi sa loportinite, pou kree sa lanvironnman nesaser

pou travayer e anplwayer adapte avek sa nouvo fason travay.

I annan bokou benefis pou en travayer ou en anplwayer ou menm en fanmir, ouswa en biznes retire avek dan travay kot lakour. Prezans en paran kot lakour ler zanfan i sorti lekòl, i permet posibilite laprantisaz, posibilite pou redwir depans operasyonnel pou en biznes. Travay kot lakour i osi ede pou redwir konsesyon trafik en transport an mwens lo semen toulezour, i en soulazman pou lezot motorist.

Dan sa nouvo lanvironnman, i enperatif ki biznes i devlop zot abilite pou adapte e reponn a nouvo legzizans. Biznes i bezwen konfortab avek sanzman. Biznes i bezwen reazir vitman ler en problem i aparet e ler en loportinite i fer sirfas. Biznes i bezwen reste *proactive* e desiziv a tou moman.

Nouvo ladministrasyon LDS i rekonnèt valer teknolozi modern, e osi nesese pou adopte teknolozi ki reponn pli byen a nou nouvo legzizans.

Mr Speaker, an Novanm lannen pase, mon ti anmenn en Mosyon devan sa Lasanble, pou demande ki nou fer Sesel vin sa landrwa ki fasil pou fer biznes.

Mon ti servi legzanp biro Rezistrar kot i annan en nesese pou sezi tou bann servis ki sa biro i ofer e met lo en platform elektronik kot kliyan i ava kapab ganny akse direk *online*. Mon ti osi dir ki nou devret develop plis platform elektronik, pou ranforsi enteraksyon ant kliyan ek bann diferan antite piblik e prive.

Mr Speaker, i fer mwan gran plezir pou vwar ki sa nouvo ladministrasyon LDS, i rekonnèt ki Sesel i devret vin en landrwa kot i fasil pou fer biznes. E mon konnen ki Prezidan Larepublik in eksprim son swe ki Sesel i vin omwen egal avek *Maurice* lo klasman *ease of doing business*.

Se sa lavolonte politik nou Prezidan pou amelyor lanvironnman biznes dan nou pei. I enportan pou note ki Gouvernman LDS pa rod okenn leskiz me plito rekonnèt ki Sesel in plase 100enm lo klasman *Ease of doing business*, tandis ki *Maurice* i plase 13enm.

Pou lenformasyon mon bann koleg dan US, sa rapor in fini ganny adopte, e klasman i ankor parey eksepte pou sa 4 pei ki ti konteste pou rektifye lenformasyon ki ti ganny servi dan sa rapor.

Alor, mon repete Sesel i plase 100enm e *Maurice* i plase

13enm lo klasman *Ease of doing business*.

Mr Speaker, Ledikasyon nou zanfan; Lekol i landrwa kot rev en zanfan i komanse e lekol i en landrwa kot nou devret fer sa bann rev vin vre. Nou bezwen komans enspir nou zanfan pou develop serten dedikasyon, nou bezwen nourri zot limazinasyon pou zot kapab rev pli gran e ki zot osi travay pou realiz zot rev.

Bann analiz ki'n ganny fer ziska la, i permet Gouvernman pou konnen kwa ki marse e kwa ki pa marse dan nou sistenm ledikasyon me sa dan li menm i pa ase.

Mon krwar ki nou bezwen fer plis. Nou bezwen servi nouvo teknolozi koman en zouti pou ogmant nivo laprantisaz. I pa sifi pou zis met en *computer* dan en laklas. I nesese annan plis lantrennman pou bann ansenyan lo fason servi en *computer* ek son teknolozi, pou rod nouvo e meyer fason pou edik nou zanfan. Meyer metod laprantisaz ki pou fer nou zanfan pli angaze, demann plis kestyon e rod solisyon.

Nou bezwen osi rekonnet ki serten bon lide dan ledikasyon, pa sorti kot Minister me dan bann lekol. Se pou sa rezon ki Minister i devret

osi servi leksperyans lekol prive kot i posib.

Mon krwar ki bann lekol piblik i bezwen en nouvo souf. Si nou anvi donn nou zanfan en meyer sans posib dan lavi. E si nou oule ouver laport loportinite pandan ki zot ankor zenn e donn zot sa *skill* pou zot reisir demen, enn nou pli gran responsabilite koman paran, koman Gouvernman, koman sosyete, se pou fer sir ki tou zanfan Seselwa i annan akse avek teknolozi modern.

Mr Speaker Bidze ki'n ganny prezante pou sa lannen, in met lanfaz lo serten travay enportan ki bezwen ganny akonplir pou ranforsi proteksyon nou bann lakot, kont sanzman klima. En zefor ki bezwen kontinyen anvi ki Sesel i parmi bann pei pli vilnerab kont sanzman klima.

Mr Speaker, lenerzi soler i en sours lenerzi ki annabondans dan nou pei e ki devret vin nou sours prensipal pou lenerzi. Nou pa kapab kontinyen depan antyerman lo prodwi petrol kan nou annan en meyer alternativ.

Mon santi ki sa nouvo Gouvernman i bezwen fer plis e pran en pozisyon for pou fer sa diferans. Nou fitir zenerasyon pe depan lo nou ozordi pou

adopte lenerzi ki prop e abordab pou lavenir.

Ser zabitan Takamaka, mon rekonnèt ki nou annan bokou proze semen ki ankor lo lalis espere, e avek sa kontrent bidzeter, okenn proze semen pa pou ganny realize dan nou distrik sa lannen. E la mon pe mazin sirtou semen Alcide Rose ki'n lo lalis pou plis ki 20an.

Mon mazin sa 2 zabitan byen aze ki'n ariv dan son 80 an e zot vwazen ki depan lo en sel kote lipye ki bezwen travers en pti santye avek bokou difikilte. Mon ekspekte ki osito sityasyon i amelyore, sa group zabitan i ava ganny en semen konvenab.

Sityasyon lakaz i reste en gran konsern dan mon distrik. Mon swete ki ansanm avek Minister responsab pou Later ek Lozman, nou ava kapab trouv en debousman pou bann morso later Leta ki trouve dan distrik.

Lazenes Takamaka, debout for e sezi tou loportinite pou develop ou kapasite. Avek sipor nou Gouvernman, mon annan konfyans ki nou pou kapab anmenn plis devlopman dan nou distrik.

Pou konklir Mr Speaker, lamazorite dimoun ki mon konnen, pa pe ekspekte ki Gouvernman i rezourd tou zot problem. Zot konnen ki zot

bezwen travay dir pou zot avanse e zot anvi travay.

E ler mon koz ek biznesmenn seselwa zot dir ou ki zot pa anvi larzan taks i kontinyen ganny gaspiye e zot pa aksepte ki larzan piblik i ganny servi pou pey bann gro biznes ki pe gard tou zot profi aletranze.

E ler ou koz avek en vye paran, en vye ansenyan zot pou dir ou ki Gouvernman tousel pa pou kapab fer nou zanfan aprann. Zot konnen ki paran i bezwen azir koman paran, e zanfan pa pou akonplir bokou si nou pa elev zot ekspektasyon.

Wi Mr Speaker, lamazorite dimoun pa ekspekte Gouvernman ki fer tou pou zot, me zot krwar ki avek sanzman dan bann priyorite bidzeter e avek nouvo fason fer, tou nou zanfan i ava kapab ganny en meyer sans dan lavi, e ki laport loportinite i ava reste ouver pou tou seselwa. Nou pep i konnen ki nou kapab fer pli byen e se pou sa ki zot in swazir *LDS* pou govern nou pei.

Mr Speaker, i pa en moman pou trenn nou pep dan en politik pesimizm. Nou pep i bezwen lespwar. Sa menm lespwar ki Prezidan Larepiblik in garde tou dilon son lalit, pou arive fer sanzman dan nou pei.

Mon annan lespwar ki nou pou sorti dan sa moman difisil bokou pli for e ki Bondye pou kontinyen ekler nou pti pei Sesel avek tou son zanfan. Mon remersi ou Mr Speaker.

**(APPLAUSE)**

**MR SPEAKER**

Mersi Onorab. Onorab Desheila Bastienne.

**HON DESHEILA BASTIENNE**

Mersi Mr Speaker. Bonn apre midi Mr Speaker. Bonn apre midi Minis Hassan, *PS Thesee*. Bonn apre midi tou Onorab e osi tou dimoun a lekout e en bonn apre midi spesyal tou zabitan Ile Perseverance.

Mr Speaker avan ki mon konmans mon lentervansyon lo Bidze. Permet mwan dir en gran mersi lo Bondye papa ki'n akord mwan sa sans pou retourn isi dan sa sez kot mon pe asize la ozordi.

Mr Speaker permet mon osi profite pou dir ki letan en dimoun i malad, nou pa bat lanmen e danse lo son kondisyon lasante. Akoz napa personn ki demande pou malad tonm lo li.

Zisteman parey ti annan en serten group dimoun ki ti pe

zwaye e pran plezir lo mon maladi, e ti pe menm dir ki zot pe met pare pou fer en *by-election* dan Perseverance pou zot pran sa distrik.

En tel plan parey i montre nou ki mannyer letan dimoun i swaf pouvwar i al ziska swet maler lo enn son ser ek frer. Mr Speaker mon zis annan pou dir avek sa bann dimoun la deor, se Bondye li menm ki pou swazir mon desten. Mersi.

Mr Speaker, i fer mwan en tre gran plezir pou ganny sa privez pou aport mon kontribisyon pou la premye fwa lo Bidze Nasyonal nou pei.

Mon'n ekout atantivman mon bann koleg Onorab ki'n koz avan mwan lo sa Bidze lo tou lede kote latab. E mon santi mwan vreman fyer pou donn mwan sipor nou Gouvernman, ki dan sa moman difisil e kritik i a pe lager lebra kase, e menm pare pou pran risk pou al aletranze, pou al tap laport e rod bann fason mannyer pou arive redres nou pei Sesel.

Mr Speaker Lepep Seselwa i bezwen pran kont seryezman, sityasyon finansyer nou pei, an rezilta move governans e bokou lese fer de lapar Gouvernman ki'n la pandan sa 43an, ziska le 25 Oktob 2020 zot dernyen zour dan biro. E sa

pou reste marke koman zot dernyen zour dan biro.

Sa Bidze ki Minis Finans in met devan Lasanble Nasyonal e Lepep Seselwa, se pirman larealite lavi ozordi, e ladan in osi anmenn bokou solisyon pozitiv, ki kapab donn en komansman relev sityasyon ekonomik nou pei.

Wi mon bann frer ek ser Seselwa, letan nou ti a pe desann, tap laport par isi par laba, anpar lanmen ouver nou pers, e tal byen nou bann biye ladan, apre nou sorti dan biro an riyen latet anler tou ti *ok*. E sa letan ti napa en pli bon Gouvernman dan Sesel, akoz nou ti ape zis gannyen sak fwa nou ti bezwen.

Mr Speaker, malerezman pandan sa bann letan, person pa ti pe demande ou menm ti pe mazine, be zot kote sa bann larzan i sorti, e dan ki kont i a pe ganny tire.

Pa ti enportan pou nou, akoz Seselwa ti'n fini antre dan en *zone* konfortab, kot lavi ti fasil, e kot ler mon napa nanryen mon desann mon al rod enn pti lasistans.

Me mon bann frer ek ser, sa ti senpleman filozofi Gouvernman *SPPF/Lepep/US* pou fer Seselwa vin depandan lo Gouvernman. E sa byensir ti'n

vin en det resanz larzan pou ou vot.

E ankor bokou Seselwa ti santi li konfortab avek sa promes. Ou donn mwan larzan, mon vot pou ou.

Mr Speaker, ozordi keston ki zot pe demande, akoz ki Gouvernman pou bezwen koup lo bann lasistans, lo bann *Board*, lo bann diplikasyon dan bann Biro Gouvernman, lo bann *allowance*, lo bann Lanbasad, e bokou lezot ankor. Larepons se senpleman akoz, kof in vid e napa pou kontinyen sa kalite lavi zis donner.

Mr Speaker, Gouvernman pe osi demann nou tou, san leksepsyon pou fer sakrifis. Wi, san dout nou pou bezwen fer li pou lanmour nou pei, pou nou fanmir, e pou nou kapab ede rebatir nou pei ki'n ariv lo son zenou.

Ler kof ti plen, zis en serten ki ti pe donn bal, zot pa'n kont e konn anmenn li. E ler tou in fini, kof in vid, in nepli annan pou kontinyen partaze e fer plezir, ozordi nou war nou tou pou bezwen fer sakrifis.

Mr Speaker, mwan mon pa ti ganny nanryen dan sa bann la partaz. Mon pa'n zanmen ganny led ek sa Gouvernman ki'n sorti o pouwar mwan. Tou sa ki mon

ti sey rode atraver zot lofis ti ganny refize kareman! E tou mon bann aplikasyon ki ti al dan nenport Biro Gouvernman ti ganny desire e zet dan bin.

Mwan, mon en viktim politik. Mon'n ganny pouse de fwa dan lanplwa Gouvernman, enn fwa san lapey e san nanryen dan mon lanmen. Zis akoz mon ti koz fran e ti dir tou sa ki ti pe al mal.

Manze dan lasyet fanmir Seselwa lontan pe ganny tire anba Gouvernman *SPPF*!

**(APPLAUSE)**

### **HON DESHEILA BASTIENNE**

Sa i mon sikatris. Mwan mon en viktim lafen anba Gouvernman Lepep/ *SPPF*. Mon ti bezwen rod travay dan prive, e pa les sa bann dimoun kot mon ti pe al rod travay konnen, ki mon en viktim politik, akoz zot osi zot pa ti pou oule anploy mwan sa bann letan, avek sa lafreyer ki nou ti pe viv anba la.

Ozordi mwan osi mon pou bezwen fer sakrifis, ansanm avek sa bann ki ti'n byen pase e byen profite dan tou kote. Pou bann ki pe demande pou koup *allowance*, koup lo gro saler, wi, zot lide i bon. E mwan, mon pare pou fer sakrifis ansanm avek zot, akoz lontan mon pe fer

sakrifis. I pa pou fermal pou mwan.

Mr Speaker, sa mo fer sakrifis, pa fek ganny entrodwir anba nouvo Gouvernman. Dan lannen 2008, anba Gouvernman *SPPF*, kot tou keksoz ti a pe ganny partaze an labondans avek bi reste o pouvwar, Seselwa ti ganny dir, ser sang e fodre fer sakrifis pou relev pei.

Pourtan, Mr Speaker sa letan touris ki ti reveni prensipal, ti pe kontinyelman antre dan nou pei. Biznes ti pe kontinyen bouze e grandi, ti napa okenn lepidemi mazer ki ti pe met lemonn an retar enkli Sesel. Me senpleman dan lafason ki pei ti pe ganny dirize, nou ti war nou oblize antre dan reform *microeconomic*, e *IMF* ti bezwen mele. Sakrifis dan Sesel pa nouvo sa *mes amies*.

Mr Speaker, ozordi tou laprev sityasyon Sesel i kler lo latab. Prezidan Wavel Ramkalawan in erit en pei ki'n anfonse, e set an rezilta sa sityasyon ki atraver Bidze, Gouvernman pe forse, koupe e anmenn serten reform dan pei, pou permet ki nou rebran dousman, dousman.

Ler Gouvernman pe dir nou fer sakrifis, sa i pa vedir ki i a pe tir manze dan lasyet

okenn fanmir ouswa i pe pini Seselwa.

I a pe senpleman dir nou, konn nou priyorite, depans avek kontrol, konn servi sa pti morso ki nou ankor pe kapab gannyen, ziska ler nou ava kapab arive reganny en pe plis ankor.

Ler nou pran en latitud pozitiv, nou war lavi i vin pli fasil pou nou e nou fanmir. Si nou kontinyen, avek lapros negativ, nanryen pa pou bon, nou pou kontinyen war tou keksoz latet anba, e nou pou reste dan negativite, e dan la mizer nwanr. Sa i sa trou kot US i oule ou Seselwa ou pri ladan, dan negativite, napa nanryen pa bon.

Mr Speaker, fodre Seselwa i pran kont ki *welfare*, pa en masin ATM. *Welfare* i sipoze ganny byen zere e ed sa ki vremen merite, me pou pa depan lo la lavi diran. Dan Sesel, *welfare* ti'n perdi son vre valer, e sa ki ti vremen bezwen pa'n benefisyè.

Ozordi lanmen Gouvernman in anmare, e i pe war li oblize anmenn serten reform pou asire, ki sa ki vremen bezwen i ganny asiste e sa ki pa merite i leve e al travay.

Mon bann frer ek ser, ankor sa pa vedir Gouvernman pe tir manze dan ou lasyet, me

i a pe senpleman fer ou aprann debourye, e depan lo ou prop lekor.

Mr Speaker sa problem *welfare* i fer mwan tous en pe lo *part rental*. Wi *part rental*, in ed bokou fanmir. Dan mon distrik Perseverance i ankor annan pa mal problem lakaz.

Si nou fer en bon resansman nou pou war, ki kous la fanmir, e ki lakaz ki nou pe koz e ki laz ki nou pe koz lo la, ki ozordi pe plis afilye avek *part rental*.

Mr Speaker parey mon bann koleg Onorab in koze avan mwan, *part rental* i devret ganny regarde lo son merit, dapre saler sa paran.

E la mon pou bezwen zwenn avek Gouvernman, pou demann bann propriyeter lakaz pou sey revwar pri ki zot lwe zot lakaz, pou ed nou bann frer ek ser ki pe rod en landrwa reste pou li ek son zanfan. Pri lokasyon lakaz in tro egzazere konmela.

Mr Speaker, letan nou pe koz lo reform dan pei atraver Bidze, sa i fer mwan tous lo gaspiyaz. Mr Speaker, pa zis dan kof Leta ki'n annan gaspiyaz, ki'n kout pei ser ozordi. Fodre annan plis kontrol lo bann transpor Gouvernman e osi paraetatik.

Lanbilans ki pa pe ganny servi dan en fason apropiye, loto gard, ki ganny servi pou tranzaksyon personnel, e ler ou *call* pou en lasistans ou ganny dir napa transport pou vin lo *scene*. Kote i ete?

Transpor Gouvernman, ki pe ganny mars ladan depi bomaten ziska 6er diswar. I annan menm ki ariv dan geto dan ler travay, dan transpor Gouvernman. Zot park, fim zot lapay, apre zot pran zot letan pou zot ale. Sa ki fer zot *shopping* lakaz, dan transpor Gouvernman. Li son loto i park kot biro.

Mr Speaker, annan pe ganny *allowance* transport ziska R5600 par mwan. I vini bomaten i park son transpor anba langar, i pran transpor Gouvernman i al lo semen *full time*.

Selman i a pe ganny *allowance*, e i sipoze servi son prop transpor. Tousala se gaspiyaz e koup lo depans. Bokou zot pe fer zot *savings*, atraver *allowance* transpor tou le mwan. Se sa ki fodre ganny koupe o pli vit posibil.

Mr Speaker an sa ki konsern bann kupon pou *fuel*, la osi i annan mank kontrol. Avek pli bon kontrol ek sipervizyon entans, nou pou kapab ede elimin sa bann

gaspiyaz e koup lo en kantite depans. E tou sa bann larzan ava reste dan lekonomi pei.

Annou aret montre ledwa zis lo en ti group dimoun, lo *MNA*, lo Minis, annou koste e donn lanmen kler tors lo ankor bokou bann biro kot larzan, pe kontinyen ganny mal zere e pe kontinyen sorti anba, anba.

Zis *MNA* ek Minis pa pou arive retourn tou sa bann larzan ki'n ganny vole dan kof Leta. I devwar nou tou, pou nou pran responsabilite e anmenn nou kontribisyon nou tou ansanm.

Mr Speaker atraver serten reform ki Gouvernman in pran dan Sesel, in benefisy e ekonomiz lo bokou depans tel ki, peyman latant, Lopital Anse Royale, fasilite karantenn kot lotel *Beau Vallon Bay* e tou dernyerman, en sonm R12.2million atraver reform e sanzman lo serten *Board*.

E la Mr Speaker, atraver ou mon pou profite pou felisit sa bann dimoun, nou bann frer ek ser ki'n donn zot langazman pou deservi lo bann *Board* pou nanryen, san en lot lapey atase avek.

Frer ek ser Seselwa, nou bezwen serye nou, pa zis kritike, kontinyen demann plis kantmenm napa. Letan ou war en sityasyon pe al mal, ou pa zis

vir ou ledò e dir sa pa mon problem.

Demen ou war vol pe pase, gaspiyaz pe ganny fer, lev ou konsern, akòz si ou zis dir sa pa mon problem, mon ser, mon frer demen ou osi ou pou ganny afekte, ou saler osi pou dan problem ou osi.

Annou get leta nou pei, e ki manner nou kapab ede sipòt Gouvènmàn, elimin bann depans ki pa neser. Bokou zot la deò dan bann biro zot konnen e zot trouve kote bann keksoz pe al mal.

Pa soutire, sov ou landrwa travay kot ou pe ganny ou dipen ek ou lasyet manze. Met sa bann keksoz dan latansyon sa ki responsab, e demen ou avay fyer ou menm ki ou'n apòrt ou kontribisyon pou sov ou pei ek ou saler osi.

Mon lans en lapel, avek mon bann frer ek ser ki ti'n les zot lebra tonbe. Ki anba sa nouvo Gouvènmàn, keksoz pou diferan. Pou annan en dimoun ki pou ekout tou zot konsern.

Mr Speaker, atraver ou mon krwar ki ti avay bon ki Gouvènmàn i etabli en landrwa en departman, kot bann rapòrt e konsern i ganny anmennen, akòz bokou dimoun pa konnen kote pou anmennen serten konsern, ki annan pou

fer avek bann vol, koripsyon e gaspiyaz ki pe pase dan zot landrwa travay.

Mr Speaker ler nou pe ede anrisir lekonomi nou pei dan nenpòrt ki kontribisyon, nou pe ed Gouvènmàn finansyèman pou kontinyen dan bann devlopman nou pei. Tel ki plis konstriksyon lakaz, pou asiste nou bann fanmir ki pe esper en lakaz abòrdab.

Mr Speaker letan Prezidan Ramkalawan i propoz bann devlopman ankourazan, pou nou dekouver bann sours ek posibilite anmennen larzan dan nou pei, mon demande be akòz sa pa ti parmi priyorite bann Dirizan ki ti la pandan sa 43an, apard ki zis apiy lo touris ek lekspòrtasyon nou pwason.

Mr Speaker letan mon ti ankor zanfan, mon ti toultan tann mon granmanman koz lo son travay e sa ti bat kannel. E mon gran manman ti en madanm for, ranpli avek zwa de viv, e pa ti zanmen tann li konplent lamizer.

Apard kannel i ti koz lo fey patsouli, delwil koko, lesans kannel, kopra, tousala ti ganny ekspòrt e Sesel ti ris avek deviz. Pandan letan ki mwan mon ti anploye avek *Barclays Bank*, tou le 4 mwan dan lannen nou ti apel sa *quarterly return*, nou ti rapatriy deviz

etranzer;- Tel ki, Liv Sterlen, Dolar, Fran Swis, Dolar Sengapour, e bokou, e bokou lezot deviz, akoz nou ti annan tro bokou dan reserve.

Mr Speaker mon pe koz ou lannen 1987, an montan. Sa bann deviz ti antre atraver touris, wi, ek nou bann prodwir lokal ki nou ti vann lo marse lokal e enternasyonal.

Ozordi tou sa bann prodwir nou ankor annan dan Sesel e nou kapab rekomans eksplwat zot pou ganny larzan. Sa i pa en louvraz dezoner. O kontrè i pou ede anmenn manze lo latab e deviz dan pei.

Mr Speaker, mon kontan tande ki nou lagrikiltir pe al relanse lo en pli gran lanplè, lo serten nou bann zil ki ava anmenn ankor bokou travay pou nou bann Seselwa.

Sa i ava permet nou vin otosifizan dan nou bann prodwir lokal, e bes lo lenportasyon, lavyann, legim ek fri, ptitapti.

Mr Speaker lo nivo mondyal Sesel i trwazyenm lo vaksinasyon son pep. Sa i lakonplisman en Gouvernman ler i pran sa linisyativ pou sov son pep kont en lepidemi an premye.

I fer mwan vreman fyer e mon konnen ki mon bann frer ek ser Seselwa osi i santi parey.

Mersi Prezidan pou sa. Ser, frer Seselwa rezilta nou vaksinasyon i en fason retourn touris dan nou pei, en pti pe pli vit pou ede redres nou lekonomi. E mon dir zot tou en gro mersi pou fer sa pa, pa zis pou zot lasante, me osi pou lavenir nou pei.

Mr Speaker, aprezan permet mwan koz en pti pe lo mon distrik Ile Perseverance, Ziska prezan bann zabitan 60an an montan dan Perseverance, in ganny sa sans pou zot pran zot vaksen. E mwan mon pou sezi sa lokasyon pou felisit zot tou bann zabitan ki'n pran zot premye doz. E mon swete ki tre byento bann zanfan ek lezot zabitan dan Perseverance zot a ganny zot vaksen zot osi.

Aksyon kont trafikèr drog pe ganny pran, e nou pou war plis ankor. La mon pou profite pou dir ki tre byento biznes vann drog bann kwen laboutik, dan sed, dan serten flat, dan bann *staircase* dan Perseverance, pou arete e lapolis ek zofisye ANB, zot pou bezwen pran aksyon apropriye ler zot ganny apele e zot ganny demande. Fodre met en lafen avek sa bann vander drog ki pe afekte bann zenn dan Perseverance.

Mr Speaker ler nou koz lo leve debourye ek sa sityasyon difisil ki nou ladan, bokou zenn ek pti biznesmenn dan Perseverance i le travay, me zot war zot lanmen anmare akoz zot napa fasilite pou fer zot ti biznes.

Dan Perseverance i annan bokou later ki zis la e i get abandonnen. Me ler nou rode, nou al dekouver ki sa bann bout later in fini ganny fer kado, ouswa in ganny vann avek en dimoun prive, ki pa ni menm enterese pou fer okenn devlopman lo sa later pou le moman.

Zabitan Perseverance pe monte desann, pe rod landrwa, pou zot etabli zot pti biznes, tel ki en pti garaz, latelye sarpantye, *hairdresser*, *barber*, latelye koud, patisye, vann manze, en pti laklas *computer*, *daycare center* e plizyer lezot travay ankor.

Menm bann ki'n deza annan enn pti biznes, zot ti ava kontan ganny en pti plas kot zot ti ava kapab fer en *store*, pou zot met zot bann zouti ladan.

Zot bezwen anpli tou sa bann keksoz, dan bann *staircase* kot flat e sa i koz lannwi ler lezot, dimoun i bezwen pase.

I annan ase landrwa dan Perseverance pou fer sa, me i

depan lo Gouvernman pou donn permisyon sa Minister konsernen pou reazir lo sa bann demann o pli vit posibil.

I bon note, ki sa bann ti biznesmenn e menm bann madanm dan biznes, in menm dir ki zis donn zot, zot pti landrwa ek permisyon Gouvernman ek *Planning*.

Nou ava war ki mannyer zot ava devlop zot prop landrwa pou anmenn travay dan distrik, kot zot ava kapab anmas bann zenn, ki pe rod en travay e tir zot dan semen ek anba laboutik.

Mr Speaker, mon pe lans en lapel avek Minister pou Later, pou vin fer en lodit lo bann later dan Perseverance, o pli vit posibil, pou gete lekel bann later ki pa ankor devlope, e pou donn avek bann Perseverance ki pare pou devlope e kree travay dan zot distrik.

Bann later ki tonm anba *EIA* kot annan parmi, ki sipoze anba *lease* in menm ganny vann avek etranze. Sa ti sipoze proze Seselwa.

Annan dimoun ki'n pare pou debourye dan Perseverance, me pe demande pou larg zot lanmen silvouple. Enn bann propozisyon se pou kree en *zone* endistriyel dan distrik, avek preferans pou zabitan Perseverance, pou zot

devlop zot talan e anmenn lanplwa dan zot distrik.

Mr Speaker plis ki 10an pase, nou bann peser ek zabitan Perseverance pe esper en bazar ek en fasilite pou netway pwason, sirtou pou anmenn konfor pou bann zabitan ki reste anler dan flat.

Bazardye, bezwen en landrwa konvenab pou vann zot legim ek zot fri. Lapolis pe esper en Kordgard pli konvenab. I mank en *fire station*, e osi en klinik.

Lenfrastriktir pou liber 14 lakaz, ki pe ganny servi koman biro e sa ava anmenn soulazman pou 14 fanmir ki pe esper lakaz.

Mr Speaker lakaz dan Perseverance en lot soufrans ankor. Letan nou pas kot bann fanmir, tro bokou *overcrowded homes*. Dan Perseverance nou bezwen ankor, enn de *unit social housing*, pli enportan e pli vit ki *self-financing houses* la an se moman.

Mr Speaker, i annan lakaz ki pe reste 15 a 18 dimoun e sa i vremen deplorab, i terib. I tris pou vwar sa bann fanmir ki manner zot dormi. Fodre ki Gouvernman i get ankor dan proze lakaz dan Perseverance.

*Binsite* i en gran konsern dan Perseverance, i tro pre ek lakaz e annan dimoun pa

responsab, ki zis pase dan loto, ouswa zot debout en zistans e zot balans sak salte ki tonm devan laport zabitan.

Plis *speed bump* i bezwen dan Perseverance, ek *zebra crossing*. Transpor nek i fer vites. En pli bon sistenm *maintenance* lo sa bann *street light*. I devret ganny met an plas o pli vit posibil.

Akoz laplipar ditan, Perseverance aswar i dan fernwanr e sa i anmenn bokou lenkyetid pou bann zabitan, zot bezwen dormi en kote zorey pou vey voler ek bann taker.

Mr Speaker, mon pa pou kapab terminen san mansyonn bann zenn. Mon anvi fer en lapel, ki dan Perseverance i annan en bon pe zenn e napa nanryen pou zot.

Mr Speaker la ki spor, dan tou distrik in tonm anba Minster Lazenés ek Spor, mon ti ava enplor Minis ki zenes Perseverance i ganny gete.

Donn Perseverance en *multi-purpose court*, en bon landrwa kot zenn ava kapab rasanble, lev spor, kiltir ek lezot klib rekreasyonnel.

Nou annan bokou zenn avek bann talan ekstraordiner, ki'n pare pou vin devan e ede dan Perseverance, me napa landrwa.

Mon enplor Gouvernman pou regard Perseverance, e donn li son valer koman en gran e zoli distrik dan sesel. Zabitan Perseverance, dan sa Bidze i annan en alokasyon pou Perseverance. E sa i ava ganny met lo latab letan bann Minis ava vin dan Lasanble tre byento.

Mr Speaker pou terminen, mon bann frer ek ser Seselwa, bann zabitan Perseverance, mon konnen ki i pa fasil la pou pran sa bann desizyon. Pa bezwen dekouraze, mon pe demann zot pou pasyante e swiv byen sa ki pe arive dan pei.

Nou Gouvernman a pe fer tou pou remet Sesel lo son lipye. Mon pe demann zot pou zwen nou dan sa lalit, akoz sesel i pou tou son zanfan, demen ou ek mwan nou ava fyer pou erit nou prop kontribisyon.

Ki Bondye i beni nou pei Sesel, i beni tou Seselwa, i beni nou Gouvernman e osi tou zabitan Perseverance. Mersi Mr Speaker.

**(APPLAUSE)**

**MR SPEAKER**

Mersi Onorab. Nou ava pran poz la e nou ava rezwenn 4er.

**(BREAK)**

**MR SPEAKER**

Onorab Egbert Aglae.

**HON EGBERT AGLAE**

Mersi Mr Speaker. Bonn apre midi tou Manm Onorab, zabitan Port Glaud e tou pep Seselwa ki a lekout. Mr Speaker, Onorab ki'n koz avan mwan, in fer resorti ki nou dan *US*, nou zis negativ e dir ki tou keksoz pa bon. Me ki zot bliye poudir ler zot ti dan Lopozisyon, se zot ki ti kritike pou dir tou keksoz ki sa Gouvernman ti fer pa ti bon. Fodre pa ki nou bliye sa.

Mr Speaker koman en reprezantan Parlman mon kontribisyon an se ki konsern sa Bidze, ki mon'n war ki napa okenn tenm pou sa Bidze, petet en tenm apropiye se Bidze sakrifis malere.

Akoz zis serten ki pou bezwen fer sakrifis. E menm 2021 Sesel pa ankor adopte en tenm Nasyonal, petet zot ankor pe mazin lo la. Me sa enn ladres Bidze i pa'n zanmen parey sa bann lezot ladres oparavan, sa i akoz larealite ki nou pa kapab kasyet. Se ki pei e lemonn global pe war li pe fer fas ek en pandemi.

Kot nou tou nou pa ti pe ekspekte li ariv lo sa nivo. Me sa ki enkyetan ozordi, se ki laras imen pe ganny afekte, lanmor

pe ganny arive, nou lekonomi in ganny afekte, nou lavi in sanze, kou lavi in monte drastikman.

Lasante nou pep i an danze, ledikasyon nou bann etidyan pe ganny menase, e pli pir, nou frer e ser in perdi lavi. Preske enn nou bann frer pe perdi lavi, tou le dis zour dapre lanaliz statistik *COVID* pou Sesel.

Mr Speaker, malgre mon le souliny lenportans Bidze en pei, pli gro lenportans se ki manner i enpakte lo tou kous nou sosyete. E ki manner i pou ede amelyor lavi nou pep, akoz se la kot tou depans en pei sorti, depi saler, finansman pou nou bann striktir Leta ki an plas, bann laspirasyon e vizyon devlopman sa pep e osi soutenir nou bann det. Tousala i sorti dan en Bidze.

Me eski sa Bidze pe anmenn tousala? Larepons i non. Parfwa nou koz lo larzan gaspiyaz, milyon isi, milyon laba. Sa i tro bokou, ouswa koup isi, koup laba san nou fer gran lanaliz ki manner nou'n arive pou tonm lo tel, ou tel sif. E ki bann rezondet par deryer? Konmsi sa larzan pe ganny servi lo en lot Nasyon Seselwa ki viv lo en lot plannet.

Mr Speaker legzanp i la e mon pou sit enn de legzanp taler, bann lipokrizi politik

larzan, *LDS* in anmennen dan sa Lasanble.

Mr Speaker, wi *US* pou kontinyen kritike, me nou pou kritik konstruktivman. Me lefe i reste, se ki pou annan en Bidze tou le lannen, i bezwen annan koleksyon reveni ki swa atraver nou sistenm taks, bann resi ki Gouvernman i kolekte, bann lavant ki osi ki ganny fer par Gouvernman, ek bann lenvestisman ouswa don ki en pei i resevwar atraver bann lyen diplomatik, ouswa bann negosyasyon biznes. Me si governans pei in sanze, ozordi se menm formil ki ankor egziste. Alors napa gran sanzman ki'n arive.

Mr Speaker, ler *LDS* ti dir kof i vid, i vedir tou sa bann eleman ki mon'n mansyonnen avan, pa pe marse, ki i pa leka akoz Sesel ankor pe ganny bann *good index rating* enternasyonanman, eksepte pou *management COVID transmission rate* ki nou pei i preski *top* lo lendeks.

Dan lot kote, nou vwar devan nou en Bidze plis ki R11bilyon, plis ki tou sa Bidze ki Gouvernman oparavan in anmennen dan sa Lasanble dan sa peryod kriz ekonomik.

Mr Speaker, lenflasyon i devan nou laport, pri komodite ki'n vin pli ser ki mon'n war

depi sa 40an mon lo sa later, pli pir ankor kot reveni ki en serten pa pe kapab ganny balanse pou soutenir lafanmir.

Akoz si napa sa reveni ki pe antre kot en fanmir, sa pou anmenn bann diferan konsekans serye, grav e kritik. Pou napa manze lo latab, *bill* pa pou ganny peye e ou sibir dekoneksyon par *PUC*. *Loan* pa pou ganny peye ou sibir lasezisman.

Zanfan pa al lekol, son nivo ledikasyon i desann, e diferan problemn finans e sosyal i pran plas dan lavi sa fanmir. Sa i vedir, ou tonm dan lamizer e dan la povrete.

Mr Speaker koman en lopoziyon responsab, kot sa pep i enstri serten responsabilite e lekspektasyon dan nou, mon war li egalman enportan pou depouy sa Bidze. E osi siport parti sa Bidze ki dan lentere Seselwa.

Mr Speaker sa Bidze ki nou pe gete ozordi osi i annan en lenportans pou nou osi kapab konpran kote pei pe ale.

Alors Mr Speaker, nou bezwen swiv en bon direksyon. Ozordi mon plito konsernen, si Seselwa pou kontinyen ganny en saler, si sa bann striktir leta pou kontinyen fonksyonnen, si ledikasyon pou reste gratwit, si

nou sistenm lasante pou reste parey i ete ozordi.

Si nou bann vyeyar parey ton Frank, madam Uzice, bann vyeyar i garanti zot pansyon e zot *carer*. Si nou bann etidyan parey Anissa, Loraine, Daniel, Leandro pou kontinyen zot letid avanse. Si sa manman parey Francisca, Maria, Agnes pou kapab anmenn son zanfan *day care* ou *childminding* ouswa pou li pey son *rental* son lakaz.

Mr Speaker, kote ki mon war mankman, e mon konsern dan sa ladres Bidze? Bokou zot in koz lo *mismanagement*, Mr Speaker mwan si mon pou koz lo *mismanagement* se *mismanagement* sityasyon *COVID* dan sa pei.

Mon oule dabor felisit Dr Gedeon ek son lekip lasante e mon rekonnèt sa fardo ki lo zot ledò. Me mon osi krwar ki zot travay in ganny enterfer par politisyen. E se sa ki fer nou dan sa sityasyon ozordi, se gras a zot. Eski sa kantite lenfeksyon e ka lanmor ti kapab ganny evite? Larepons i wi, si politisyen pa ti antete e bann mezir ti ganny fer a tan e Gouvernman pa ti trenn lipye. Me in fini tro tar.

Zot kontan koz lo *mismanagement* Mr Speaker, la i enn a tou son splander kot *LDS* in *mismanaged*.

Mr Speaker, nou war bokou kontradiksyon par sa Gouvernman LDS. En letan zot in dir aret servi Beau Vallon Bay apre zot in bezwen taye retourn laba.

Donater vaksen anonim pa ankor materyalize, la nou tandé *La Russie* ki pe ede. Nou war kontradiksyon lo reveni *forecast*, ki lo petet e petet zot in mal kalkile.

En lot kontradiksyon serye se lo *FA4JR* ki ti dir pou ale ziske Mars, me la pe ganny al arete. Nou tann dir zot pou kree en *leaner government*, me selman nou war plis Minis ek bann nouvo lapwentman. Mr Speaker kontradiksyon.

Mr Speaker i annan en nouvo form viktimizasyon ki pe arrive dan sa pei, e mon krwar ki sa Komite Anti-Viktimizasyon, ki ti ganny *lead* par Onorab Andre i merit ganny *reactivate*.

E mon konnen petet Onorab Andre pou dakor ek mwan. Ler dimoun pe ganny deporte, e zanfan pe ganny separe. Se pa en form viktimizasyon sa. Ler ou perdi ou lanplwa, ouswa ou kontra pa pe ganny renouvle, aköz ou apartenans politik, pa viktimizasyon sa?

O kontré mon salyé, Prezidan Faure ki dan son

peryod koman Prezidan in met diferan siporter LDS, dan bann *top position*, bann departman e bann Board.

E mon pa rapel anba son ladministrasyon okenn Seselwa in perdi son louvraz, aköz son lapartenans politik, ouswa i siport *One Seychelles*, Lalyans ouswa LDS.

Mr Speaker, mon oule tous en kou sa size kou lavi. Minis dan son ladres pa'n al ase profon pou pronons bann mezir pou adres kou lavi ozordi. Ozordi Sesel i war li ek en kou lavi pli elve ki zanmen nou'n deza war, ek en devalyasyon nou Roupi ek en pri Dolar ki vremen o.

E kot marsan, osi pe menm al lo ver *black market* pou aste en dolar R23 a R24 e sa pa pe ede pou fer pri lavi desann.

Alors Minis, ki plan ou Gouvernman pou asir pep Seselwa, sirtou nou komodite de baz a en pri rezonnab? Aköz sa sak ki ti pran sa komisyon R500, ozordi in nabou akomod konmisyon R1000.

Fanmir pe kriy leokri, lamizer pe koman ronz nou sosyete. Bann *single parent*, pe santi zot pe ganny tape, alors ki soulazman i annan pou nou pti trezor kapab ganny en pti lasyet

manze, en pti pake dyous, en pti biskwi, ouswa sa pti gato.

Mr Speaker, oli sa fame mezir, ouswa nide ki Vis Prezidan Afif ti kontan vin avek dan lepase pou abord size pri lavi? Ler i ti koz fortman, lo fer lentere desann akoz sa i annan lenpak direk lo kou inisyas servis. Akoz pa'n al dan sa direksyon?

Ler Gouvernman i koz lo negosyasyon kou *rental*, me eski zot in pran kont, *loan* e depans ki sa biznes ouswa endividi i bezwen peye? Kot labank in met zot lentere tre o, ase o i bezwen *meet* son *monthly repayment* e ki si labank in *set* son lentere, rarman ou kapab al kot li e re negosye avek li.

E ler mon pe mansyonn labank, eski Minis i kapab, dan son larepons dir pep Seselwa, akoz ler zot pe tir sa detrwa pti rroupi ki reste zot, zot pe ganny demande pou deklare ki zot pe al fer avek sa larzan? Eski i annan nouvo regilasyon finansyel ki petet mon pa okouran ki pe ganny mete an plas?

Alor Mr Speaker akoz mon demande, akoz Gouvernman atraver Labank Santral pa *entame* en diskisyon lo sizere lentere. Si sa i ava ganny fer i ava ouver lespas pou annan sa negosyasyon e fer pri servis pli

abordab. E la ou kapab negosye en pli bon *package*. Be si sa pa ganny fer, nanryen pa pou sanze. Alors annou azir fran e onnet lo sa size.

Mr Speaker lo size komers e marsan; Ozordi plis ki zanmen i annan lensertitid dan pri marsandiz, yer i en pri demen ler ou pase pri in sanze, mon pa akiz marsan pou dir zot malonnet, akoz dan biznes i annan bann konponan enportan. Tel ki ou litilite ki'n ogmante, kou transportasyon, *rate* deviz etranzer, ou *rental*, ou saler, e la bann *operating hours* ki sanze tanzantan, fas a mezir kont propagasyon sa viris.

I fer ki sa i anmenn en minimiz lo zot lavant ki fer rediksyon dan profi. Alors ki mannyer nou annan e anmenn sa balans?

Mon konstate la i en moman pou Lasanm Komers, pran en rol pli *proactive*, e annan en diskisyon serye e vin ek solisyon e propozisyon e met devan Gouvernman.

Mr Speaker, bokou ki dan biznes i fristre avek serten mezir, ki mon pa pe dir i mal mwan. Me parfwa i pa balanse ouswa i dan benefis zis en kote. En laliny kredi R5000milyon, ti ganny mete dan form en *loan* par Labank Santral, ki pou

ganny *disburse* atraver bann Labank Komersyal, garanti sa 70poursan par Gouvernman.

Me ki nou'n war, Desanm 2020 preski zis 12poursan sa larzan ki'n ganny servi, kan bokou biznes pe dir zot pa kapab pey *rent*. Zot pa kapab pey zot kou litilite, zot pe ganny difikilte pey zot saler e zot prop *loan*. Be akoz zot pe war zot dan sa difikilte pou akse sa sours finansyel enportan?

Minis ou'n nonmen, me fodre ou seryezman get en kou ladan akoz i pa dan lentere sa bann pti biznes.

Mr Speaker, Minis, *desperate time calls for desperate measures*. Gouvernman dizour, merit zwe son rol regilater e fasiliter, sekwe sa bann lenstitisyon ki sipoze fer *oversight*, gete si tou pe mars byen, e si i ki konsern komers, kot an sa ki konsern komers pei. Annou gete ki direksyon nou pe ganny trennen ladan.

Al vwar e fer letid, si ti napa meyer alternativ, ouver bann marse ki pou benefis e ede anmenn kou lavi, lo en nivo abordab. Minis mon ti ava kontan osi demann ou. Ki plan diversifikasyon ekonomik nou pei, akoz nou ankor pe tande lotel pe ouver, isi lotel pe ganny konstri laba, eski nou pa ankor

aprann ase leson avek sa *COVID*?

Mr Speaker, kou servis. Mr Speaker ozordi pep Seselwa pe eksperyans kou lavi eleve dan tou direksyon, *internet*, data. Mon santi, i annan en problem *somewhere*, ki si nou pa pe get ladan pou *regulate* sa marse e nou bezwen serye.

Mr Speaker, mon osi parey bokou lezot Seselwa in eksperyans bann tel pratik, la ki model ekonomik pe sanze e lafason fer komers osi pe sanze fas a *COVID-19*, kot bann *online trade*, pas lenformasyon e menm lo nivo edikasyonnel, la kot nou war devlopman bann aplikasyon. Tousala i relye avek en kou enternet, data ki mon war i merit ganny regarde akoz son pri i tre o.

Ler lekol pe dir paran, *download* leson, bann ekstre edikasyonnel eksetera. Eski sa pa vin ek en kou finansyel? Eski zot pran kont sa i annan en Bidze lo lafanmir e ki son zanfan i depan bokou lo la pou son ledikasyon.

Pou reste an kontak lo rezo sosyal e fer serten komers e resevwar lenformasyon oubyen *email*, tousala Mr Speaker pe kout bann paran bokou larzan.

E ler mon tann Minis vini dir poudir R20milyon, pe ganny

mete dan lenfrastruktir pou aste sez, latab mon ti ava dir Minis plito rod en fason koz ek sa bann lakonpanyen enternet, *subsidize* nou bann zanfan lekòl, akòz nou pa konnen ki kantite letan, zanfan pou al asize dan lekòl fas ek sa sityasyon *COVID*.

Mr Speaker Sesel lo nivo Lafrik nou annan en pri data ase eleve, e sa ki sipoze fer son travay *monitoring*, mon krwar pa pe fer son travay byen, e bann lakonpanyen pe azir dan en fason malonnet e mannyer zot anvi. Alors Minis Finans, mon demann ou ki Gouvernman i enterfer lo sa size, e pa reste lebra krwaze.

E Mr Speaker Vis-Prezidan Afif, li ki ti anmenn en lager avek *DICT* dan sa Lasanble. Alors mon demann li pou li osi, donn en koudmen dan sa lager akòz zot ki pe *run border*.

Mr Speaker vi ki zot pe *run border*, al get en kou kot *SEYPEC*, donn pep Seselwa lenformasyon ki pe pase ek nou *tankers*. Ki kantite reveni ki i kolekte la ki in fini pey tou son *loan*, dir nou kote sa bann larzan i *bank*, si Sesel ouswa lo kont aletranze.

Mr Speaker ler *LDS* pe *run border*, pas en kou kot *PUC* osi, fer parey lo size *Air Seychelles*,

fer bann lodit nesaser, akòz Prezidan in dir ki nou tou nou bezwen fer sa sakrifis.

Alors al gete si dan tou sa bann lakonpanyen parastatal, zot osi zot pe fer sa sakrifis nesaser, ouswa si zot pe fer biznes *as usual*.

Akòz zot osi, zot annan en rol mazer pou adres *cost of living* dan pei. *IDC* osi i devret ganny fer parey, e ler mon antann Onorab Labonte ki pe dir, byento pou rann kont nou zil, mon en pti pe per dans son plas, Mr Speaker.

Lo sa size lagrikiltir ek lapes; Minis Finans in anons bann *loan* pou sa de sekter, fantastik Minis. Me mon konsernen, mon enkyet akòz se ki zis sa ki annan larzan ki pou benefisye, mon ti ava kontan demann Minis ki form garanti ki zot pou soumet devan pou sa bann pti ferme ki oule akse ek sa *loan*?

Eski sa pti ferme ordiner pou war li kapab fasilman akse sa fasilite? Minis in koz lo *Livestock Trust Fund* mon pledwari Minis, se ki sa fon osi i ganny servi e mete a la porte bann ferme, ki dan problem, bann ki pe perdi zot travayer etranze e ki napa ase Seselwa ki pare pou pran en metye dan sa sekter.

Mr Speaker mon ti ava kontan demann osi Minis ki Gouvernman i anvizaze fer, pou relev moral nou bann zenn pou pran en karyer dan lagrikiltir ouswa lapes?

I pa sifi dir osi pou ou pran later bann ki pa pe devlope, kan anefer zot lanmen ek lipye sa bann fermye i ankor anmare. Met divan dan zot lavwal nou ava war si zot serye pou prodwir. E si zot pa fer li, ou ava annan parfet rezon, e mwan mon pou siport ou pou ou pran zot later Mr Speaker.

Minis osi mon ti ava kontan ou ti al revwar tou sa bann *lease* later lagrikiltir, e vwar si sa ki merite, i merite e si sa pa pe ganny *sublease* pour lezot *purpose* ouswa avek dalon.

Minis mon osi mon ti ava kontan, demann ou lo size *GOP*, en leklersisman aköz nou pe tandè poudir, i annan plis etranze avek sa bann nouvo lakonpanyen ki pe al ouver zot lotel ki pe anmenn etranze pou vin travay.

Eski zot asire, poudir zefor an plis in ganny fer pou fer ki tou Seselwa ki kapab ranplas sa bann dimoun dan sa pos in ganny fer?

Minis fodre zot asize avek Minis Lanplwa, pou zot kapab fer en travay serye lo sa. Mr

Speaker lo sa size devlopman, Minis in anons serten mezir. Me mon ti ava kontan voudre ki i eklersi sa Lasanble, kot i konsern lenplimantasyon bann ti proze distrik. Ki lanpler sa pou pran a lavenir?

Me mon war larzan pa pe ganny mete, anba bann *Vulnerable Home Repair Scheme*. Ki pou arive ek sa bann *cases* ki ti'n deza ganny approve, anba ki departman, ki ti'n deza ganny aprouve.

Ouswa anba ki departman sa pou tonbe la ki seksyon ki ti pe adres size lapovrete osi in ganny aboli? Minis nou ti ava kontan ou vin fran aköz pep Seselwa pe demande si pa pou fer, dir nou pa pou fer.

Mr Speaker ler mon pe regard, proze kapital mon rekonnet nesosite serten sa bann proze, e mon konpran lanbisyon sa Gouvernman pour akonplir bokou dan mwens letan.

Me selman nou bezwen *être* selektif dan irzans sa bann lenplimantasyon. Nou konnen pou dir ozordi ki pri konstriksyon in ogmante, pri materyo in ogmante, ki fer ki kou final pou annan en gran lenpak lo lanvlop Gouvernman. Alors Gouvernman i bezwen

balans byen kwa ki son priyorite.

Mr Speaker, ozordi sityasyon ekonomik i pa apropiye en Gouvernman pou konstri nouvo lofis, i pa apropiye, priyorite Gouvernman pou konstri nouvo lekòl, ou swa antre lo bann proze vizyoner, me plito regar fikse lo *maintenance* sa ki nou deza annan e *make use of* lespas egzistans, san bezwen fer grandyoz parey serten i oule fer.

Nou war serten Manm Lasanble, vin ek zot *wish list*, pe demann proze, a parti proze, eski zot in vreman konpran sityasyon ekonomik ki zot Gouvernman i met devan zot?

Mon krwar pa. Olye *focus* e fer sir ki Minister Finans pou asir lapey e benefis tou Seselwa, zot ankor pe sant leloz proze ki pa priyorite.

Mr Speaker lo size *FA4JR* en lot kontradiksyon, lanons i ganny fer ki sa lasistans pou *phase out* an Mars lo en baz rediksyon 50poursan. Epi al ver 25poursan, me la ki nou war se ki sa *Scheme pe* al arete en sel kou. Mon dakor Mr Speaker si i annan labi, nou bezwen adrese.

Me Mr Speaker, me ler zot koz lo *mismanagement FA4GR*, *FA4GR* ti ganny konmanse an

Avril ziska Oktob. Sa i fer 7 mwan, e sa se *US* ki ti o pouvwar.

Me apartir Oktob ziska la Fevriye, se *LDS* ki o pouvwar. Si zot ti vwar poudir ti annan labi, zot ti kapab nek Septanm zot ti kapab, apartir Novanm zot ti kapab zis dir ek Minis Finans. Koup tou lasistans *FA4GR* e la ti ava sov pei apepre R600milyon, me selman nou ti ava war bokou Seselwa perdi zot lanplwa.

Mr Speaker, ler zot in ou'n koup ou *URS* e aboli *SETS*, kote zot pou ganny, bann dimoun pe demande kote ki zot pou ganny anpare, la ki marse lanplwa i tre minim.

E kot napa gran demann eksepte sa enn de lotel, ki pe *recruit* ki pa serten, si osi nou Sekter Tourizm pou *pickup* apre Mars, Avril ou Me. Alors ki zot pou fer?

Mr Speaker Minis in koz lo kontra sekirite. E menm dir poudir zot pou vin avek bann nouvote teknolozi e modern. Minis mon ti ava kontan zot reflesir en kantite lo sa.

Mon espere osi, ki pa bann lakonpanyen dalon ki pou benefisye, me selman sa ki mon konsern se ki pou arive avek sa bann travayer dan sa bann lakonpanyen ki pou perdi zot kontra?

Eski dan en kote zot pa pe ganny viktimize, akoz la mon mazin Martin Aglae.

Lot konsern i bann Kontra LWMA ki Minis in ganny dir ki i tro bokou, fodre revwar a lafason sa bann kontra in ganny kase.

Minis in dir ki'n koup tro bokou e pli ser lafason ki Kontra in ganny donner. Minis seryezman, sa bann pti Kontra LWMA i anploy zis Seselwa annou mazine konbyen fanmir Seselwa ki riske perdi en lasyet manze e war zot dan difikilte?

Minis nou bezwen fer refleksyon lo sa bann size. Akoz sa, i pou an detriman en servis enportan.

E fer nou mazine osi Minis, ler Gouvernman ti dir an 2008 leve, debourye bokou zot sa bann pti dimoun ti pran zot desten dan zot lanmen e al *apply* en pti kontra e zot ti fer sakrifis. Me la ki nou pe war, zot sakrifis pe ganny menase par nou Gouvernman.

Mr Speaker fodre nou reflexir byen avan nou mazin zis koupe ouswa fermen. Menm parey i aplik pou *contract cleaning agency*, pour ki sa plis ki 600 travayer zot lavenir i dan dout.

Nou bezwen annan en prosis gradyel e negosyab, fodre pa ki Gouvernman i azir

koman en kouto nanmsennan kot i zis vin koupaye, e koupaye.

Mr Speaker, ler politisyen i koz lo Benefis Proteksyon Sosyal, e ki zot pe dir poudir R1bilyon i al zis dan *welfare* kot i zis ganny donner, kan ki i pa korek. Politisyen in fer sa pep krwar, poudir ki R1bilyon pe ganny zis gete, kan annefe i pa leka.

Mr Speaker dan sa R1bilyon, 787milyon i al dan *Retirement Benefis* sa i bann pansyon, sekirite sosyal. R279 milyon i al pou *home carer* pou benefis nou bann vyeyar pou ki zot kapab, ki zot pa ganny rezete e ki ler zot in malad.

R110milyon i al ver Benefis Envalidite e zis 77milyon ki'n ganny prozekte, ki'n ganny met anba *Safety Net* sa pou sey anpar bann ki tonbe.

Sa i montre ki sa larzan pa'n zanmen ganny donner, tord, atraver e bokou sa larzan i ganny gide anba en Lalwa. E si Minis i krwar ki annan en labi, e koripsyon servi bann lenstitisyon ki a son porte e pou met bann ki koupab Ankour, e fer zot rann kont.

Pou konklir Mr Speaker, zabitan Port Glaud ki'n elekte mwan, pou defann zot drwa, e zot lentere e mon pou kontinyen fer li.

Menm si an se moman i annan ki pou zour mwan, ouswa pou maltrete mwan lo rezo sosyal, mon oule fer zot konnen, ki bokou nou pou akonplir ansanm ler nou pou'n fini sirmont bann defi.

E mon rekonnet osi ki, nou pou dan difikilte pou akonplir serten nou bann plan, e pou annan bann retar, alors mon sipliy avek zot pou annan serten pasyans.

Lavi pa pou fasil pou nou an 2021, me selman annou reste ini. E mwan Mr Speaker koman en lopoziyon responsab, mon swet Prezidan avek son *Cabinet* pou fer plis.

E mon demann, e mon donn zot kouraz osi pou travay dan benefis tou zanfan Sesel, san okenn entimidasyon, ouswa viktimizasyon. Mersi.

### **MR SPEAKER**

Mersi Onorab. Onorab Roucou.

### **HON CLIVE ROUCOU**

Mersi Mr Speaker. Bonn apre midi tou koleg Onorab. Bon apre midi Minis, *sorry*. Bonn apre midi *PS* e tou bann dimoun ki a lekout dan lakour.

Mr Speaker, atraver ou, permet mwan pou mwan *remind* Onorab Aglae ki *LDS* i o pouwar pandan 4 mwan, pa 40an. Pandan 43an, mon

demande ki sa fwa ki ou'n demann ou Gouvernman pou fer lodit lo *tanker*.

### **(APPLAUSE)**

### **HON CLIVE ROUCOU**

Kan ou'n demann ou Gouvernman pou fer lodit lo lalis later. Onorab Aglae mon konnen ou'n napa sa kouraz, me selman ozordi ou dan Lopoziyon, ou pe sey fer krwar.

Mr Speaker, pour komanse mon bezwen felisit Minis Hassan, *PS* Thesee e tou bann teknisyen pou formil e met sa Bidze an perspektiv pou sa letan aktyel ki nou pei pe pas ladan. Alor avek gran plezir mon pe aport mon kontribisyon lo ladres Bidze pou sa lannen fiskal 2021.

En Bidze en pe plis ki R11 bilyon ki Minis garanti mon pou donn tou mon sipor. Pou komanse, avek senserite mon kapab dir ki sa i en vre ladres Bidze konpare avek tou bann ki nou'n tande oparavan. Sa i en Bidze serye e byen kalkile. Pa parey ki lo lot kote latab in fer nou krwar ki sa i en Bidze petet oubyen en Bidze bourzwazi.

Lo sa pwen Mr Speaker, mon leker ti touse ler mon tann sa *speech* tousan ki Onorab Ghislain in fer. Pres pou li plere ler i mazin bann ki lo *URS*, bann

ki lo *FA4JR*, bann ki pou perdi lanplwa, bann ki lo *part rental*. Mon bann frer ek ser deor la, pa krwar dan Onorab Ghislain.

**(APPLAUSE)**

**HON CLIVE ROUCOU**

Be i pa'n dir nou ditou akoz zot dan sa sityasyon. I pa'n dir nou ditou ler zot ti pran zot pti *loan SBFA* pou fer *backyard farming* Perseverance.

**(APPLAUSE)**

**HON CLIVE ROUCOU**

I pa'n dir nou ditou ler zot pran zot pti *loan SBFA* pou aste bato, avyon, *rocket* ek tou sort kalite !

Mr Speaker, i pa'n dir nou ditou mon bann frer ek ser deor ki sa kote latab la, kot bann *US* i ete, zot ki responsab pou zot soufrans. Me le kontrer Minis Hassan ki devan in fer en ladres Bidze ki pe anmenn lespwar e pe donn en direksyon kler, lo ki Gouvernman dirize par *LDS* i annan pou ofer Lepep Seselwa.

En ladres Bidze ki pe tous tou kous Seselwa dan en fason ou en lot avek en bi pou en meyer demen. En Bidze ki kree lanvironnman pou progresyon. Kot tou Seselwa ki travay i a kapab rekolte son fri. Me non, lot kote latab in fer nou krwar

sa i en Bidze *Mickey Mouse* parey zot ti anmennen avan.

Mr Speaker, sa Bidze in ganny partaze an 2 parti. Premyerman sa bann mezir pou koup bann depans initil ki'n ganny tolere par Gouvernman parti *US* pou plizyer lannen. Par egzanp lagreman avek Beau Vallon Bay. Latant kot Minister Lasante. Bann diplikasyon ki ti annan atraver bann diferan *Board* ek lazans zis pou soutir zot dalon.

Me dan dezyenm parti sa ladres in vin avek bann plan Gouvernman, kot in ganny byen etale dan son totalite atraver bann Minister, pou kapab relans nou lekonomi e delivre li pli efektifman, par egzanp reform *SRC* pou donn plis abilite e kapasite pou kolekte taks. Revwar rol *STC* pou ede fer desann pri lavi. E kot Gouvernman i ava vin en fasilitater e sa i ava fasilit sa kiltir fer biznes parmi nou pep kot nou ava ganny reveni.

Mr Speaker, sa i zis detrwa legzanp en Gouvernman responsab, kot sa i ava ede met nou lekonomi drwat debout. Mon bann frer ek ser Seselwa, me avan mon kontinyen nou bezwen pran an kont ki nou Gouvernman, le 25 Oktob in pran sa pei dan en moman tre, tre difisil. Alor keksoz pa pou

vin dan dalo, Gouvernman pou otomatikman trimouse e sourse pou remet sa pei lo son ray ankor. I pa pou fasil, me mon garanti zot anba direksyon Prezidan Ramkalawan e nou Minis Finans, Minis Hassan ki la devan nou. Nou devret donn zot konfyans ki nou kapab fer li e nou pou fer li.

Mr Speaker, Minis e bokou Manm dan zot ladres zot in fer referans lo lenpak negativ ki pandemik *COVID-19* in anmennen lo nou lekonomi. Me sa ki sagrinan ler nou koz lo *COVID-19*, nou tann Onorab Pillay dan son ladres vizavi *COVID-19* in zis fer lakizasyon e fo lakizasyon, ler in dir bann mansonz. Parey ler in dir *LDS* in vin ek en lapros lese fer an relasyon ek *COVID-19*. *LDS* i fer travay bann travayer lasante vin pli difisil e sa in ganny konfirman par Onorab Aglae tou. In dir ki politisyen *LDS* in rann zarm lo *COVID-19*.

Mr Speaker, mon pa vwar sa i drol. Parey son labitid, Onorab Pillay napa naryen pou dir ankor. Tou son *gray matters* in fatige! Zot fatige, zot menm pe rebel avek li la. Alors i fer li rabase.

Mr Speaker, Onorab Pillay in bliye ki *Father* avek Minis Radegonde ki'n trase pou ganny diferan vaksen pou Lepep

Seselwa gannyen. Sa i enkli bann Manm lo lot kote latab ki tre fyer zot in dir ki zot in fini pran zot vaksen. Bravo Onorab Rocky.

**(APPLAUSE)**

### **HON CLIVE ROUCOU**

Onorab in bliye ki Prezidan in fer sa kont pou ede dan sa lalit e i pe kontinyen resevwar bokou donasyon. Sa pou ed nou bann frer ek se e Gouvernman an relasyon ek *COVID*. Onorab in bliye poudir ki Prezidan ti'n met li lo Komite *Platinum* pou li kapab kontribye, me parey mon'n dir, ti napa naryen pou li kontribye alors in taye. Alors i debout deor, zis i fer konplent e plis konplent.

Mr Speaker, atraver ou mon anvi dir Onorab Pillay, si i kontinyen ek sa latitid, koman en bon zanmi mon pe dir li, li ek parti *US* pou pas an Dodo.

Mr Speaker, avek sa problem *COVID-19* kot i annan plis ki 2200 ka *COVID* Ozordi, sa se pa en lenvansyon *LDS*. Non pa en lenvansyon *LDS*. Wi lenfeksyon pe annan, dimoun pe ganny afekte. Me si nou tou nou zwe nou par, si nou tou ansanm nou zwe nou rol, wi nou pou kapab met li an kontrol.

Wi Mr Speaker, *COVID* in enpakte negativman nou lekonomi. Me avek move zesyon nou lekonomi, par ladministrasyon presedan in agrav nou sityasyon en pe pli vit. La aprezan nou vwar nou pli dan kwense.

Zot in diverti kontan e goberze tou nou larzan parey Onorab Lemiel in dir nou bomaten, ki ozordi gras a *LDS* ki nou koumsa. Me san realize *comme* dir li menm, anba Per Fondater tou keksoz ti bon. Mon bann fer ek ser sa en mansonz. Sa en mansonz, Onorab Lemiel in bliy fame rann sa 10. Ou konnen akoz i dir rann sa 10. Demande ou ava konnen akoz.

Mr Speaker, avek sa problemn *COVID*, wi Gouvernman presedan in partaz tou nou byen antre zanmi e fanmir. *Népotisme* ti sel fason fer pou bokou lannen. La nou vwar bann pti lanpir ti ganny kree. Bann lanperer ti ne. Faver ti vin en priyorite pou bokou zot. Zot ti kontrol nou zil, kontrol nou montanny. Fer lakaz dan pti *pocket*; kontrol nou lakonpanyen avyon e fer li faid. Kontrol nou port pou milyon e milyon e pran pli gro kopo. Mr Speaker, mon zis espere ou pa ganny en *Right of Reply*.

Ler ou sorti *MNA* anba Gouvernman *US*, ou ti vin *PS*, ou ti vin *CEO*, ou ti vin *Special Adviser* menm si ou pa ti konn diferans en poul ek en kok! Tousala zot ti donn ou. Alors si ozordi nou lekonomi i koumsa se gras a *US*. Me sa ki sagrinan, sa ki sagrinan nou tou nou pe anmas lepokase. Ler zot, zot in gran, gro e gra, nou, nou vant ti pe tous avek nou ledò.

Mr Speaker, tou sa problemn lekonomi ki nou ladan, wi *COVID* in anmennen son problemn. Me parey mon'n toultan dir. Tou sa ki ou vwar i mars mal dan sa pei, tou sa ki'n pas mal dan sa pei se *SPUP/SPPF/Parti Lepep* ki'n anmennen !

Mr Speaker, Minis dan son ladres in koz lo lagrikiltir. In dir ki nou bezwen restriktir nou lagrikiltir pou ki nou, ki Sesel i a vin otosifizan.

Mr Speaker, nou program lagrikiltir anba *US* in en *failure* pour ki i annan logmantasyon dan prodiktivite. Sa pa'n zanmen enportan pou en Gouvernman *US*. Zot in touzour kontrol sa sekter. Zot ki ti konnen konbyen zannimo ou pou sonnyen. Zot ki ler zot ti pou vann ou en koson zot in fini koup tou vera. Zot ki ti mezir tou koson dan likou. Zot ki ti partaz later lagrikiltir,

menm ziska dernyen er. Dan en lot mo, zot ki'n *fail* nou Sekter Lagrikiltir.

Me parkont, me parkont Minis in donn en langazman total e vre pou nou Sekter Lagrikiltir. Kot in dir ki bann ferme pou garanti en sipor ek Gouvernman e sa i ava ogmant zot logmantasyon dan prodiksyon lavyann, legim ek fri.

Parey Minis in dir, sa bann sipor pou atraver kou lo labatwar. Nouvo *Scheme Agricultural Development Fund* ki pe donn *loan* en limit 5milyon avek en repeyman lenter 2.5poursan.

Mr Speaker, Minis in dir fre osi Gouvernman pou kouver fre prodiksyon lo *pork* ek poul. Lo sa pwen mon anvi demann Minis pou bann ferme ki pe prodwir bef avek kabri si li osi i pou tonm anba la.

Minis dan son ladres in met lanfaz lo prodiksyon lokal. Fodre ki i depas omwen lanmwatye nou konsonmasyon. Minis lo sa pwen mon'n ganny kontak avek bokou ferme sa 2 zour. Ki zot osi zot dan en kantite problem. Me parkont mon'n vwar ki ou'n ki materyo nesaser, langre, pestisid, lekipman pou ganny aborde. Me aktyelman la zot dan

problem e *store* pa pe *provide* sa ki bon pou zot.

Mon garanti ki nou kapab fer li avek bon sipor Gouvernman e nou bann ferme lokal i a kapab prodwir. Nou ava kapab koup lo lenportasyon. E pli enportan sa ki zot a kapab prodwi i ava pli bon pou nou konsonmasyon e pli bon pou nou lasante.

Mr Speaker, dan menm laliny pou *GOP* e travayer etranze. Mr Speaker, tou sa bann *GOP* e travayer etranze i devret ganny fer lo en baz ka par ka. E la mon met li drwat avek lagrikiltir.

La mon pe mazin mon zanmi Daniel, en boug ki atraver tre for lo son laferm. En boug ki annan detrwa travayer etranze ki pe ed li dan son prodiksyon. E in dir mwan i lev 4er bomaten ziska tar dan lannwit pou li aroze, plante e donn manze son zannimo. In sey tou son mye, tou son mye pou li anploy travayer Seselwa.

Me parey in dir mwan bokou Seselwa ki vini pa krwar ki zannimo i manze Dimans e i manze konze piblik. E i ti a kontan prodwi plis, i ti a kontan prodwi plis me avek pis *manpower*. Alors Minis, mon sizere ki ler nou vwar demann pou travay pou travayer etranze

pe ganny fer lo en ka par ka tousel.

Minis dan son ladres in koz lo Sekter Ledikasyon. Kot in dir ki ledikasyon i kontinyen reste en priyorite pou nou Gouvernman. Ki zanfan Seselwa i devret aspire pou ganny sa ki pli meyer pou ledikasyon. Mwan mon anvoy en mesaz kler pou tou bann zanfan, tou bann etidyan ki fodre zot travay for e etidye for, ki demen avek en bon pozisyon zot ava kapab ranplas bann etranze. Zot ava pran pals bann etranze kot nou larzan i ava reste dan nou sistenm.

Mon osi anvoy en mesaz for pou bann *teachers* pou zot donn zot *utmost* dan zot profesyon. Pou garanti ki nou bann zanfan, nou bann etidyan i ganny le meyer. Mon anvi ki Gouvernman dan en lot kote i valoriz sa travay tre difisil koman en ansenyan, koman en *teacher* ki sa bann dimoun pe fer. Alors mon garanti bann *teachers* ki nou Gouvernman, Gouvernman *LDS* i pare pou donn zot tou sa sipor.

Mr Speaker, Minis pa'n koz lo sa problemn drog ki pe ravaz nou sosyete. Me i enportan pou note ki sa i marye avek nou problemn ekonomik, nou problemn travay. Sa problemn drog, zonn pa pe

prodiktiv, zonn pa pe travay. Apre ki zot in pran zot eroin zot pa pe travay.

Alors mon pe anvoy en lapel pou nou Gouvernman. Enn fwa pour tou sa problemn drog fodre ganny eliminen Sesel an prenon an kont kontinyasyon nou program *methadone*, enn ki pou konpreansiv anba Minister Lasante. Pa enn ki Onorab Vidot in fer nou krwar ki anba *APDAR*, anba Dokter Herminie ti ganny byen ankadre. Non, pa vre sa enn! Anba Minister Lasante, wi i pou mars byen.

Alors mon a demann Gouvernman pou asire ki tou sa bann dimoun ki pe vann drog, pe afekte nou bann zenn, Gouvernman silvouple. Lapolis, *ANB* silvouple annou met lord ek sa bann dimoun. Enn fwa pour tou nou bezwen sezi zot bann *asset*. Sa bann boug pa kapab pa'n travay, selman zot annan gro lakaz, gro loto, gro bato.

Non! Zot bezwen prouve e enn fwa pour tou sa i ava ede pou elimin sa problemn drog Sesel.

Mr Speaker, bokou in ganny dir pou sa ladres Lanasyon. Me mwan mon reste konfidan, mon reste optimis ki en Gouvernman dirize par *LDS* nou pou fer lei e nou kapab fer

li! En Bidze dirize par nou Minis Finans, Minis Hassan avek nou *leadership Father Ramkalawan* nou pou kapab fer li. Tou sa bann problem ki nou ladan, mon vwar lalimyer o fon tinel.

Mr Speaker, sa Bidze pe anmenn lespwar. Lespwar pou Sesel! Lespwar ki nou'n perdi pandan tou sa lakantite lannen. La in arive e ler in sonnen pou nou fer li. Mersi Mr Speaker.

**(APPLAUSE)**

**MR SPEAKER**

Mersi Onorab. Mon ava apel Onorab Naddy Zialor.

**HON NADDY ZIALOR**

Mersi Mr Speaker. Mr Speaker, Minis, koleg Onorab, Lepep Seselwa bonn apre midi.

Mr Speaker, depi Vandredi e ozordi mon'n tann detwa *lyrics* isi dan sa Lasanble. Me mwan apre midi mon ti a kontan partaz en fraz dan en sanson pou ed nou pep reflexir, "*Emancipate yourself from mental slavery, none but ourselves can free our mind.*" In avek bokou pasyon ki mon'n ekout diskour Bidze 2021. Pou premye fwa koman en Manm Lasanble, pandan ki Minis ti pe delivre son diskour, mon realize ki sa sez ki mon pe

asiz ladan se pa en sez kot mon'n vin asiz dan konfor, me se en sez ki mon'n ganny met ladan pou aport mon kontribisyon e lavwa Lepep Seselwa dan en fason pozitiv.

E non pa pou fer parey serten, ki ankor pe fer krwar ek sa pep ki yer i ozordi e ozordi i yer. Annefe dan sa Bidze, Lopozisyon pe donn lenpresyon ki napa naryen ki bon, ki tou i negativ. Napa naryen ki negativ. Zot pe fer krwar ki yer i ozordi e ozordi i yer.

Atraver ou Mr Speaker, sel Manm lo lot kote latab ki'n fer kritik konstruktiv avek solisyon pozitiv pour Sesel se Onorab Churchill Gill. Mersi Onorab Gill.

**(APPLAUSE)**

**HON NADDY ZIALOR**

Pou mwan servi parol ki Minis li menm in fer resorti danm son konklizyon, se ki sa Bidze i enn ki'n met e ki pe met fondasyon pou fer sa transformasyon ki Sesel nou pei i bezwen. Me parkont avan ki nou re konstri sa pei, nou bezwen fer sir ki son fondasyon i solid. Se sa rezon ki Gouvernman pe met en kantite zefor pou asire ki nou Bidze i retourn soutenab e ki nou det i vin soutenab.

Me pou sa transformasyon arive, nou bezwen annan en sanzman dan fason ki nou fer keksoz, en sanzman. En sanzman *mindset*. *Emancipate yourself from mental slavery, none but ourselves can free our mind.*

Mr Speaker, mwan mon vwar en Bidze ki pa pe met lentere en parti premye. Me en Bidze ki pe rebatir Sesel. Mon vwar en Gouvernman ki'n kalkil bann laspe prensipal koman sa konpa ki pou tars sa fondasyon pou remet Sesel lo son lipye. Annan en lekonomi ki soutenab, annan en Gouvernman ki retir labi e fer sir ki tou Seselwa i zwe en rol proaktiv dan devlopman son pei. Malgre tou lesey pou fer krwar ek Sesel ki tou keksoz i mal e ki Seselwa in fer move swa, pa pe abouti zot dan naryen.

Zot anvi kontinyen fer Seselwa vin depandan e menm dekrir Seselwa komann maler e vilnerab. Me nou, nou pou kontinyen sa laspe pozitiv pou pei. Akoz nou, nou pa anvi reste en pei ki vilnerab. Nou pa anvi reste en pei ki ganny deklare koman en *welfare estate*.

Sa ki nou, nou anvi se *empower* nou pep. Fer li vin

endepandan, me sa ki pli enportan se ed sa enn ki merite e ki bezwen pou fer li debout lo son lipye. I annan en kantite keksoz pozitiv dan sa Bidze. I annan lespwar dan fondasyon ki sa Gouvernman pe etabli, pou sa pei. Nou pe get pli lwen ki COVID. Nou pe get pli lwen ki ozordi. Nou pa pe fer politik dan Bidze, me nou pe get lavenir Sesel.

E la si ou permet mwan Mr Speaker, COVID i en keksoz ki pa zis Sesel, i dan lemonn antye. Toulezour nou pe vwar bann statistik, nou popilasyon i ptipti. Me sa ki, ankor la mon dir kot parfwa nou mank sa bout pozitiv, nou koz lo COVID, i vre in annan dimoun ki perdi lavi. I annan 2mil ekek ka COVID isi. Me sa ki nou pa pe dir se ki i annan apepre 18000 dimoun ki'n rekipere avek sa maladi. Personn pa pe koz lo la, parfwa ou a krwar nou anvi ki Sesel i *fail*.

Kantite depans ki ti pe ganny depanse depi Avril ziska Oktob. I annan serten ki'n kre lanpir zis atraver sityasyon COVID, Mr Speaker.

E la, mon ti a kontan Minis, petet dan ou *Right of Reply*, par egzantp donn nou diferans. Parski mon tann Beau Vallon Bay i ganny mansyonnen bokou. Donn nou

diferans depans ki koman en pei nou ti pe fer Beau Vallon Bay oparavan e avek nouvo negosyasyon ki Gouvernman e Sesel pe fer, ki kantite depans nou pe fer ozordi, Mr Speaker. Malgre i annan bokou ka ki'n ganny ogmante konpare ant Avril ler ki sa sityasyon ti deklare.

Pep Seselwa i annan en diferans ant en Gouvernman ki pou parti ek en Gouvernman ki pour Sesel. I annan en diferans ant en pei ki ed en parti ek en pei ki ed en lot son zanmi pei.

Mon koz dan sa fason parski nou pe ganny lenpresyon ki sa bann Pei Zanmi ki pe ed Sesel, konmsi ou a krwar zot ti pe ed en parti, en group dimoun oparavan, me zot pa ti pe ed pei.

Lefe i reste ki tou benefis ki en Pei Zanmi i donn Sesel i al pou Seselwa. Malgre ki serten pe fer krwar ki si ladministrasyon i sanze, tou laport enternasyonal ti pou fermen. Positivite dan Bidze 2020, se ki i annan kontinite. I annan kontinite bann proze ki nou koman en Gouvernman nou santi ki i neser. E in fer provizyon dan Bidze pou lannen 2021, me egalman i annan bann nouvo proze ki Gouvernman atraver ou Minis i santi ki i en priyorite pou nou

senpleman re lans nou lekonomi.

E la mon ti a kontan tous en size, ki depi ler mon'n antre dan Lasanble, mon tann bokou koze lo la. E mwan mon demann mon lekor, eski vremen nou senser ler nou koz bann dimoun ki vilnerab? Ouswa i zis sa bout ki reste ki nou kapab fer olye ankouraz sa bann dimoun pou sorti dan sa sityasyon vilnerab, nou kontinyen ou a krwar pez zot bouton pou nou kapab ganny *mileage* politik Mr Speaker.

Me sa ki tris, se ki ler zot pe swadizan lager pou sa group dimoun gannyen en pti bout, ti annan serten ki ti pe pran bann gro, gro kopo Mr Speaker. E la mon pe koz R1.5milyon ki sorti lo kont Lazans Proteksyon Sosyal e al direk dan en kont endividi, Mr Speaker. Eski nou pe mazin malere?

**(APPLAUSE)**

**HON NADDY ZIALOR**

R1.9 milyon sorti lo kont Lazans Proteksyon Sosyal pou al dan en kont endividi Mr Speaker. Eski nou ti pe mazin malere? R300 mil perdi, pa vwar. Eski nou ti pe mazin malere? Mon poz sa la, Mr Speaker.

*FA4JR*, sa ti en nespes bal bobes, en nespes bal asosye. Mon pa pou koz plis ki sa. Annefe ler nou asize nou regarde, sa ki ti merite pa ti neseserman pe resevwar. E la mon swete ki Minis i senplifye en formalite, pou ki lasistans ki pe ganny donnen pou bann biznes, ki annan difikilte likidite ki pe ganny ofer atraver Labank Santral, i osi senplifye pou bann pti mwayen e bann dimoun ki *self-employed*.

Lazenes Seselwa dan sa fondasyon pou fer nou lekonomi vin soutenab, fodre ki ou osi ou pran ou plas. Fodre ki nou kree bann fason proaktive, inovativ. Me an menm tan fodre, e mon swete la ler ki Departman Lazenes i vin devan nou Lasanble, fer nou konpran byen ki bann program e menm petet *entrepreneurship*, ki bann program ki annan pou fasilite en zenn, par egzanp kree en biznes.

Departman Lanplwa, (la mon pou koz en pti pe for) ki nou osi vin en fason inovativ pou ki vreman lazenes Seselwa pe pran larelev lo kote lanplwa Mr Speaker.

Mon koleg ki'n koz avan mwan in koz bokou lo lagrikiltir. Mon swete osi ki nou kre en lespas pou nou bann

zenn ki anvi pran en karyer dan lagrikiltir.

Mr Speaker, malgre tou koze ki'n annan lo *URS*, mon ankouraze parski depi ler sa lanons in ganny fer sa bann dimoun ki lo *URS* pe aktivman esey tou sa ki posibil, pou zot al deor laba, refer zot bann dokiman dan bann diferan *vacancies*. Me la ankor mon swete ki Departman Lanplwa i vin pli inovativ. Annou met dan nou lespri ki pa tou dimoun ki annan akse avek par egzanp medya, *internet* pou zot kapab fer zot *referral*.

E malgre ki nou dan en sityasyon *COVID* kot nou pa kapab annan enteraksyon, pete vin avek en sistenm apwentman kot sa bann dimoun i ava kapab pa zis pran zot CV depoz kot lanplwa, me annan en apwentman kot zot kapab pe vini, zwenn en zofisye e fer zot *referral*.

Ankouraz parske zis lotre fwa mon koleg Onorab Uranie ti predir i annan 129 dimoun ki lo *URS* La Digue, si mon pa tronpe, 129 dapre statistik. Ladan i annan apepre par egzanp 13 ki'n fini ganny abzorbe dan lanplwa formel, 42 ki zot, zot in deside arete lo program, e ou annan apepre 104 ki ankor pe rod en louvraz.

Mr Speaker, si mon pa tronpe Onorab Mondon in koz lo Departman Prizon. La mon ti a kontan zis fer en pti mansyon, ki i annan bokou nou *labour force* ki ganny trouve prizon. E mon akeyir linisyativ *IDC* e Lotorite Prizon pou fer relans proze Coetivy. E la mon ti a swete ki nou osi regard dan posibilite dan lespri inovativ, dan lespri *cut cost*. Rode ki fason nou pou fer prizon Montagne Posée vin otosifizan atraver bann *inmates* zot menm.

E par lefe ki mon'n nonm *IDC*, dan lespri pou nou ed nou bann frer ki'n tonbe e ki anvi vin endepandan, ki anvi vin rezilyan, swivan rekomandasyon ki'n sorti kot bann paran e bann endividi zot menm, mon ti a kontan osi demann avek Gouvernman pou konsider menm program an kolaborasyon avek *APDAR* kot i ava annan en lot metod alternativ, pou bann dimoun ki lo sibstans petet pou donn en koudmen, ale e devlop nou bann zil.

Bokou koze in ganny koze lo dezolasyon bann *Board* e restriktirasyon. Annefe mon akeyir dezolasyon serten *Board* ki pou ede koup depans. Mon osi akeyir serten restriksyon ki ti nesesser dan Gouvernman

avek lespri pou fer Gouvernman vin pli efikas e pli efektiv. E la mon anvi lans en lape avek tou Minister, sirtou bann nouvo Minis, pou zwenn avek bann *staff* dan zot Minister pou eksplik zot program Gouvernman e plan lavenir.

Parski la ankor dan sa moman tranzisyon, i annan serten ki ankor pe senm konfizyon e divizyon dan bann Minister, Mr Speaker. Tan ka mwan, mon pou kontinyelman aport mon sipor e rekomandasyon kot ki nesesser e si i nesesser.

E la mon ti a kontan retourn lo en size ki mon ti adrese dan Leta Lanasyon, pou ki Gouvernman i regard tou fason e tou mezir pou *empower* bann dimoun ki pe viv avek en dezabilite.

I annan en nesessite pou revwar bann kondisyon bann *carers* ki pe travay avek sa group dimoun. Petet pou bann ka ki *genuine*, in ariv en moman pou nou tir zot lo en *Scheme* e met zot *as a full time, employment* koman *carer*. Sa i ava osi pou pe ed sirtou bann paran pou benefisye avek bann lezot benefis tel koman en *loan* ouswa tann servis.

Nesessite pou nou diversifye posibilite pou en zenn ki pe viv avek en dezabilite pou

annan son prop biznes. Me pli enportan dan Lalwa Lanplwa kot i bezwen ganny spesifye klerman ki en dimoun ki annan en dezabilite, i son drwa pou li ganny pran dan lanplwa baze lo son abilite, Mr Speaker. Sa mo diskriminasyon i pa sifi.

Minis la mon a profite pou fer en pledwari, nou popilasyon aze pe viv pli lontan. Nou bann dimoun ki pe deservi en *wheelchair* pa pe kapab rezouir serten fasilite. En dimoun ki pa vwar kler, en dimoun ki sourd parfwa i enposib pou zot mouvman. Pledwari aköz mon akerir lanons ki Gouvernman pe fer vini 55 bis *SPTC*. Minis silvouple, note pou aksyon. Mon pe siplyi avek Gouvernman pou ki dan sa 55 bis omwen 7 ladan i ava en bis ki *universal design*, pour ki sa group dimoun i vwar zot vremen pe ganny enkli. E ler ki sa i ganny materyaliz annou fer li dan tout modernite. Sa i ava en premye komansman pou aksyon.

An konklizyon, parfwa ou bezwen pas dan move tan pou ganny botan. Me nou bezwen fer sir ki dan botan tou i rezouir. Parey soley i leve, i bezwen kouse. 25 lo 10 ti annan son rezon, 55 poursan ti annan son rezon. Personn e

personn pa pou kapab lager kont lavolonte.

Si vremen ou en patriyot, si vremen ou kontan Sesel, si vremen ou annan Sesel a ker. Gouvernman pe demann ou, mwan ek nou pou donn lanmen re batir nou pei. Annou reste *focus* lo nou target pou nou re dres nou lekonomi. Pou bann ki anvi vwar Sesel lo son zenou, zis aköz i annan en nouvo Gouvernman, nou mesaz se ki nou pe get pli lwen ki nou bout nennen. I nepli en Gouvernman *US!* i nepli en Gouvernman *LDS!* Se Gouvernman Sesel! e nou bezwen ...

**(APPLAUSE)**

### **HON NADDY ZIALOR**

Nou bezwen travay ansanm koman en Seselwa. Travay ansanm koman en zanfan Sesel. Travay pou lentere Sesel. Ka a mwan mon pa pou zanmen les Sesel tonbe! Mersi Mr Speaker.

**(APPLAUSE)**

### **MR SPEAKER**

Mersi Onorab. Avek sa nou ava anmas en pe pou demen. Nou a *adjourn* la e nou a rebran demen bomaten 9er. Mersi Minis e mersi tou dimoun.

***(ADJOURNMENT)***